

Acts

Sepinien xil xa diamu te Polien Xil na Eloheoh Xil

Visi iaxa tetis vanuvei ak?

Moletin xa tetis vanuvei ak, hisen Luk. Xi tenave tei ti e eloheoh xil xa latehe lu e le (12), xi tenave Siu tei ti e mei teneket e Iesu Kristo. Luk tehe dokta tei (Kol 4:14) xa tesukul kuhi, e di tekete kuhi ve holesok xil xa testal e meulien na Iesu (Luk 1:3). Xi tekete kuhi xa Sias testal tetep e Serusalem e teha tetuxoh rute sav xil mun tetep (Polien 1:8). Xi di tekapis ut xil holu tetel eloheoh Pol (Kol 4:14; 2 Tim 4:14; Pil 1:24, e Polien 16:10-17; 20:5-21:18; 21:1-28:16). Xi tetis vanuvei xalu ak: 'Longeongen Hos xa Luk Midisi' e 'Polien Xil na Eloheoh Xil'. Polien Xil, Luk tetisi e 63 AD, e melele xa Pol teti Rom e di tetatil melele xa suv toto tahal Rom ilepisi (Polien 28:30).

Visi iaxa tevuli vanuvei ak tetiamu?

Luk tetis vanuvei ak teha mi timue tei nan xa hisen Teopolis (Luk 1:1; Polien 1:1). Luk tetis vanuvei ak teha mini, e tekila xa moletin xil holu xa latave Siu ti livuli.

Luk tetis vanuvei ak veneh?

Luk tehit vapisen kila xa Sias testal tetep — Vanuvei te Polien Xil misep usili xa Sias testal kokot e Serusalem. Xi misep usil polien xa Iesu tesa ni mi eloheoh xil e mi Kristin xil ngasen (1:7-8). Xi pisen ni mun xa xeihen na Ninin Eo teme e moletin xil xa laneket e Iesu tetep, e tesak ni neketen nae te xeih mu (2:1-12). Luk misep kil sexien xa Kristin xil latepol vituei tetiamu, e di latetutou ni moletin xil tetep (2:43-46). E misep usil sexien xa Sias meul e mei be mahulong e rute savsav xil (2:47).

Luk tehit vapisen kila xa xeihen na Ninin Eo tesak ni Sias temeul tetep — E vanuvei nan, e rut sepinien xa diamu, Luk misep kila xa Sias testal e SERUSALEM texo hisit merekel xil (2:14-7:60) xa mak: moletin na Iesu xil lasepin ni sepinien sav xil xa mosav xil lalong kila (2:4,7-12); eloheoh xil ladal rat moletin xil holu ra meseien nae (3:1-10; 5:15-16); e sepinien nae del setuen nae xil nggur xeihen (4:8-13,30-31). Di, sakpurunien tei xa mahulong mei misak ni Kristin xil lalesae ra Serusalem, labe ut sav xil e provins tahal SUDEA e provins tahal SAMERIA (8:1,4-5) xa latave sotin ti ra hal Serusalem. E melele xa Iesu biles meulien na

Pol, Hi misila del Kristin sav xil tangan lavur longeongen hos usil Iesu Kristo vaha mi mol Siu sav xil xa lade UT SAV XIL E UT ETAN xa kavmen tahal Rom di telaxat xil. E ngan xil xa latave Siu ti xa ladi Afrika, Siria, Esia, Masedonia e Rom mun (12:1-28:30) mei laneket.

Luk tehit vasep kila vatit neketen na Kristin xil — Luk di midis rut setuen xa Pita tesetu ni mi Siu xil usil vatit neketen nan (2:14-41; 4:8-12; 10:34-48), del rut setuen xa Pol tesetu ni mi moletin xil xa latave Siu ti (13:16-41; 17:22-32; 22:1-21; 26:1-29). Luk pisen ni xa longeongen usil Iesu Kristo di mikapis ut holu, e sepinien teni momal tangan moletin xil te kantri sav xil xa sexien nae misav lakila mei lineket en. Luk teta kat tetel Pol melele xa Pol di tetatil suv toto tahal Rom tangan ikesi ha ilepisi (28:30). Misak ni, moletin holu lanemi labit Luk iaxa tetis uvei xalu ak, ‘Longeongen Hos usil Iesu Kristo xa Luk midisi’ e ‘Polien Xil na Eloheoh Xil’ tangan vatutou ni Pol e vapisen kil vatit neketen nan mi suv toto tahal Rom.

Luk tehit vapisen kila xa sakpurunien xil misakras vahas tan ni Sias na Iesu Kristo — Kristin xil holu xa lasetu ni longeongen hos, xil lakameti nggeih e meulien nae. Rute ngan xil, laso xil labe nim te xeih (nggoni Pita-4:3; 12:3-17; e Pol-16:22-40). Rute ngan xil, labas vin xil (nggoni Stivin-7:59-60 e Tiemes-12:2). Rute ngan xil, vanut Siu xil del vanut moletin xil xa latave Siu ti lapol misa mi xil (nggoni Pol-15:19; 17:5-9; 18:6; 19:23-41). E sakpurunien xil xa nggeih xiak misakras vahas tan ni Sias na Iesu Kristo vengan xa Ninin Eo di mi xil. Xi pol ni Sias meul sung be mahulong e mei nggeih mu.

Nenemien tei xa be eilep e vanuvei ak de 1:8

Iesu biteni bit, “Xamim mukil rin ak kestang, melele xa Ninin Eo imei e xamim, mupolu ni xeihen. Ma ti musep usil nou e hal Serusalem, e ut xil xa di provins tahal Sudea, e provins tahal Sameria, e ut sav xil mun iha ihur vuol ni ut etan.”

Naha xa di vanuvei ak?

1. Polien na Pita del Siu xil (1:1-12:25)
 - a. Sias na Iesu Kristo testal kokot e Serusalem (1:1-7:59)
 - b. Sias ba be provins tahal Sameria e Siria (8:1-12:25)
2. Polien na Pol del Ngan xil xa Latave Siu ti (13:1-28:31)
 - a. Kakaoen kokot na Pol tangan vahit usil longeongen hos mi moletin xil e provins tahal Kalesia e Pampilia (13:1-14:28)
 - b. Kaonsel te Sias tahal Serusalem misep usil moletin xil xa latave Siu ti xa mei laneket (15:1-15:35)
 - c. Kakaoen na Pol xa be lu nen ba duxoh provins tahal Esia e Masedonia (15:36-18:28)
 - d. Kakaoen na Pol xa be tol nen ba duxoh provins tahal Esia e Masetodia mun (19:1-21:14)
 - e. Pol misep usil neketen nan e von koten tahal Serusalem, Sesaria, e ba duxoh Rom (21:15-28:25)

1 ¹Toxoli Teopolis,
Nadis vanuvei ak bat minuk.

Vanuvei xa natetisi tehat minuk tetiamu^a, natehit usil holesok xil xa Iesu di tepol ni e di tepispisi ni e melele xa tepol kokot ni polien nan xil ²be duxoh melengien xa Hi tehur rati tehe ut nesao. E tetiamu ni ngan xa Hi tehur rati, Iesu tepispisi mi xil texo xeihen na Ninin Eo mi moletin xil xa tehosei xil mei latehe eloheoh nan. ³Melele xa Iesu tehur longpangasien nan e temat, melengien hanutap lu (40) xi testal mi xil e suse holu xa tepisen ni xa xi temeul rilomun reitin. Xil latepusi, e xi tesepin mi xil usil suse xa Hi mei ihe suv toto na moletin xil en. ⁴E melele xa Iesu teti tamu tetel moletin nan xil, tesel xat xil ni sepinien ak tehit, “Munahereling Serusalem ti mu, e mutatil sanien te Ninin Eo xa natehiteni mi xamim xa tata navan tehit xati xa isa ni mi xamim. ⁵Reitin, tetiamu Sion teterir ni moletin xil e oei tang, e navehi ti, Hi iterir ni xamim e Ninin Eo.”^b

Hi Nggur Rat Iesu Be Ut Nesao

⁶Di, e melengien tei mun, eloheoh xil mei labe vituei del Iesu e lasisi labit, “?Suv, taxeak, melengien momal tangan mei ove suv toto na mol-Isrel xil vaxoni Suv Toto Deved tetiamu, mu tamal ti mu?”

⁷E Iesu biteni mi xil bitene, “Melengien ak, Tata kestang nggur xeihen tangan ihosei. Tave tangan ti xa xamim mukila. ⁸Xamim mukil ngan ak kestang, melele xa Ninin Eo imei e xamim, mupolu ni xeihen. Ma ti musep usil nou e hal Serusalem, e ut xil xa di provins tahal Sudea, e provins tahal Sameria, e ut sav xil mun iha ihur vuol ni ut etan.” ⁹Melele xa bit sepinien ak bus e xil dit tamu lapusi, Hi nggur rat Iesu be ut nesao, e momah tei mei da xole.

¹⁰E melele xa di tamu laketeh be tilang hat, vatakes, moletin lu xa lusing mieh lusoh visal xil. ¹¹E lubiteni mi xil lubitene, “!Ei, mol-Kaleli xil! ?Veneh ma di musoh e di muketeh be nesao? Iesu xa Hi nggur rati reling xamim tangan vahe ut nesao, xi mun tang itilomun imei ixoni ngan taxa di mupusi be ut nesao iaxai.”

Labosei Matias Tangan Ixoles Sudas xa Temat

¹²Di, eloheoh xil labe reling Vathu te Urvatiei te Olip, ladilomun labe Serusalem xa tave sotin ti. ^c ¹³Melele xa laduxoh taon, labe nim tei e labe

^a **1:1** Luk tetis vanuvei tei nggusil meulien na Iesu tuei bat mi Teopolis. ^b **1:5** Melele xa labaptaes ni moletin tei e oei, ngan ak pisen ni xa biles meulien nan mei mineket e Iesu. Melele xa Kristin tei misa meulien nan mi Iesu, Hi Tamen di baptaes ni e Ninin Eo, Ninin Eo mei polu e meulien nan, di misa xeihen mini, e di pisen suse xa momal mini. ^c **1:12** Vathu te Urvatiei te Olip be kilomita tei ra hal Serusalem.

von toen nen tei mun xa de nesao. Moletin xil ak tehe Pita, Sion, Temis e Andriu; Pilip e Tomas; Batalomiu e Matiu; Temis (xa be nat Alveas), Saemon (xa tevae teha xat kavmen tahal Rom tetiamu), e Sudas (nat Temis). ¹⁴Vehakut, xil mei di lasis vituei, e tetit atou tei lamei lamos del xil. E tua na Iesu xil mun, del ninen, Meri, mei lamos del eloheoh xil ak.

¹⁵Melengien vahis mei mitavi, moletin xil vus xa di laneket e Iesu mei labe vituei. Xil vus sangas laduxoh handred tei e hanutap tei (120). Di, Pita mitamea misoh e misepin mi xil bitene, ¹⁶“Toxoli e hinoxoli xil, Vanuvei na Hi mei mistal be reitin usil Sudas. Ninin Eo tepol ni Suv Toto Deved teke mese ni xa Sudas ileh moletin xil mei lital xat Iesu. ¹⁷Sudas tehe tei e xir xa Iesu tehosei, e xi mun tepol texoni xir.”

¹⁸(Vatu xa Sudas tehuri ve sexien tesa xa tepol ni, xi texal rat tan tahalu ni. E tan nen tak, xi mot en, e vangen mesel e tinen xil mistal.^d ¹⁹Moletin xil vus xa ladi Serusalem latelongeong ni, ma nggo sepinien nae lakes rute ak ni, ‘Akeldama,’ xa koute teni bit, ‘Tan te Ra.’)

²⁰E Pita biteni mun bitene, “E Suv Toto Deved biteni e Sam tei bit,

‘Hi Suv, upol ni nim man mei ihe hon tang,
e moletin itovuol iti itilomun en.’^e

Misepin ni mun bit,

‘Bos xa moletin tova ixolesi e ihur von nen.’^f

²¹“Mak, ma moletin tova mei imos e xamem, tei xa tehupil xamem tetiamu e melele xil ngasen xa Suv Iesu di tekakao tetel xamem. ²²Tei xa teta tetel xir e melele xa Sion di tekas moletin xil, mei duxoh melengien xa Hi tehur rat Iesu tehe ut nesao. Rihosei tei e xil vari mei ihur polien itel xamem e ti ihit rati mi mosav xil xa tepus Iesu temeul rilomun ra maten reitin.” ²³Ma xil labosei moletin lu: Siosep Barsabas (xa hisen tei mun be Sastas) e Matias.

²⁴Di, lasis mi Hi labitene, “Suv, xouk okil nenemien na moletin xil vus, ma upisen ni mi xamem xa visi e xalu ak iaxa otehosei ²⁵tengan mei ipol ixoni eloheoh nam. ?Visi e xalu ihur xoles von Sudas, xa telingi tangan ninin nan iha ihe voninen xati?” ²⁶Di, tei e eloheoh xil milihni pepa tei xa his Matias da en. Misak ni Matias vari iaxa mos e eloheoh xil xa latehe tei e le sav (11).

^d 1:18 Matiu 27:1-10 bitene vat xil na pris xil langgur vatu na Sudas, e langgal tan tei ni. Lanemi labit vatiei xa Sudas misar hiraen en misoh de tan ak. E melele xa ao meot, xi mot bemei tan, mei dipas vangen. ^e 1:20 Sam 69:25 ^f 1:20 Sam 109:8

Ninin Eo Bemei e Moletin Xil xa Laneket e Iesu

2 ¹ Melele xa melengien te anien xa lakesi ni ‘Pentekos’⁸ bemei, moletin xil vus xa laneket e Iesu lamei ladi vituei e nim tei. ² Vatakes, lalong tangalen tei nggo ut nesao bemei nggoni votiang tei xa mu nggeih. Tangalen ak mise sen nim xa ladotan ladi en. ³ Di, neta tei mistal e nim ak xa pili nggoni upang, e mitasil ba misoh e vat xil kekes. ⁴ Xil vus mei lapolu ni Ninin Eo, e misa xeihen mi xil misak ni xil di lasepin nggo sepinien sav xil xa tave nae xati ti.

⁵ E melele nen ak, Siu xil xa neketen nae nggeih e Hi latexo kantri xil ngasen e ut etan lamei e Serusalem tangan lamot mi Hi e melengien te Pentekos. ⁶ Melele xa moletin xil ak lalong tangalen ak, holu lamei vituei e rute ak. E melele xa lalong sepinien nae xati xil xa nggo ngan xil xa laneket e Iesu, latemanin ni. ⁷ Xil lamesep pupu e lasis xil labitene, “!Ei, moletin xil xa di lasepin iaxai, xil vus labe ngan Kaleli xil tang! ⁸ ?Midep ma ralong xil di lasepin nggo sepinien nar xati xil? ⁹ Xir rabe ngan Partia, Midia, e Ilam; ngan Mesopotemia, Sudea e Kapadosia; ngan Pontas e Asia; ¹⁰ ngan Prikia e Pampilia; ngan Isip e rin xil xa be Libia sangas visal Saerin. Rute ngan xir langgo Rom, ngan xil labe Siu xati, e rute sav ngan xil xa langgusil xat Rae na Siu xil. ¹¹ E rute xir mun labe ngan Krit e Arebia. !E tave ti neta xa ranggo ut sav xil holu, e xir vus di ralong xil di lasepin e sepinien nar xati xil nggusil holesok xil xa tellep pupu xa Hi di tepol ni!” ¹² Xil vus latemanin e lanem tova tang. Ma lasis pilei xil mun labitene, “?Netak, koute teni midep?”

¹³ E rute xil lasep pepamen ni ngan xil xa laneket e Iesu labitene, “!Moletin xil xai lamun tova tang!”

Pita Misetu mi Moletin Xil

¹⁴ Di, Pita misoh del eloheoh sav xil xa labe tei e le (11) e miki nggeih ba ni vanut moletin xil ak bitene, “Xir xa rabe Siu, e xamim vus xa mudi e Serusalem, muteong ni nou e nihit koute te netak mi xamim. ¹⁵ Moletin xil ak latamun ti vaxoni ngan xa di munemi. Taxeak be naen klok makoe tang. ¹⁶ E-e, naha xa mupusi nggoni ngan taxa provet Soel teke mese ni tetiamu tehit,

¹⁷ ‘Hi biteni bit, ‘E melengien xil xa sangas ni Vongkor,
 inou nisa Ninin Eo navan mi moletin xil ngasen.
 Horamue e atuli namim xil
 ti like mese ni sepinien navan.
 Horam maxoe xil

⁸ 2:1 Pentekos be anien tei xa Siu xil lapol ni melengien hanutap lu e hexalu mun (50) dutou ni ‘Anien te Tavien.’

- ti lipus hisit metuveen melele xa latapat ti,
 e momatu namim xil
 ti lipus kil neta mun ixo metuveen melele xa lapat.
 18 E melengien xil ak, inou niteh rat Ninin Eo navan
 mi moletin navan xil vus ituxoh tiramue e atou xil mun xa labe
 slev tang.
 Xil mun, ti like mese ni sepinien navan xil.
 19 Inou nipol ni holesok xil xa tellep listal e tilang hat,
 e nipisen xeiheh navan e ut etan.
 E ut etan, nipol ni holesok xil listal ixoni melele te vaeen:
 ra ileh, upang e eas ituvan ut ngasen.
 20 E tilang hat, meteneai mei imaluxuluk,
 e aveti imei ipili ixoni ra.
 Melele xa lipus holesok xil ak ivus, melengien na Hi Suv xa
 mahulong pupu mei istal xa mei ilepis moletin xil vus.
 21 E ngan xil xa litak kes nou ve tutouen,
 inou niteh meulien e xil.^h

22 “!Toxoli xil tahal Isrel, muteong ni sepinien xil ak! Melele xa Iesu tahal Nasaret teti tamu mi xamim, Hi tepisen ni tememese tang mi xamim xa xi iaxa tehosei. Xamim mukil xa Hi tehosei vengan xa misa xeiheh mini tangan ti ipol ni merekel xil e holesok sav xil xa tellep pe valnaomi xa misak ni mutemanin. 23 Nggusil lingxatien nan, Hi xa mikil holesok xil ngasen xa mistal teling Iesu pe hemim. E xamim, mutehasi temat melele xa mutesi petine moletin xil xa latahusil ti Rae xil na Hi tangan ha liti xati ite eivave. 24 Di, Hi tepol ni teme a rilomun ra maten tangan naxulehi ti nate pangasien teni. Vengan xeiheh te maten misakras vahur xati. 25 Ngan ak nggoni ngan xa Suv Toto Deved tesepe usil Iesu tetiamu tehit,

‘Vehakut, napus Hi Suv de riuk metu.

De sangas visal nou,
 ma inou, leok tamulul ti.

- 26 Mak, ma inou tinok memaal,
 nasa memesien ba mini.

E naling nenesien navan tangan isikoe xol tiei navan.

- 27 Reitin, nakila xa namaen ninin navan ti nate von maten.

Namae ni ti tiei na moletin eo nan navolel ti e vul.

- 28 Xi pisen suse xa nimeul ixo en.

Nihesi nou vehakut,
 vengan xa de sangas visal nou.’ⁱ

^h 2:21 Soel 2:28-32 ⁱ 2:28 Sam 16:8-11

²⁹Pita biteni mun mi xil bitene, “Toxoli xil, inou nihiteni imal tang mi xamim usil avu nar, Deved: xi temat, e latetihin ni e von tehinen nan xa da tak duxoh xosali. ³⁰Rakila xa xi tehe provet tei. Xi tekila xa Hi tepol ni hitxatien tei te xeih mini xa ipol ni vatimol tei nan mei ihur voninen, ihe Suv Toto.^j ³¹Suv Toto Deved pus kil naha xa Hi ipol ni e melengien xil xa ti imei. Ma misep usil mea rilomunen na Kristo melele xa tehiteni tehit,

‘Hi naling xi ti nate von maten,
e namaen ni ti tiei nan navolel ti e vul.’^k

³²Hi tepol ni Iesu temea rilomun ra maten, e xamem vus matepusi. ³³Hi tepet rati tehe ut nesao ba de rin metu, e Tamen tesa Ninin Eo mini nggoni ngan taxa tehit xati. Taxeak, naha xa mupusi e mulonge be Ninin Eo nen tak xa xi misa ni mi xamem. ³⁴Rakila xa tenave Suv Toto Deved ti iaxa tehe ut nesao. E xi vari tang tesepin usil Kristo melele xa tehit,

‘Hi Suv biteni mi Suv navan bitene,
‘Utotan e riuk metu,

³⁵ ituxoh melele xa niling ngan xil xa laketeh misa ni xouk liti pe hem.”^l

³⁶“!Misak ni, moletin xil vus tahal Isrel ti likil kuhi mak xa Iesu, xi iaxa Hi pol ni be Kristo e be Suv nar, xi vari muteti xati e eivave!”

³⁷Melele xa moletin xil lalong sepinien ak, iexil bon e tine muis. Ma lasis Pita del eloheoh sav xil mun labitene, “?Tua xil, xamem mupol ni itep?”

³⁸Ma Pita biteni mi xil bitene, “Xamim kekes muhiles ra tesaen xil namim e mumae ni xamem muterir ni xamim e oei e his Iesu Kristo. Mak, ma Hi ileh rerat tesaen xil namim e iketeh ihos mun ni xamim. Ma isa Ninin Eo ihe sanien tei nan mi xamim. ³⁹Mupol ni imak vengan xa Hi tepol ni hitxatien ak mi xamim e mi horamue namim xil; e mi ngan xil vus xa ladi sotin. Hi Suv tehit xati xa isa Ninin Eo nan mi xil ngasen xa xi ikes xil limei lihe moletin nan xil.”

⁴⁰Pita misel xat xil nggeih ni sepinien sav xil mun. Xi di dak kes xil bitene, “!Muis Hi iteh meulien e xamim ra longpangasien xa isa ni imei mi moletin tesa xil te xosali ak!” ⁴¹Di, moletin xil holu lake reitin e sepinien nan, ma lamae ni eloheoh xil laterir ni xil e oei. E melengien nen ak, moletin xil laduxoh taosen tol (3000) mei lamos del ngan xil xa laneket e Iesu. ⁴²E melengien xil ngasen, moletin xil ak di langgusil xat sexien xil ak: lamei vituei, lateong xat naha xa eloheoh xil di lapispisi ni mi xil, laseti anien mi xil, langgur Anien Eo na Suv, e di lasis.

j 2:30 Sam 132:11; 2Sam 7:12,13 k 2:31 Sam 16:10 l 2:35 Sam 110:1

Sexien na Ngan Xil xa Laneket e Iesu

⁴³Melengien xil hau tetavi, Hi di tepol ni merekel xil e sexien xil holu xa tellep texo he eloheoh xil. Tesak ni moletin xil vus latetemanin ni, e latemerere ni Hi. ⁴⁴Ngan xil vus xa lateneket e Iesu, latexulehi mei di latehe vituei, e di lateso viton holesok nae xil tengan ti litutou ni ti e xil xa latehe tamure ni neta ngan. ⁴⁵Tesak ni rute ngan xil latepos ni tan nae mu rut holesok nae xil, e latesa vatu teni ba tetutou ni ngan xil xa latehe tamure ni neta. ⁴⁶Melengien xil ngasen, mei lateti vituei e vioh te Nim Eo na Hi e di lateanien vituei e tim sae xil. Latepol tetel memaalen e tetel tinae hos. ⁴⁷Di latepet rat Hi, e moletin xil vus di latemerere ni xil. E vehakut, Suv Iesu di tesak ni moletin hao mei latemos e xil e lateneket en, e xi di teteh meulien e xil.

Hoeo Tei xa Len Mikali, Mikakao Rilomun

3 ¹Vatei, e tri klok mahis xa be melele te sisen na Siu xil, Pita xal Sion lube Nim Eo na Hi tengan lalosis. ²E melele nen ak, rut moletin xil lapo tua tei nae xa latepesi, e len tekali vari, e lalingi sangas ni puiteh te vioh te Nim Eo xa lakesi ni ‘Puiteh xa Bos’. Melengien xil ngasen di lapoe ba di lalingi e rute ak tengan ti varam ni vatu mi moletin xil xa di lamei e Nim Eo. ³Melele xa xi pus Pita xal Sion lumei sangas tengan lalohe nim, miram ni xalu tengan lalosa neta tova mini. ⁴Xalu luketeh momal ba ni, e Pita biteni mini bitene, “!Keteh pus xamel!” ⁵Ma xi miketeh pus xalu e minemi bit ti ihur neta tova ra xalu. ⁶E Pita biteni mini bitene, “Vatu navan tovuol vari, e naha xa nangguri, nisa ni minuk. !E his Iesu Kristo tahal Nasaret, tamea! !Kakao!” ⁷Di, dal xat hen metu e dutou ni mitamea misoh. Vatakes, len xalu momal e mei ngeih. ⁸Xi butahut be nesao, misoh e di mikakao. Di, be xatel latbe vioh te Nim Eo na Hi. E inggak mun, xi di mikakao, di butahut, e di pet rat his Hi. ⁹E melele xa moletin xil lapusi xa di mikakao e di pet rat his Hi mak, ¹⁰lapus kila xa xi be hoeo taxa di tetotan vehakut tete vis ‘Puiteh xa Bos,’ e di teram mi moletin xil. Xil vus lamesep e latemanin ni naha xa mistal mini.

Pita Misetu mi Moletin Xil e Vioh te Nim Eo

¹¹Melele xa moletin ak di tamu maheah xat Pita xal Sion, moletin xil vus latemanin e di labesi xil. Laloh lamei visal xatel e rute ak xa lakesi ni ‘Horao ma Suv Toto Solomon.’ ¹²Melele xa Pita pus moletin xil ak, xi biteni mi xil bitene, “?Toxoli xil tahal Isrel, veneh ma mumesep? ?Veneh ma di mupus xamel mak? ?Munemi mubit moletin ak mikakao nggo xeihen namel tang, mu vengan xa sexien namel momal pe met Hi? !E-e! ¹³Xi xa be Hi na Ebrahim, Hi na Aesak, Hi na Siakop, e Hi na avu nar xil, xi vari iaxa pet rat hisen Iesu be ut nesao, xi xa be moletin te polien nan. E xamim, mutesi ni

pe met Paelet e mutelingi tehe hen tangan vahasi vamat. Xi bit vamae ni ha ven vamase, e xamim mutamae ni ti. ¹⁴Xi xa be moletin eo xa bos mutesi ni, e mutesis Paelet sung tangan vamae ni moletin tei xa di bas vin moletin xil mei ven vamase. ¹⁵Xamim mutepol ni ngan xa be Vatit Meulien temat, e Hi tepol ni temeul rilomun ra maten. Xamel matepusi, e taxeak di masep mese ni mi xamim. ¹⁶Xeihen te his Iesu misak ni moletin xa len tekali xiak bemei bos. Naha xa mupusi mistal nggo neketen e his Iesu Kristo. Xi vari tang iaxa pol ni moletin ak milonge bos pe metemim.

¹⁷“Tua navan xil, nakila xa naha xa xamim tetel vat namim xil mutepol ni mi Iesu, mutepol ni vengan xa mutenakil ti. ¹⁸E suse ak, Hi tepol ni lingxatien nan mei testal tehe reitin. Vengan xa tetiamu, texo provet xil nan, Hi teke mese ni xa Kristo nan mei ilong pangas xi. ¹⁹Mak, ma jemim isae ve tesaen xil namim e muhiles meulien namim. Mumei visal Hi tangan iketeh ihos mun mi xamim, ²⁰ipol ni sien iti e meulien namim, e isa rilomun ni ngan xa tehosei tangan vateh meulien e xamim, Iesu Kristo. ²¹Xi ixulehi itat ut nesao ha vuma ... Hi ipol ni holesok xil vus imei ihe neta hu. Ixoni naha xa Hi tehiti xati tetiamu texo provet eo nan xil. ²²Texoni ngan Mosis tehiteni tehite, ‘Hi xa be Suv namim ipet rat tei e xamim imei ihe provet tei ixoni nou. Muteong xat holesok xil ngasen xa xi ihiteni mi xamim. ²³E xosxa ti e xamim linateong xat provet ak ti, ma Hi isil rerat xil ra moletin nan xil e ihas xil lilel.’”^m

²⁴E Pita biteni mun mi xil bitene, “Reitin mak, provet Samuel del provet xil xa latemei tetutou ni, xil vus lateke mese ni holesok xil xa di mistal taxeak. ²⁵Xir del provet xil ak, rabe mol-Isrel xil, ma hitxatien xa nggeih xa Hi tepol ni tetel xil be nar vus. Nggoni ngan Hi tehiti xati mi Ebrahim tehite, ‘Ixo vatimol nam xil, inou nituxol xat moletin xil ngasen te ut etan.’”ⁿ ²⁶Mak, ma melele xa Hi tesa moletin nan teme, tesa ni mi xir tetiamu. Bit vatuxol xat xir melele xa isak ni xir rihiles meulien nar ra sexien tesa xil nar.”

Pita Xal Sion Lusoh Pe Met Vat Xil te Kaonsel na Siu Xil

4 ¹Melele xa Pita xal Sion di tamu lusepin mi moletin xil, rut pris xil mei lastal, del mereketeh xil te Nim Eo, del Satusi xil mun. ²Iexil mikat vengan xa eloheoh xalu ak di lupispisi mi moletin xil xa likila limeul rilomun ra maten ixoni Iesu. ³Ma xil ladal xat xalu e laling xalu e nim te xeih ba duxoh melengien sav vengan xa be mahis tuei. ⁴E moletin holu xa lalong sepinien nalu, lake reitin en. Misak ni, xil xa laneket e Iesu sangas laduxoh taosen lim (5000).

⁵E maxoe nen, vat xil na Siu xil, elda xil, del tisa xil te Rae xil na Mosis lamei vituei e Serusalem. ⁶Xil ladotan del Anas xa be Vatixar na pris xil; e

^m 3:23 Dut 18:15,18,19 ⁿ 3:25 Sen 22:18

eilep sav xil xa lastal langgo vatimol nan nggoni Kaeapas, Sion, e Aleksanda. 7Xil ladel Pita xal Sion mei lusoh pe met xil, e lasis xalu labitene, “?Neta xa mupol ni, munggur xeihen teni nggo xave? ?Mupol ni netak e his visi?”

⁸Di, Ninin Eo mei polu e Pita, ma bit rilomun ni mi xil bitene, “Vat xil e elda xil na Siu xil, ⁹xosali, mudel xamel tangan musis xamel ve sexien hos xa mapol ni mi moletin xa len tekali. Mubit mukil ti xa xi telonge tehos tetep. ¹⁰Mak, ma malsep kila mi xamim, itel moletin xil ngasen tahal Isrel imak: nggo xeihen te his Iesu Kristo tahal Nasaret, moletin ak len bos e mea misoh pe met xamim. Iesu ak iaxa xamim muteti xati e eivave teha temat, e Hi tepol ni temea rilomun ra maten. ¹¹Iesu be ngan xa Vanuvei na Hi di tesepe usili tehit,

‘Hat tei xa lapol ni nim ni,
xa moletin xil te polien labit misa e laso ni ba,
xi vari bemei bos mak mu mili hat tesav xil.’^o

¹²Iesu kestang mikila iteh meulien e xir. E ut etan ak, his moletin sav tovuol mun xa Hi misa ni tangan mei vateh meulien e xir.”

¹³Melele xa vat xil te Kaonsel lalong Pita xal Sion lusepin bos mak, latemanin ni xalu. Tave ti neta xa lutasukul kuhi ti, ulixalu takan ti. E xil lapus kila mun xa xalu di lutehusil Iesu. ¹⁴E lasakras lasep sisil xalu, vengan lapusi xa moletin xa len mei bos di tamu misoh del xalu. ¹⁵Ma xil lasil rat xatel latbe hale vuteili. Melele xa latoba, xil di lasep tetavoe ve rin xa be natel mi xil mun tang ¹⁶labit, “?Ripol ni itep mi xalu? Moletin xil vus e Serusalem lakila xa xalu ak lupol ni merekel tei xa eilep pupu. Rasakras raviteni ravit tave reitin ti. ¹⁷Xosxa rabbit moletin xil linalongeong ni ti usil merekel ak, ma rike xat xalu tangan lalnasepin ti mun mi moletin xil usil Iesu.”

¹⁸Di, lakes rilomun ni xalu lumei nim, e lake xat xalu nggeih tangan lalnasepin ti e lalnispisi ti mun mi moletin xil usil Iesu. ¹⁹E Pita xal Sion lubit rilomun ni mi xil lubitene, “Xamim muhit naha xa momal pe met Hi. ?Xamel maliteong xat xamim, mu Hi? !Muhiteni! ²⁰Vengan xa xamem masakras mavit manasepin ti ve neta xa mapusi e malonge.” ²¹Ma vat xil te Kaonsel lake xat xalu nggeih rilomun e lamae ni xalu be vexalu mase. Xil lasakras lasa pangasien mi xalu vengan xa moletin xil vus di lapet rat his Hi ve naha xa testal. ²²Moletin xil lakila xa naha xa testal be merekel vengan moletin xa len tekali e teme tehos rilomun, haram nan mitavi e hanutap lu (40).

Moletin Xil xa Laneket e Iesu Lasis Hi Tangan Valeh Rat Ulikanen Vahe Reling Xil

²³Melele xa vat xil te Kaonsel lamae ni Pita xal Sion ba vexalu mase, ludilomun ba lupus timue nalu xil xa laneket e Iesu. E melele xa lupus

o 4:11 Sam 118:22

xil, lubit mese ni mi xil sepinien xil xa vat xil na pris xil, del elda xil latehiteni mi xalu. ²⁴E melele xa lalonge, xil vus lasis vituei ba mi Hi labitene, “Hi Suv, xouk xa opol ni ut nesao, ut etan, tas, e holesok xil vus xa ladi en; ²⁵nggo xeihen te Ninin Eo, xouk otesepin texo avu namem Deved xa tehe moletin te polien nam xa otehit,

‘?Veneh ma ngan xil xa latave Siu ti di iexil mikat?

?Veneh ma moletin xil di lapol ni lingxatien xil xa mei be neta sav tang?

²⁶Suv toto xil te ut etan di labue xat xil ve vaeen,

e vat xil lamei vituei tngan livae mi Hi Suv e mi Kristo nan xa xi tehosei.^p

²⁷Reitin mak, Suv Toto Herot e Pontias Paelet mei lutevituei e Serusalem tetel ngan xil xa latave Siu ti e Siu xil tngan lavae mi Iesu, xa be moletin te polien nam xa be eo. ²⁸Naha xa lapol ni mi Iesu tehusil naha xa xouk oteling xati tuei texo xeihen nam otehit mei istal. ²⁹Hi Suv, taxeak, ulong kil sepinien xil nae xa labiteni ba xat xamem, moletin te polien nam xil. Uhur rat ulikanen ihe reling xamem tngan mukila musa sepinien nam itel xeihen. ³⁰Usa xeihen nam mi xamem li tngan mukila mutal rerat moletin xil ra meseien nae, e mupol ni merekel e holesok sav xil xa tellep ixo his Iesu xa be moletin te polien nam xa be eo.”

³¹Melele xa lasis bus, nim xa ladi en mulul. E xil vus lapolu ni Ninin Eo, e ba di lasetu ni sepinien na Hi del xeihen, e uli takan ti.

Sexien Hos na Moletin Xil xa Laneket e Iesu

³²Vanut moletin xil xa laneket e Iesu ladi vituei bos e nenemien nae be tei takes. Tovuol e xil vahe hokan ni neta ngan, xil vus lamae ni holesok nae xil tngan itutou ni mosav ni. ³³Del xeihen na Ninin Eo, eloheoh xil di labit usil mea rilomunen na Iesu. E Hi di duxol xat xil ni holesok xil ngasen. ³⁴Xil latave tamure ni ti neta, vengan xa vateinga, ngan xil xa tan nae e nim mae di, lapos ni. Di, langgur vatu nen ³⁵e lasa ni ba ni eloheoh xil. Di, laseti vatu xil ak ba dutou ni ngan xil xa nae tovuol.

³⁶Mak, ma moletin tei teta, hisen Siosepe tahal Saepras. Xi nggo vatimol na Livae. Ve sexien hos nan, eloheoh xil laling xoles hisen be ‘Banabas’ xa koute teni be ‘moletin xa di pet rat nenemien na mosav xil.’ ³⁷E melele nen tak, xi pos ni tan tei nan e misa vatu nen ba ni eloheoh xil.

Hi Bas Ananaeas xal Savira ve Luvosen Nalu

5 ¹Moletin tei mun del atou nan lupos ni rut tan nalu, hisealu Ananaeas e Savira. ²Luling xati xa lalkixat xat rut vatu nen ihe

nalu, e rute, Ananaeas milehi ba, misa ni mi eloheoh xil e biteni mi Pita bit, “Vatu xil vus xiak.”

³Di, Pita biteni mini bitene, “?Ananaeas, veneh ma omae ni Temat mei polu e nenemien nam? ?Veneh ma xouk obit oluvos Ninin Eo melele xa otepos ni rut tan nam e okixat xat rut vatu teni be nam? ⁴Tetiamu, tan thehe nam. E melele xa opos ni, vatu xil vus nen be nam. ?Mak, ma veneh ma obit opol ni vamak? !Luvosen xa opol ni xiak, otapol ni ti mi moletin tova, e opol ni mi Hi vari!” ⁵Melele xa Ananaeas milonge mak, vatakes, mot e mat. Moletin xil vus xa lalongeong ni, le mulul ven. ⁶Di, horam maxoe vutei xil lamei nim, mei lapis xol tiei nan. Di, lapoe ba, ladihin ni.

⁷Haoa tol mitavi, atou nan bemei nim. E xi takil ti vari xa tiramue nan mat. ⁸E Pita misisi bit, “?Hit kuhi mu minou, ngan ak be vatu xil vus xa xamil tiramue nam mutehuri e tan xa mutepos ni?”

Atou ak bit rilomun ni mini bit, “Io, xil vus iaxai.”

⁹Ma Pita biteni mini bitene, “?Veneh ma xamil tiramue nam mubit mulsak pis Ninin na Hi? ?Olonge? Moletin xil xa ba ladihin tiramue nam, di lamei sangas ni puiteh. E mei lipo xouk mun uha.” ¹⁰Vatakes, xi mun mot e mat pe met Pita. E melele xa horam maxoe xil lamei nim, lakameti xa xi mun mat. Ma lapoe ba ladihin ni de ri tiramue nan. ¹¹Ngan xil vus te sias tahal Serusalem, del mosav xil mun xa lalongeong ni naha xa mistal, le mulul tova tang.

Eloheoh Xil Lapol ni Merekel Xil del Sexien Xil Holu xa Tellep

¹²E melele nen ak, eloheoh xil di lapol ni merekela xil del sexien xil holu xa tellep pe met moletin xil. Vehakut, ngan xil xa laneket e Iesu mei di labe vituei e rute tei e vioh te Nim Eo xa lakesi ni ‘Horao ma Suv Toto Solomon.’ ¹³Neta sav xa moletin xil ngasen lamerere ni xil, moletin xil xa lataneket ti mu, uli mikan tangan lamei vituei vatel xil. ¹⁴E Hi mileh moletin holu lamei e laneket e Iesu. Misak ni xil mei labe holu mu. ¹⁵Ve polien xa eloheoh xil di lapol ni, moletin xil laleh ngan xil xa lamesei mei laling xil ladi suon mae e seri suse. Xil labit xosxa nini Pita ituxol xil melele xa ikakao imei, ma xil lilonge ihos. ¹⁶E vanut moletin xil holu lamei langgo taon xil xa mikapis e Serusalem. Xil ladel ngan xil xa lamesei e ngan xil xa ninin tesa xil lapolu e xil. E xil vus mei lalonge bos rilomun.

Vat Xil na Siu Xil Di Lasak Pangas Eloheoh Xil

¹⁷Di, Vatixar na pris xil del Satusi xil lanem misa ni eloheoh xil e labit lisak pangas xil. ¹⁸Misak ni, ladal xat xil e laso xil labe nim te xeih. ¹⁹E vongien nen tak, masxaxa tei na Hi mei misah puiteh te nim te xeih e del xil lastal. Di, xi biteni mi xil bitene, ²⁰“Muha, musoh e vioh te Nim Eo na Hi. Musa sen sepinien xil ngasen usil meulien hu ak mi moletin xil.” ²¹Ma

eloheoh xil lalong xat sepinien nan, e melele xa ut da milan, xil labe vloh te Nim Eo na Hi e di lapispisi mi moletin xil.

E melele nen tak, Vatixar na pris xil del vat sav xil lamei e lakes viton elda xil na Siu xil lamei vituei e totanen tei na Kaonsel nae. Di, lasil merketeh xil labe nim te xeih tangan lileh eloheoh xil ak limei lisoh pe met xil. ²²E melele xa merketeh xil labe nim te xeih, latapus ti xil. Ma ladilomun ba labit mese ni mi vat xil te Kaonsel labitene, ²³“Melele xa mabe nim te xeih, mapusi xa puiteh mikoe nggeih tang, e merketeh xil dit laketeh xole. !E melele xa masah puiteh mabe nim, matale xoteh ti moletin!” ²⁴Melele xa vat xil na pris xil del vat na merketeh xil te Nim Eo lalong sepinien ak, latakil ti naha xa nggul eloheoh xil. ²⁵Di, moletin tei bemei visal xil e biteni bit, “!Muteong! !Moletin xil xa muteling xil e nim te xeih, taxeak, di lapispisi mi moletin xil e vloh te Nim Eo na Hi!” ²⁶Ma vat na merketeh xil del rut moletin nan xil ba laleh eloheoh xil labe von Kaonsel. Xil latapol ni ti vaxeih mi xil vengam ulixil mikan xa moletin xil linahop vin xil.

²⁷Laleh eloheoh xil lamei nim, e lapol ni xil lasoh pe met moletin xil te Kaonsel ak. Di, Vatixar na pris xil misis xil bitene, ²⁸“Mateke xat xamim te xeih xa munapispisi ti mun usil his moletin ak. E xamim dit mupispisi ni ba tang. Ma taxeak, Serusalem polu ni pispisien namim. !E mubit muling maten nan mun vate xat xamem!”

²⁹E Pita del eloheoh xil labit rilomun ni mini labitene, “!Xamem muteong xat Hi kestang, e nave moletin xil ti! ³⁰Hi na avu nar xil pol ni Iesu temea rilomun ra maten, xi iaxa mutesak ni temat melele xa lateti xati e eivave. ³¹E xi, Hi tepet rati ba de rin metu e misa xeihen mini tangan mei ihe Vat ni moletin xil tevusien e iteh meulien e xil. Mak, ma Hi di misa mesal mi mol-Isrel xil tangan lihiles ra tesaen nae e mei iketeh ihos rilomun ni xil. ³²Xamem iaxa di masep usil holesok xil ak, e Ninin Eo mun di pisen ni be reitin. Ninin Eo ak, Hi misa ni mi moletin xil xa di lalong xati.”

³³Melele xa vat xil te Kaonsel lalong sepinien ak, iexil nggat pupu ni eloheoh xil e labit lavas vin xil. ³⁴E Parasi tei mitamea misoh, hisen Kameliel. Xi be tisa tei te Rae xil na Mosis e moletin xil vus di lamerere ni. Xi misis vat te Kaonsel tangan vasil rerat eloheoh xil lastal vuteili mu. ³⁵Di, biteni mi Kaonsel bitene, “Tua navan xil tahal Isrel, mulaxat xamim ve naha xa mubit mupol ni mi moletin xil ak. ³⁶?Munem moletin tei xa hisen Teotas? Huram vahis xa ba ngamu, xi testal e tevae tetel mol-Rom xil. Xi tehiteni tehit xi be eilep tei, e moletin xil xa lamos en labe handred hat (400). E melele xa mol-Rom xil labas vin ni, moletin nan xil lateletasil, ma polien nan telel. ³⁷Dutou ni ngan ak, Sudas tahal Kaleli testal e melele kavmen tepol ni pupuluken te moletin xil. Xi teleh vanut moletin tei latehusili e xil mun latevae tetel mol-Rom xil. Xi mun

labas vin ni, ma moletin nan xil xa lathusili lateletasil. ³⁸Mak, ma e rin na moletin xil ak, inou nabiteni mi xamim mak: !Vat nae mat ngamu! !Munapol ni ti neta nasa mi xil! !Muling xil liti nga! Xosxa naha xa xil laling xati e lapol ni mistal nggo nenemien na moletin tang, ma mei ilel. ³⁹E xosxa mistal nggo Hi, ma xamim misakras musikoe xol xil. Maxa ni, munakamet ti xa di mubae mi Hi.”

Melele xa lalong sepinien nan, xil lamaal e nenemien nan. ⁴⁰Di, lakes rilomun ni eloheoh xil lamei nim, e lasis mereketeh nae lameas pangas xil. Di, lake xat xil tangan linavit usil ti mun Iesu, e lamae ni xil ba vexil mase. ⁴¹Melele xa eloheoh xil labe reling Kaonsel, labesi pupu ni xil vengan lakila xa Hi di pet rat xil melele xa mae ni xil langgur longpangasien ve his Iesu. ⁴²E melengien xil ngasen, e vloh te Nim Eo e e tim sae xil mun, xil dit lapispisi e lasetu ni longeongen hos usil Iesu xa be Kristo xa Hi tehosei.

Eloheoh Xil Labosei Rut Moletin te Tutouen

6 ¹E melengien xil ak, melele xa moletin xil xa laneket e Iesu mei labe holu mu, ngongoren tei mistal. Rut Siu xil xa lasepin ni sepinien tahal Kris labit melele xa ngan xil xa lasepin ni sepinien xati na Siu xil di laseti anien, di latasa kuh ti mi tunau nae xil. ²Ma eloheoh xil xa labe lu e le (12) lakes viton ngan xil vus xa laneket mei labe vituei. Di, labiteni mi xil labitene, “Tamal ti tangan xamem maling polien te setutuen e ti maseti anien xil ak. ³Tua xil, bos mak mu xa xamim muhosei moletin tehos xil lihe lu he sav (7) xa nenesien na mosav xil di en. Misak ni muhosei ngan xil xa mukila mubit labe metisou e Ninin Eo polu e xil. Ti, muling xil tangan ti lilaxat polien ak. ⁴Mak, ma xamem musa xamem tangan ti musis e ti musetu ni sepinien na Hi keatang.”

⁵Ma vanut moletin xil ak lamaal pupu ve nenemien na eloheoh xil. Ma xil labosei Stivin xa neketen nan nggeih e Ninin Eo polu en. Labosei Pilip mun, del Prokorus, Nikanor, Timon, Parmenas, e Nikolaus xa be ngan Sentael tei tahal Antiok xa tehusil xat Rae na Siu xil. ⁶Di, ladel xil ba lasoh pe met eloheoh xil, e xil laling he e xil e lasis Hi tangan ituxol xat polien nae.

⁷Ma di, longeongen hos usil Iesu mikapis ut Serusalem. Misak ni moletin holu mun lamei laneket e Iesu, e pris ngan xil mun lamos e xil e laneket.

Vat Xil na Siu Xil Ladal Xat Stivin

⁸E melele nen ak, Hi di duxol xat Stivin e di misa xeihen mini. Misak ni xi di pol ni merekel xil e sexien xil holu xa tellep xa pol ni moletin xil di lamesep ven. ⁹E rut Siu xil mei langor mi Stivin. Ngan xil ak, vehakut di lamei vituei e ut tei xa lakesi ni ‘Nim te Pispisien na Ngan xil

xa Lameluv.⁹ Rute xil lastal langgo hal Saerin e hal Aleksandria; e rute xil langgo provins tahal Silisia e Esia. ¹⁰E melele xa xil labit langgor mi Stivin, Ninin Eo misa metisouen mini, ma lasakras lavit rilomun ni ti neta mini. ¹¹Misak ni, xil langgal xuxus ni moletin tatei xil tangan liluvos lihit, “!Xamem malong moletin xai misepin misa usil Mosis e usil Hi mun!” ¹²Sepinien nae misak ni moletin xil, elda xil, del tisa xil te Rae xil na Mosis, nenemien nae misa ni Stivin. Ma ladal xati e langguri ba misoh pe met Kaonsel.

¹³Di, laleh rut moletin xil tangan ti liluvos ni hisen. Xil labitene labit, “Vehakut, moletin ak di misepin misa ba ni Nim Eo nar e ba ni Rae xil na Mosis mun. ¹⁴Xamem malong xi biteni xa Iesu ak tahal Nasaret ihu len Nim Eo na Hi e ti ihiles sexien xil vus xa Mosis tesa ni teme mi avu nar xil.” ¹⁵Moletin xil vus xa ladotan e Kaonsel lalemah xat Stivin e lapusi xa valnaon di minehin nggoni valnao masxaxa tei.

Stivin Misetu Mi Kaonsel na Siu Xil

7 ¹Di, Vatixar na pris xil misis Stivin bit, “?Midep? ?Sepinien xil ak be reitin?”

²Stivin bit rilomun ni mi xil bitene, “!Tata xil e tua navan xil, muteong ni nou! Tetiamu ni ngan xa avu nar Ebrahim teha tate Heran, Hi te miehien testal mini e Mesopotemia ³e tehiteni mini tehit, ‘Umea reling ut sam itel vatimol nam xil e uhe ut tei xa inou nipisen ni minuk.’ ⁴Ma xi tehe reling ut san e tan na mol-Kaltia xil e teha tete Heran. E dutou ni ngan xa tamen temat, Hi tesila mei tete kantri ak xa xamim, Siu xil, mudi en taxeak. ⁵Hi tenasa ti tan ak mini. Reitin, tenasa ti mavulut tan mini xa vahit vahe nan xati. E mi vatimol nan xil xa listal itutou ni, Hi tehit xati xa isa ni mi xil ihe nae. Hi tepol ni hitxatien ak mi Ebrahim melele xa horamue nan tehe tovuol tamu. ⁶Ngan ak tehe naha xa Hi tehiteni mini tehit, ‘Vatimol nam xil ha liti ut sav tei. Lihe slev xil na moletin xil te rute ak, e xil ti lisak purun xil huraam ihe handred hat (400). ⁷Itutou ni, inou, nisa longpangasien mi ngan xil xa moletin nam xil di latepol mi xil. Di, vatimol nam xil limea ra rute ak litiomun mei limot minou inggak.’ ⁸Di, Hi tesa sexien te vexaho mi Ebrahim xa pisen ni xa xi del vatimol nan xil labe na Hi. E melele xa latepes Aesak, melengien be tol e he sav (8) tang mei tetavi, Ebrahim tepol ni tehe vexaho. E Aesak mun tepol ni Siakop tehe vexaho, e Siakop tepol ni natnali xil xa latehe lu e le (12) latehe vexaho, ngan xil ak latehe avu nar xil.

⁹“Horamue na Siakop xil iexil teat Siosepe xa tehe tua nae, ma latepos ni teha tehe slev tei e Isip. E Hi teti mini ¹⁰e tehur rati ra longpangasien

⁹ 6:9 Lakesi ni mak, vengan xa moletin xil xa di lamei vituei en, tetiamu, xil latehe slev xa lateti e he mosav xil. E dutou, ba lameluv.

xil xa teti xati. Misak ni melele xa Siosep tesoh pe met suv toto tahal Isip, Hi tesa metisouen mini e misak ni suv toto ak temaal ven e tepol ni Siosep telaxat kantri nan tetel holesok xil vus xa teti e nim man. ¹¹Di, mae kekaten tei xa eilep tekapis e Isip tetel Kenan, e tesak ni longpangasien holu teti xat moletin xil ngasen. Avu nar xil tetiamu mun latehe terume ni anien. ¹²E melele xa Siakop telongeong ni xa anien teti e Isip, xi tesa horamue nan xil xa labe avu nar xil lateha. Ngan ak tehe kakaoen kokot nae xa latehe Isip. ¹³Di, e valu nen xa latetilomun lateha, Siosep tehit kil xi mi tunali xil, ma suv toto tahal Isip tele kil kuh vatimol xil na Siosep sung. ¹⁴Ma Siosep tesa sepinien tehur pileien teha mi tamen Siakop tehiteni mini tetel vatimol nan xil vus xa latehe hanutap tol e lim e le tei mun (75) tangan limei liti visali e Isip. ¹⁵Misak ni Siakop tehe Isip. E e rute ak, xi tetel horamue nan xil lateti ba tetuxoh melele xa latelel. ¹⁶E tiei nae xil latleh rilomun ni tehe Sekem, e inggak, latetihin xil lateti von tehinen xa Ebrahim texal rati ra horamue xil na Hamor ni mani tei nan.⁷

¹⁷“Huram holu mei mitavi. E melele xa Hi tepusi temal xa hitxatien xa tepol xati tetel Ebrahim sangas vastal vahe reitin, Siu xil xa lateti Isip mei latehe holu. ¹⁸Di, suv toto sav tei xa tenanem xat kuh ti mun his Siosep mei telaxat kantri tahal Isip. ¹⁹Xi teluvos Siu xil xa latehe avu nar xil e tesak purun xil. Xi tepol ni te xeih mi xil tangan liling tuvava nae xil liti hale tangan lilel. ²⁰Mosis, latepesi e melele ak vari. Hi tepusi xa valnaon tehos xa tehos, e tamen xal ninen lutelaxati e tim aveti tol. ²¹E melele xa lutelingi tete hale, atuli na suv toto tahal Isip tekameti e telaxati texoni horamue nan xati. ²²Misak ni latepispisi mini ni kilakilen xil vus tahal Isip, e xi mei tehe eilep tei usil sepinien nan e e polien nan.

²³“Melele xa huram nan tetuxoh hanutap lu (40), tepol ni nenemien nan tehit wakil ti moletin xil xati nan, mol-Isrel xil, ma teha tesao e xil. ²⁴E melele tepus ngan Isip tei di tehas purun ngan Isrel tei, teha tangan vatutou ni. Ma, xi sung tesa xolesi mi ngan Isip ak e tehasi temat. ²⁵Xi tenemi tehit mol-Isrel xil xa latehe vatimol xati nan lile kila xa Hi iteh meulien e xil ixo hen, e xil latnale kil ti. ²⁶E melengien sav nen, xi tepus ngan Isrel lu di luteti xalu, ma xi teha tangan valing tomat rilomun vatel xalu. Tehiteni mi xalu tehit, ‘Tiramue xalu, muliteong. Xamil vus mube ngan Isrel tang. ?Veneh ma di mututu?’

²⁷E ngan xa di tehas purun tunali tetivin rat Mosis tehe rin e tesisi te xeih tehiteni, ‘?Moletin visi milinguk mei obe vat namem tangan ti olepis xamem? ²⁸?Obit ovas inou mun vaxoni ngan taxa otehas vin ngan Isip nanganoh?’ ²⁹Melele xa Mosis telonge temak, telesae ra hal Isip e teha tete tan tahal Midian. E rute ak, tehur atou xa teling horamue nan lu.

r 7:16 Sen 23:1-20; 33:19; 49:29-33; 50:7-13,25-26; Sos 24:32

³⁰“Di, haram hanutap lu (40) mun mei mitavi, e masxaxa tei mei testal mi Mosis texo upang xa tepili e holiei tei e rute tei xa be uruvuol, sangas ni Vathu Senae. ³¹Melele xa Mosis tepusi, temesep pupu e telis tehe sangas ni tangan vale kuhi. E melele xa temei sangas, telong rae na Hi Suv xa tesepin mini tehit, ³²‘Inou nabe Hi na avu nam xil, nabe Hi na Ebrahim, Hi na Aesak, e Hi na Siekop.’ Melele xa telonge temak, Mosis temalili pupu e ulin tekan vaketeh. ³³Hi Suv tehiteni mini tehite, ‘Sil rat sandel nam vengam xa rute xa di osoh en be ut eo. ³⁴Inou napus vuol ni longpangasien xil na moletin navan xil xa lateti e hal Isip, e nalong tangan nae. Misak ni namei etan tangan niteh meulien e xil. Amei, inou nisilak utilomun uhe Isip.’

³⁵“Mosis tak tehe ngan xa mol-Isrel xil latesin ni melele xa latesisi latehit, ‘?Visi xa milinguk obe vat namem tangan ti olepis xamem?’ Texo sepinien na masxaxa xa testal mini texo upang xa pili e holiei tei, Hi tesil Mosis tangan ha ilaxat mol-Isrel xil e isak ni vexil imase. ³⁶Melele xa xi teleh rat moletin xil ra hal Isip, tepol ni sexien xil xa tellep e Isip, e Tas Tepili, e e uruvuol xa lateti en haram hanutap lu (40). ³⁷Mosis nen tak tehiteni mi mol-Isrel xil tehite, ‘Hi isa provet tei imei mi xamim ixoni ngan taxa xi tesa nou natemei. Provet ak istal ixo tei e xamim.’ ³⁸Mosis ak be ngan taxa teti mi mol-Isrel xil melele xa lateti uruvuol. Xi teti mi avu nar xil tetiamu, melele xa masxaxa tei tesepin tetela e Vathu Senae. Xi tehur sepinien te meulien texo Hi e tesa ni mi xir.

³⁹“E avu nar xil latnalong xat ti sepinien na Mosis. Xil latesin ni e latepol ni nenemien nae latehit litalomun lihe Isip. ⁴⁰Ma latehiteni mi Eron latehit, ‘Pol ni hi sav xil ihe namem tangan ti litiamu ni xamem, vengam xa matakil ti naha xa nggul Mosis xa teleh rat xamem ra hal Isip.’ ⁴¹Ma e melele nen ak, latepol ni hi tei xa tehur nanao na buluk. Di, latemot mini e latehas vongoro tei tehe sanien nae mini. Di, latepol ni anien tei xa eilep e langga vin xil ni ve nanao xa xil tang latepol xati ni he. ⁴²Ma Hi tekavitou ni xil e temae ni xil latemot mi hitu xil. Ngan ak nggoni ngan taxa Hi tehit usili e Vanuvei nan texo provet xil tehit, ‘?Mol-Isrel xil, tetep, melele xa muti e uruvuol haram hanutap lu (40), mutehas vongoro xil tangan vahe sanien namim minou?

⁴³E-e. E mutemea sung, mutepo xat nim tavolin na hi Molek, e muteleh xat hi Revan xa nggur nanao na hitu xil.

Xalu lutehe nanao xa mutepol ni tangan ti mumot mi xalu.

Misak ni, inou nisil rerat xamim muha muhe slev xil e rute xil xa ha ili hal Babilon.’”^s

⁴⁴Stivin biteni mun mi xil bit, “Avu nar xil latemot mi Hi e nim tavolin nan melele xa lateti tamu e uruvuol. Nim tavolin ak, latepol ni tehusil ngan xa Hi

^s 7:43 Amo 5:25-27

tehiteni e tepisen ni mi Mosis. ⁴⁵Dutou ni, moletin xil ak lasa ni mi avu nar xil, e xil latepo xat nim tavolin ak melele xa latehusil Sosua ba latehur rat tan na moletin xil xa Hi tehol rerat xil. Ma nim tavolin ak tetak teta tetuxoh melele xa Deved mei tehe suv toto. ⁴⁶Hi temaal ve Deved, ma Deved misisi tangan vamaen ni vapet kuh nim tova vahe na Hi xa be Hi na Siekop. E Hi tamaen ni ti. ⁴⁷E tehe Solomon sung iaxa tehil nim man. ⁴⁸E Hi te ut nesao misakras vate nim xa moletin tang pol ni. Nggoni ngan xa provet Aesea tehiteni tehit,

⁴⁹ ‘Hi suv biteni bit, “Ut nesao be hor te xeihen navan
e ut etan be ut xa di naling leok di en.

?Hisit nim eah iaxa mukila muhili ihe mavan?

Musakras muvil nim tova xa vapin tangan mei nangel en.

⁵⁰ Holesok xil ngasen xa di ut nesao e ut etan,
inou tang napol ni.”^t ”

⁵¹Stivin biteni mun mi xil bitene, “!Vatimum nggeih tova tang! Vurangemim bon ni sepinien na Hi, e vehakut di mupol nggoni ngan xil xa latakil ti Hi! Munggoni avu namim xil tang. !Vehakut di musin polien xil na Ninin Eo!
⁵²Provet xil ngasen, avu namim xil latesak purun xil. Tetiamu, latehas eloheoh xil xa di latehiteni xa Ngan xa Momal xa Hi tehosei imei. E taxeak, xamim vari tang iaxa musa rati be he ngan xil xa latehasi temat, ma xamim vari tang mutehasi. ⁵³!Xamim iaxa muthur xat Rae eo na Hi xa masxaxa xil latehuri teme mi avu namim xil, e xamim mutalong xati ti!”

Langgov Vin Stivin

⁵⁴Melele xa vat xil te Kaonsel lalong sepinien na Stivin, iexil mikat pupu e mete pili xati. ⁵⁵E Ninin Eo mei polu e Stivin, misak ni miketeh momal be ut nesao. Melele xa miketeh, pus miehen na Hi e pus Iesu di misoh de rin metu. ⁵⁶Ma xi biteni mi xil bit, “?Mupusi? !Napus tilang hat masel e Nat Hi di misoh de rin metu na Hi!”

⁵⁷Melele xa vat xil te Kaonsel lalonge mak, laki xol vurange. Di, xil vus lakei nggeih e laloh laba ni. ⁵⁸Di, langguri be hale ra taon, e ba di langgove. E xil xa lasep sisili e langgov kokot ni, latling kot nae xil teti he horam maxoe tei xa hisen Sol. ⁵⁹E melele xa xil di langgov Stivin, xi miki ba ni Suv bit, “!Suv Iesu, uhur ninin navan ihat visaluk!” ⁶⁰Di, mitingeiril etan e miki nggeih bit, “!Suv, onanem xat ti tesaen nae xa di lapol ni xiak!” Biteni mak, di, mat.

8 ¹E moletin tei da tak, hisen Sol. Xi memaal xa labas vin Stivin mak.

Sol Misak Purun Vanut Moletin Xil xa Laneket e Iesu

E melele ak vari, sakpurunien tei xa eilep mistal ba xat ngan xil te sias tahal Serusalem. Lasak ni holu e xil lalesae ba ladi e rute sav xil e

^t 7:50 Aes 66:1-2

provins tahal Sudea e Sameria. E eloheoh xil na Iesu latnalesae ti, ladi kat ladit Serusalem. ²E melele xa Stivin mat, rut moletin xa neketen nae nggeih e Hi laba lapo tiei nan e ba ladihin ni. Xil ladang nggeih ve maten nan.

³E Sol, di misak purun ngan xil xa laneket tengen vahu len Sias na Iesu Kristo. Xi mikakao e nim xil ngasen, e midal xat tiramue e atou xil xa laneket e Iesu, di miso xil labe nim te xeih.

Pilip Misetu mi Mol-Sameria Xil Usil Iesu

⁴Moletin na Iesu xil xa latlesae ra hal Serusalem, labe ut xil ngasen, ba di latsetu ni longeongen hos usil Iesu mi moletin xil. ⁵Tei e xil xa hisen Pilip be taon tei xa eilep tahal Sameria e di misetu mi moletin xil te rute ak xa Iesu be Kristo xa Hi tehiti xati tehiti imei. ⁶E melele xa moletin xil lalong sepinien nan e lapus holesok xil xa tellep xa di tepol ni, xil vus lalong kuh naha xa xi biteni. ⁷Latepus temat xil lathe reling moletin xil hao tetel tangen xil xa te xeih. E holu xa rut tenbe xil temat mu latsakras lakakao, xil vus mei latlonge tehos. ⁸Misak ni, moletin xil vus e rute ak labesi pupu ni xil.

⁹Moletin tei de rute ak, hisen Saemon. Xi di tepol ni moletin xil tahal Sameria latmesep ve vongou xil xa di tepol ni. Xi di po xi bit be eilep tei. ¹⁰Ma moletin xil vus te rute ak, ngan xil xa latellep e movotei xil mun, di lateong ni e labiteni labit, “Xi be hi tei xa lakesi ni ‘Ngan xa Nggeih’ xa bemei e ut etan.” ¹¹Xil di latehusili nousav vengan xa holesok xil xa dit tepol ni tesak ni xil latmesep ven. ¹²E melele xa moletin xil lalong sepinien na Pilip usil sexien xa Hi mei ihe Suv Toto e meulien nae e usil Iesu xa be Kristo na Hi, moletin xil ak laneket en. Tiramue xil e atou xil hao lamei e lamae ni tengen Pilip iterir ni xil e oei. ¹³Saemon mun mike reitin e sepinien na Pilip e mae ni derir ni e oei. E dutou ni ngan ak, xi nggusil xat Pilip e di mesep pupu ve merikel e holesok sav xil xa tellep xa di pol ni.

¹⁴Longeongen usil naha xa mistal e Sameria duxoh eloheoh xil na Iesu e Serusalem. Lalonge xa mol-Sameria xil lake reitin e sepinien na Hi, ma lasil Pita xal Sion lube visal xil. ¹⁵Melele xa ba lustal, lusi ve ngan xil xa laneket tengen mei lapolu ni Ninin Eo ¹⁶vengan xa mei tenapolu ti mu e tova xil. Pilip teterir ni xil e oei e his Iesu kestang. ¹⁷Ma melele xa Pita xal Sion luling he xalu e xil, Ninin Eo mei polu e xil.

¹⁸Melele xa luduxol xat xil, Saemon pusi xa Hi misa Ninin Eo mi xil. Misak ni xi misa vatu mi xalu ¹⁹e misi xalu bit, “Lusa xeihen xai minou tengen moletin eah xa inou nituxol xati, xi mun ikila ihur Ninin Eo.” ²⁰E Pita misep pangasi bit, “!Xouk uhe Von Upang itel xat vatu nam ve nenemien nam xa obit okila oxal rat sanien na Hi ni vatu! ²¹Xouk otapin ti omos e polien namem vengan meulien nam tamal ti e pe met Hi.

²²Itiamu, uhiles nenemien tesa nam, e usis mi Hi Suv tangan xa, xosxa imae ni, ma iketeh ihos rilomun ni xouk ve nenemien tesa nam xa obit opol ni. ²³Taxeak, uhiles meulien nam wengan napusi xa di onem misa ni xeihen xil namem e tesaen di bar xolok.”

²⁴Melele xa Saemon milonge mak, dak kes Pita xal Sion bitene, “Lusis li mi Suv ve nou tangan xa holesok xil xa di musepin ni naxui nou.”

²⁵Dutou ni ngan ak, Pita xal Sion lubit usil kakaoen nalu tetel xat Iesu Kristo e lusetu ni sepinien usil Suv Iesu mi moletin xil. Di, ludilomun lube Serusalem. E suse nalu, lusetu ni longeongen hos e metimal xil hao tahal Sameria.

Pilip Derir ni Eilep Tei tahal Itiopia e Oei

²⁶Di, masxaxa tei na Hi biteni mi Pilip bit, “Uvue xatuk e ukakao uhe saot e uhusil suse xa nggo Serusalem ba be Kasa. Suse ak ba nggur xoteh uruvuol.” ²⁷Ma Pilip bue xat xi, di, ba. E melele nen ak, eilep tei tahal Itiopia di nggusil suse ak. Xi be moletin xa di milaxat watu xil na Kandis, suv toto tahal Itiopia xa be atou. Moletin ak tehe Serusalem tangan vamot mi Hi ²⁸e di minggusil suse nan tangan vatilomun vahe ut san. Xi nggo kat tei xa hos milihi, e melele xa ba, di buli rut sepinien e Vanuvei na Hi xa provet Aesea tetisi. ²⁹Ma Ninin Eo biteni mi Pilip bitene, “Uha, ha ute sangas visal moletin xa de kat iaxor.” ³⁰Misak ni Pilip miloh ba e milonge xa moletin ak di buli sepinien xa provet Aesea tetisi. Ma misisi bit, “?Xouk okil koute te naha xa di obuli iaxai?”

³¹Eilep ak bit rilomun ni mini bit, “?Xosxa moletin ti nasep kil kuh minou, ma nikila itep?” Ma xi misis Pilip tangan vapeou vaha vatotan vatela e kat nan. Ma Pilip pol ni nggoni ngan xa xi biteni. ³²Sepinien xa de Vanuvei na Hi xa moletin ak di buli biteni mak bit:

“Moletin ak, nasi ti melele xa moletin xil litela ha lihasi imat,
ixoni sipsip tei xa ladela tangan lavasi vamat.

Xi navit ti neta melele xa lipol isa mini,
ixoni sulut sipsip tei xa tatangal ti melele xa lakot rerat hilin.

³³Xil lipol ni unounen mini.

E melele te lepisien, xil linahusil ti suse xa momal.

Moletin ihe tovuol xa ikila isep usil horamue nan xil,
wengan xa lihur xoteh meulien nan ra ut etan.”^u

³⁴Eilep ak misis Pilip bit, “?Hiteni minou, provet ak di misep usil visi vari xiak? ?Di misep usil xi mun tang, mu mosav tova?” ³⁵Di, Pilip misep kil koute te sepinien ak mini e misetu mun ni longeongen hos usil Iesu

^u 8:33 Aes 53:7-8

mini. Ma eilep ak mike reitin en. ³⁶Melele xa di lunggusil suse luba, lumei e rute tei xa oei di en. Ma eilep ak biteni bit, “Oei xi tak. Xosxa onemi bos, ma ubaptaes ni nou li en.”

³⁷E Pilip bit rilomun ni mini bit, “Nakila niterir ni xouk en xosxa oneket nggo meulien tevi nam.”

Ma xi biteni bit, “Inou nake reitin xa Iesu Kristo be Nat Hi.”

³⁸Ma eilep ak misemae ni moletin nan tangan vapol ni kat nan vangeli. Di, xal Pilip, lube tan e oei, e Pilip derir ni en. ³⁹E melele xa lumea lukakao reling oei, vatakes, Ninin Eo na Hi mei nggur rat Pilip be rute sav. E eilep ak, xi tapus ti mun e nggusil suse nan ba del sien. ⁴⁰E Pilip mitemanin e pusi xa da ngamu e Asotas.^v E suse nan xi di misetu ni longeongen hos e taon xil ngasen vuma ... duxoh Sesaria.

Sol Bemei Mineket e Iesu

9 ¹E melele nen tak, Sol di misa sepinien xil xa nggeih bit ihas vuol ni moletin xil xa laneket e Iesu. Misak ni, be visal Vatixar na pris xil ²e misisi tangan vatis uvei xil xa vasep kil polien nan mi vat xil te nim te pispisien xil xa ladi e Damaskas. Ma xi misa uvei xil ak xa mae ni xa melele xa ikamet tiramue mu atou tei xa di laneket e Iesu, ikila ital xati e ihuri imei mun e Serusalem.

³Melele xa Sol di bemei sangas e taon tahal Damaskas, vatakes, miehien tei xa minehin pupu nggo ut nesao e mei mileluv xole, ⁴e xi mot be tan. Di, milong rae tei xa biteni mini bitene, “Sol! Sol! ?Veneh ma di osak purun nou del moletin navan xil mak?”

⁵E Sol biteni mini bit, “?Suv, xouk visi?”

E rae ak biteni mini bit, “Inou Iesu, ngan xa di osak purun ni. ⁶E umea e uhe taon xai tahal Damaskas. E rute ak iaxa lihit naha xa upol ni.”

⁷Moletin xil xa laba del xat Sol, lalong rae ak e latapus ti moletin. Uli mikan e ladit votei tang. ⁸Melele xa Sol mitamea ra tan e miketeh, misakras vapus neta tova. Ma xil lateli e hen e ladeli be Damaskas.

⁹Melengien tol Sol dat mak, taketeh ti, e bit naxanien ti e namu ti neta.

¹⁰E taon tahal Damaskas, moletin tei xa mineket da en, hisen Ananaeas. E Suv Iesu misepin mini nggo metuveen tei e biteni mini, bitene, “!Ananaeas!”

E xi bit rilomun ni bit, “Inou xiak Suv.”

¹¹Ma Suv biteni mini bit, “Uvue xatuk e uha uhusil suse xa lakesi ni ‘Suse xa Momal’. E tim sa Sudas, usis ves moletin tei tahal Tarsis, hisen Sol. Xi di misis. ¹²E metuveen tei, tepus moletin tei hisen Ananaeas xa bemei miling hen en tangan vaketeh rilomun.”

¹³Ananaeas bit rilomun ni mini bit, “Suv, moletin holu di lasep usil moletin ak ve holesok holu xa misa xa di pol ni mi moletin eo nam xil e

^v 8:40 Taon tahal Asotas be 20 kilomita ra ut xa Pilip pus eilep tahal Itiopia en.

Serusalem. ¹⁴E taxeak bemei inggak, e nggur xeihen nggo Vatixar na pris xil tangan mei ital xat moletin xil vus xa di lamot minuk.”

¹⁵E Suv biteni mini bit, “Ha pusi, vengang inou nabosei ngamu tangan ipol minou. Xi isep usil hisok mi ngan xil xa latave Siu ti, mi suv toto xil, e mi mol-Isrel xil mun. ¹⁶E inou iaxa nipisen hisit longpangasien xil mini xa ihuri ve hisok.”

¹⁷Ma Ananaeas ba, be nim xa Sol da en, miling hen en e biteni mini bit, “Tua Sol, Suv Iesu xa testal minuk e suse melele xa di omei inggak, xi vari iaxa misil nou. Xi misil nou namei tangan xouk okila uketeh rilomun e mei upolu ni Ninin Eo.” ¹⁸Vatakes, neta tei xa nggoni kahbe meseo mot reling meten, ma xi miketeh rilomun. Di, mitamea misoh, e Ananaeas derir ni e oei. ¹⁹E dutou ni ngan xa ngganien bus, ven mei nggeih rilomun.

Sol Misetu e Damaskas

Sol da melengien vahis mun e Damaskas del moletin xil xa laneket e Iesu. ²⁰Xi mika mal be nim te pispisien xil na Siu xil e di misetu xa Iesu be Nat Hi reitin.

²¹Xil vus xa lalong sepinien nan latemanin, ma di lasis xil mun tang labit, “?Tave xi ti iaxa di tehas vin moletin na Iesu xil e Serusalem? Malonge bemei inggak tangan vatal xat ngan xil xa langgusil Iesu e valeh xil lava mun visal vat xil na pris xil. ?Midep?”

²²E setutuen na Sol mei nggeih pilei sung e pisen ni momal xa Iesu iaxa be Kristo xa Hi tehosei tangan vamei. Misak ni Siu xil xa ladi Damaskas lasakras lavit rilomun ni sepinien tova vaha mini.

²³Melengien hao mei mitavi, rut Siu xil mei ladotan vituei e lapol ni lingxatien tei tangan lihas vin Sol. ²⁴Melengien e vongien xil ngasen di laketeh xol puiteh te vloh xa mikapis xol taon ak tangan livulu xati e lihas vini. E Sol milongeong ni lingxatien nae. ²⁵Ma e vongien tei, ngan xil xa laneket nggo pispisien nan lasoson ni de ateli tei xa eilep xa lasar xat ao da en. Di, laso kital ni nggo mesekital tei xa de nesao e seri vloh ak, e lasae ni be tan. Ma di, Sol milesae ba.

Sol Dilomun Be Serusalem

²⁶Sol dilomun be Serusalem e misak tangan mei vamos e ngan xil xa laneket e Iesu. E xil vus uli mikan ni e latake reitin ti en melele xa xi biteni mi xil bit be tei e xil. ²⁷Di, tei e xil xa laneket, hisen Banabas, bemei mini e dela lube visal eloheoh xil na Iesu. Xi dap lenen kuhi sung mi xil xa Sol tepus Suv e suse e Suv tesebin mini tetep. Xi biteni mun mi xil bit Sol ulin takan ti melele xa di tesetu usil his Iesu e Damaskas. ²⁸Ma lamae ni Sol mos e xil, e di mikapis e ut xil ngasen e Serusalem e di misetu usil his Iesu del xeihen. ²⁹Di misepin mun e di mingor del Siu xil

xa lasepin ni sepinien tahal Kris. Ma xil di lalang ves suse tova xa lihasi imat ixo en. ³⁰E melele xa ngan xil xa laneket lalongeong ni, xil ladela labe taon tahal Sesaria. E rute ak, xil lasa ni nggo tuturil tei be taon tahal Tarsis.

³¹Dutou ni ngan ak, ngan xil te Sias na Iesu xa ladi e provins xil tahal Sudea, Kaleli e Sameria, xil di lateti e tomat. Xil mei latemerere kuhi ni Suv Iesu, e tetel tutouen na Ninin Eo neketen nae teme tei xeih pilei sung e moletin holu mei latemos e xil.

Pita Pol ni Le Aeneas Bos Rilomun

³²Pita, xa be tei e eloheoh xil na Iesu, di tekapis e ut xil ngasen. E vatei, ba misao ni moletin eo xil na Hi xa ladi e taon tahal Lita. ³³E rute ak, xi pus moletin tei xa rin tei mat, hisen Aeneas. Huram tol e he sav (8) xi takakao ti, e pat dat rong mak tang. ³⁴Pita biteni mini bit, "Aeneas, Iesu Kristo pol ni vem bos ngamu. !Utamea, e uvulun suon mam!" Vatakes, Aeneas mitamea misoh. ³⁵Moletin xil vus xa ladi e taon tahal Lita e rute sav mun xa ladi ut xa lakesi ni 'Saron' lapusi mak, ma labiles meulien nae e laneket e Suv Iesu.

Pita Dal Rat Dorkas ra Maten

³⁶E taon tahal Sopa, atou tei da en xa neketen nan nggeih e Iesu, hisen Tapita. E moletin xil lakesi ni ni hisen tei mun xa nggo sepinien tahal Kris labit 'Dorkas'.^w E meulien nan, xi di tepol ni polien tehos xil e di tetutou ni moletin xil xa lathe hoeo. ³⁷E melele xa Pita da tamu e rute ak, atou ak nggur meseien tei, ma mat. Atou xil lakas moten tiei nan memese tengen ha lithin ni. Di, lalingi pat e von toen xa be lu nen nesao e nim man. ³⁸Taon ak tahal Sopa tave sotin ti ra taon tahal Lita. Ma melele xa moletin xil tahal Sopa xa laneket lalongeong ni xa Pita dat Lita, lasil tiramue lu lube visali del xat sepinien ak, "Utamanon li, umei visal xamem!" ³⁹Ma vatakes, Pita bue xat xi e be xatel latoba. Melele xa latduxoh tim sa Dorkas, xil ladela be von paten nan xa de nesao e nim man. E rute ak, tunau xil xa lateti mei lakereli xol Pita. Di ladang e lapien ni mini eising xil xa Dorkas tetili melele xa temeul tamu teta. ⁴⁰Ma di, Pita misil rerat xil lastal ra von toen ak e mitingeil misis. Di, biles pus tiei na Dorkas e biteni bit, "Tapita, tamea!" Ma xi miketeh. E melele xa pus Pita, mitamea dotan. ⁴¹Di, Pita dal xat hen e dal rati misoh. Bus, mikes ngan xil xa laneket del tunau xil e pisen Dorkas mi xil xa meul rilomun. ⁴²Longeongen usili ba mikapis e ut xil ngasen e Sopa. Ma moletin holu mei laneket e Suv Iesu. ⁴³Pita de visal xil e

^w 9:36 Siu holu latehur his lu mu tol, tei e Arameak na Siu xil, e tei mun e sepinien Krik tahal Kris. Hisen Tapita e Dorkas, koute teni be 'deer'.

Sopa nousav vuteili e e nim ma Saemon xa di pol ni holesok xil ni hilbe buluk.^x

Hi Pisen ni mi Pita xa Moletin Xil Ngasen Lakila Laneket

10 ¹E taon tahal Sesaria, moletin tei da en xa hisen Konilias. Xi be ngan Rom tei e be vat na vanut moletin te vaeen tei xa lakes xil ni ‘Ngan Itali xil’. ²Xi be moletin xa merere pupu ni Hi na Siu xil e di mot mini, xi del ngan xil xati xa ladi nim man. Vehakut, di misa tutouen mi Siu xil xa labe hoeo e di misis mi Hi. ³Vatei, e 3 klok mahis, Konilias di misis e tim san e pus neta tei xa nggoni metuveen tei. E metuveen ak, pus masxaxa tei na Hi bemei sangas visali e mikesi bit, “!Konilias!”

⁴Melele xa pusi mak, Konilias mitemanin e ulin mikan pupu e bit rilomun ni mini bit, “Io, Suv. ?Okes nou?”

Masxaxa biteni mini bitene, “Hi milong sisen xil nam e mipus kil tutouen xa di osa ni ba ni hoeo xil. Holesok xil xa di opol ni nggoni sanien eo tei mi Hi xa von mikon. ⁵Taxeak, usil moletin ti tangan lihe taon tahal Sopa e ha lipus moletin tei, hisen Saemon Pita, tangan imei tim sam. ⁶Xi de visal moletin tei xa di pol ni holesok xil ni hilbe buluk. Moletin ak, hisen Saemon e nim man de sangas ni tas.” ⁷Di, masxaxa ak be relingi ba. Ma Konilias mikes viton slev lu te polien nan del moletin te vaeen tei xa be mereketeh nan xa xi mun di mot mi Hi. ⁸Di, mitumul usil holesok xil xa testal mini, e di, misil xatel latobe Sopa.

⁹E visuvong nen, sangas vahe piniae, moletin xatel ak latemei sangas ni Sopa. E melele nen tak, Pita be nesao e nim xa da en tangan vasis. ¹⁰Mae nggati bit vanien, e anien tameses ti mu. E melele xa di lasak mese ni, pus neta tei nggoni metuveen tei. ¹¹E metuveen ak mipus tilang hat masel e neta tei nggoni kaliko xa mahulong lasae ni nggo kusute xatel nggo ut nesao bemei e ut etan. ¹²E vangit kaliko ak, xi pus hisit vongoro sav xil, tetal xil, e tuman xil. ¹³Melele xa pusi mak, milong rae tei misepin mini bitene, “!Pita tamea! Uhas ti xil e ua ni.”

¹⁴E Pita misepin rilomun mini bit, “!Suv, nasakras napol ni vamak! E meulien navan, natakak pis ti mu holesok xil xa latamese ti mu xa tavos ti pe metom tangan lava ni.”^y

¹⁵Rae ak misepin rilomun mini bitene, “!Naha xa Hi bit ‘xi memese ngamu’, xouk onanemi ti onahit ‘xi tavos ti pe meten!’” ¹⁶Sexien ak mistal mi Pita be vatol. Di, kaliko ak dilomun be ut nesao.

¹⁷Melele xa Pita di tamu minem usil koute te neta xa pusi, moletin xatel xa Konilias tesil xatel, latkamet nim ma Saemon e latemei latesoh sangas visal puiteh te vioh. ¹⁸Latsisi latbitene, “?Moletin tova dat inggak xai xa hisen Saemon Pita?”

^x 9:43 leather ^y 10:14 Rae na Siu xil misep xol xil tangan linaxa ti holesok xil xa mak.

¹⁹Melele xa Pita di tamu minem usil naha xa tepusi, Ninin Eo mei misepin mini bitene, “Moletin tol mei latdi tak e di latallang ni xouk. ²⁰Uhe tan, uvue xatuk tangan uha ihe xamitel. Onanem pupu ti tangan ove xamitel vengan xa inou iaxa nasil xatel latemei.” ²¹Ma Pita be tan e biteni mi moletin xatel ak bitene, “Inou iaxa di mutlang ni nou. ?Mutomei ve neta tova?”

²²Xatel latbiteni mini latbitene, “Vat namatel, Konilias, iaxa misil xamitel matomei. Xi be moletin tei xa bos, di mot mi Hi, e Siu xil vus di lamerere pupu ni. Masxaxa eo tei na Hi mei testal mini e tehiteni mini iaxa misil xamitel matomei ve xouk tangan umei tim san. Masxaxa ak bit bos xa xi ilong kil ti naha xa xouk ukila uhiteni mini.” ²³Ma Pita misis xatel tangan latipat tamu itela e nim ak.

Di, e makoe nen, Pita del rut moletin ngan xil tahal Sopa xa laneket, labue xat xil. Di, be xil laba. ²⁴E visuvong nen, e mahis, laduxoh Sesaria. E rute ak, Konilias di datil Pita, xi del rut vatimol nan e rut timue tehos nan xil xa tesilasil ni xil tangan limei. ²⁵Melele xa Pita be nim, Konilias mei miteingeiril pe meten e mot mini. ²⁶E Pita dal rati e bitene, “!Mea soh! !Inou mun nabe moletin tang!” ²⁷Ma Konilias mea e Pita dit misepin mini. Lukakao lube nim e Pita pusi xa ut pol ni moletin xil ngamu. ²⁸Ma misepin mi xil bitene, “Xamim vus mukil kuhi xa Rae na Siu xil bit masakras mavituei vatel ngan xil xa latave Siu ti. E Hi pisen ni tuei minou xa ninanemi ti ninahit moletin tova misa mu tamese ti. ²⁹Misak ni melele xa osa sepinien bit nime, namaen ni e namei komanon. ?Ma nasis xamim, veneh ma musilasil ve nou?”

³⁰Konilias biteni mini bitene, “Melengien tol mitavi, e 3 klok mahis nggoni ngan taxa radi xiak, inou di natesis e nim mavan. varinga tang, napas moletin tei mising ni eising tei xa minehin pupu, mei misoh momal pe metok. ³¹Xi biteni minou bitene, ‘Konilias, Hi mikil xouk, di milong sisen xil nam e mipus kil tutouen xa di osa ni ba ni hoeo xil. ³²Taxeak, usil moletin ti xil lihe Sopa tangan ha lipus moletin tei, hisen Saemon Pita. Xi de visal moletin tei xa di pol ni holesok xil ni hilbe buluk. Moletin ak, hisen Saemon, e nim man de sangas ni tas.’ ³³Mak iaxa natemanon nasa sepinien bat ve xouk, ma bos mak mu xa omei. Xamem vus mei madi vituei inggak pe met Hi Suv tangan xa muteong ni naha xa Hi misa ni minuk tangan xa mei uhiteni mi xamem.”

³⁴Di, Pita biteni mi xil bitene, “Taxeak, nakil kuhi sung mak xa Hi taketeh ti vahos ni Siu xil kestang, e pe meten, moletin xil vus lapin tang. ³⁵Hi memaal ve ngan xil vus xa di lamot mini e di lapol momal, tave ti neta xa xil labe moletin te rute sav xil. ³⁶Xamim mukil sepinien xa Hi misa ni tuei bat mi moletin xil tahal Isrel xa bit longeongen hos te tomat bemei mi xir nggo Iesu Kristo. !Xi be Suv na moletin xil ngasen! ³⁷Mukila ngamu sexien xil xa mistal mikapis e provins tahal Sudea.

Testal kokot texo provins tahal Kaleli tetouto ni melele xa Sion di tesetu usil teriren xa di tepol ni mi moletin xil. ³⁸Mukila ngamu usil Iesu tahal Nasaret iaxa Hi tepol ni tepolu ni Ninin Eo e tesa xeihen mini. Iesu tekapis ut ngasen e di tepol ni polien hos xil e di tetal rerat ngan xil vus xa xeihen na Temat teti xat xil mei vexil temase. Xi tekila tepol ni temak vengang xa Hi teti visali. ³⁹Xamem iaxa matepus holesok xil xa di tepol ni e taon tahal Serusalem e rute sav mun e von ne Siu xil. Di, lasak ni temat melele xa lateti xati tete eivave. ⁴⁰Melengien tol tetavi, Hi tesak ni temea rilomun ra maten e mei testal ⁴¹mi rut xamem tang xa Hi tehosei xamem ngamu. Reitin mak, dutou ni melele xa temea rilomun ra maten, xamem mateanien e matemun tetela. ⁴²Iesu tesep mae ni xamem tengan ti musetu ni longeongen hos nan mi moletin xil e musep kila xa xi iaxa ben ngan xa Hi tehosei tengan ti ilepis moletin xil ngasen, ngan xil xa lameul ladi e ngan xil xa lalel tuei. ⁴³Provet xil vus di latesepin usili latehit moletin xil vus xa laneket e hisen, Hi iketeh ihos rilomun ni xil.

Ninin Eo Mei Polu e Moletin Xil xa Latave Siu Ti

⁴⁴Melele xa Pita di tamu misepin, Ninin Eo bemei polu e meulien na ngan xil xa di lataeong ni sepinien nan. ⁴⁵Siu xil xa laneket ngamu xa tehe xil mi Pita latexo Sopa latemei, xil lamesep pupu vengang xa lapusi xa Hi misa Ninin Eo nan mei polu e ngan xil mun xa latave Siu ti. ⁴⁶Lalong kila vengang xa lalong xil lasepin nggo sepinien xil xa tave nae xati ti e di lakikei lapet rat his Hi. Di, Pita biteni mi xil bitene, ⁴⁷“!Ngan xil ak, lapolu ngamu ni Ninin Eo nggoni xir tang! ?Mak, ma visi tova mikila vasikoe xol xir tengan rinaterir ni xil ti e oei?” ⁴⁸Misak ni, Pita misemae tengan literir ni xil e oei e his Iesu Kristo. Di, xil lasis Pita xatel tengan latiti melengien ihe vahis mun itel xil.

Ngan Xil te Sias tahal Serusalem Lalongeong ni xa Ngan Xil xa Latave Siu Ti Mei Laneket

11 ¹Longeongen xa bit ngan xil xa latave Siu ti lake reitin e sepinien na Hi mei duxoh eloheoh xil na Iesu del Siu sav xil mun xa laneket e ladi Sudea. ²E melele xa Pita bemei e Serusalem, rut Siu xil lamei lasepin nggeih xati vengang xa lanemi labit ngan xil vus xa laneket e Iesu lihusil xat sexien te vexaho. ³Xil labiteni mi Pita labitene, “Xouk oteha otete tim sa ngan xil xa latave Siu ti e di oteanien mun tetel xil.”^z

⁴Ma Pita misep kila mi xil usil holesok xil xa testal kokot mini ba duxoh hoxalite teni bitene, ⁵“Melele xa natete taon tahal Sopa, di natesis. E melele xa di tamu natesis, natepus metuveen tei. E metuveen ak, tilang

^z 11:3 Mol-Siu xil labit melele xa lavituei del ngan xil xa latave Siu ti, ngan ak ipol ni limei lihe muis pe met Hi.

hat temasel e kaliko tei xa mahulong latesae ni texo kusute xatel texo ut nesao temei temal vari ni nou. ⁶Natetei hiraek teha en, natepus hisit vongoro ngasen, ngan xil xa lamah e ngan xil xa labe vuran, tetal xil e tuman xil mun. ⁷Di, natelong rae tei temei ni nou tehitene, ‘!Pita tamea! !Uhas ti xil e ua ni!’

⁸“E inou natehitene, ‘!Suv, nasakras napol vamak! E meulien navan, inou natarak pis ti mu holesok xil xa latamese ti mu xa tavos ti pe metom tangan lava ni.’

⁹“Di, rae texo ut nesao tesepin rilomun minou tehitene, ‘Naha xa Hi bit memese ngamu, xouk onanem ni ti onahit tavos ti.’ ¹⁰Sexien ak testal minou tehe vatol, di, kaliko ak tetilomun tehe ut nesao.

¹¹varinga tang, moletin tol xa latosil xatel latexo Sesaria latemei latesoh momal visal nim xa nateta en. ¹²E Ninin Eo tehiteni minou tangan nihusil xatel matiha, ninanem ti nasa ve xil. Di, moletin xil ak mun tahal Sopa xa labe tei e he sav (6) latehe xametel mateha matehe nim e tim sa moletin tei, hisen Konilias. ¹³Xi tehiteni mi xametel xa masxaxa tei mei testal mini. Masxaxa ak tesoh e tim san e tesa sepinien ak mini tehit, ‘Usil moletin ti xil lihe taon tahal Sopa tangan ha lipus moletin tei, hisen Saemon Pita. ¹⁴Moletin ak ihiteni minuk itel ngan xil vus xa ladi e tim sam usil suse xa muhur meulien hu en.’

¹⁵“E melele xa di tamu natesepin, Ninin Eo mei tepolu e meulien nae texoni ngan xa tepol kokot ni mi xir. ¹⁶Di, natenem rilomun ni naha xa Suv Iesu tehiteni mi xamem tehitene, ‘Sion teterir ni moletin xil ni oei, e xamim, literir ni xamim e Ninin Eo.’ ¹⁷?Misak ni xosxa Hi bit ngan xil ak lakila lihur sanien nan nggoni ngan taxa tesa ni mi xir melele xa rateling neketen nar e Iesu Kristo, ma inou nabe visi iaxa nakila nisikoe xol Hi?”

¹⁸Melele xa lalong Pita misepin mak, latasepin ti mun vari vasa. Di, lapet rat his Hi e labit, “Taxeak, Hi misah suse tangan moletin sav xil xa latave Siu ti likila mei lihiles meulien nae e lihur meulien hu.”

Longeongen Hos Bemei mi Moletin Xil tahal Antiok

¹⁹Melele xa sakpurunien temei te xeih e Serusalem, tetutou ni melele xa Siu xil latehov vin Stivin, rut ngan xil xa laneket e Iesu latetasil latehe rute sav xil. Rute latehe Ponisia, rute latehe aelan tahal Saepras e rute sav mun latehe taon tahal Antiok. E melele xa lateti e rute xil ak, di latesetu mi Siu xil kestang. ²⁰E rute e xil xa latehe ngan Saepras e ngan Saerin, melele xa latexo Serusalem latemei Antiok, xil di latsetu usil Suv Iesu mun mi ngan xil xa latave Siu ti. ²¹Xeihen na Suv di mi xil, e moletin holu labiles meulien nae e laling neketen nae e Suv Iesu.

²²E Serusalem, ngan xil te sias lalongeong ni xa ngan xil xa latave Siu ti mei di laneket. Mak, ma lasil Banabas be Antiok. ²³Melele xa Banabas ba duxoh Antiok, pusi xa tuxolxatien na Hi di mi xil e memaal ven. Di, misel

xat xil tangan lisoh ixeih e neketen nae e lihusil kuh Suv Iesu. ²⁴Banabas be moletin tei xa bos, neketen nan nggeih e Ninin Eo polu en. Mak, ma setuen nan misak ni moletin holu labiles meulien nae mei laneket e Suv Iesu.

²⁵Di, Banabas be taon tahal Tarsis tangan valang ves Sol. ²⁶Melele xa mikameti, dela lube Antiok. Huram tevi tei, luleh viton ngan xil te sias tahal Antiok e di lupispisi mi moletin holu. E rute ak vari, ngan xil xa laneket, latekes kokot ni xil ni 'Kristin'.^a

²⁷E melele nen ak, provet ngan xil te Sias tahal Serusalem lamei e Antiok. ²⁸Tei e xil xa hisen Akabas misoh e hilaep te moletin xil e xeihen na Ninin Eo mei polu en. Xi mike mese ni xa pangasien tei te mae kekaten imei ikapis e ut etan (ngan ak testal sung e melele xa Klodias tehe suv toto tahal Rom).^b ²⁹Kristin xil kekes e Antiok laling xati xa lisa ti sanien eah xa xi mikila ipol ni iha itutou ni tua nae xil xa ladi provins tahal Sudea. ³⁰Ma lapol ni, e lalingi e he Banabas xal Sol tangan ha lalsa ni mi elda xil te Sias tahal Serusalem.

Suv Toto Herot Pol ni Sakpurunien Ba Xat Kristin Xil

12 ¹E melele nen tak, Suv Toto Herot pol ni sakpurunien bemei xat ngan xil te sias tahal Serusalem. ²Misemae ni rut moletin nan xil te vaeen laba lada xoteh hurae Temis, xa tunali Sion. ³Melele taxa pusi xa Siu xil lamaal ve neta xa pol ni, ma misa sepinien tangan ha lital xat Pita mun. Xi pol ni mak momal e Melengien xil te Beret xa Is Tovuol En.^c ⁴Melele xa ladal xat Pita, langguri ba e lalingi e nim te xeih. E Herot misemae ni vanut moletin te vaeen hat tangan ti liketeh xole. Herot minemi bit itutou ni Anien te Tavien,^d ihuri imei pe met moletin xil, e ilepisi. ⁵E melele xa Pita da tamu e nim te xeih, ngan xil te sias tahal Serusalem di latangel ni ti sisen ven.

Pita Ven Mase Ra Nim te Xeih

⁶Diamu e melele xa Herot bit ihur Pita ha ilepisi, e vongien nen momal, Pita di pat e nim te xeih. Hen xalu labar xati ni sen e moletin

^a 11:26 Tetiamu, mosav xil latesep pepamen ni ngan xil xa laneket e Iesu e latekes xil ni 'Kristin', xa koute teni be 'moletin xa nggusil Kristo.' Xil lanemi labit Iesu tehe vatxeih tei xa tehur longpangasien ve sexien tesa nan. E melele xa ngan xil xa laneket latelong ni his ak, xil lamaal tang ven. ^b 11:28 Ngan ak tehe reitin, e AD 41-54 us tamus ti e anien mun tenapin ti. E melele nen ak, Sias tahal Antiok tetutou ni Kristin xil tahal Serusalem. ^c 12:3 Melengien xil te Beret xa Is Tovuol En: E huram xil ngasen, melengien tol e he sav (8) Siu xil di langga beret xa is tovuol en tangan lanem rilomun ni melele xa latetemanon latehe reling hal Isip (Eks 12:1-14). ^d 12:4 Anien te Tavien: Siu xil lapol ni Anien ak e melengien kokot vari te Melengien xil te Beret xa Is Tovuol En tangan lanem rilomun ni melele xa masxaxa xil na Hi lathas muimol xil ngasen tahal Isip. E muimol na Siu xil, re sipsip xa latekas puiteh mae xil ni, tesak ni Hi tetavi e xil (Eks 12:15-20).

te vaeen lu ludi e rin xalu. E puiteh te nim te xeih, moletin lu mun lusoh ludi e hale. ⁷Vatakes, masxaxa tei na Suv mei mistal, e miehen tei mileluv xol ut xa Pita da en. Xi dil valxou Pita e milale ni. Di, biteni mini bitene, “!Temanon! !Tamea!” Vatakes, sen meluv reling hen, mot be tan. ⁸Masxaxa biteni mini bitene, “Lihi xat atuatu nam e hes xat sandel nam.” Ma Pita pol ni mak. Di, masxaxa biteni mun mini bitene, “Using ni kot nam e uhusil nou.” ⁹Ma Pita mitamea, nggusil masxaxa lustal ra nim te xeih. E di minemi bit holesok xil ak tave reitin ti, be metuveen tei tang. ¹⁰Lukakao luba luli vanut moletin te vaeen tei. Di, lukakao luba vuma ... luli vanut moletin te vaeen tei mun. E melele xa luduxoh puiteh te viov te nim te xeih xa be aeane, lupusi xa misaha tasen. Ma lustal e lukakao e suse tei e Serusalem luba. Vatakes, masxaxa ak be relingi e Pita mikameti xa misoh tasen.

¹¹Di, Pita minem kil neta xa mistal mini e misep tasen bitene, “!Be reitin! Hi Suv misa masxaxa nan bemei tangan vahur rat nou ra he Suv Toto Herot e ra holesok xil xa Siu xil di lanemi labit ti lipol ni minou.”

¹²Melele xa Pita minem kila rilomun, xi ba be nim ma Meri, nine Sion Mak. E rute ak, moletin xil holu xa laneket ladi vituei e di lasis. ¹³Melele xa Pita bemei mirei puiteh, atou te polien tei bemei xa hisen Roda e xi bit vakil ti visi iaxa de hale. ¹⁴E melele xa atou ak milong kil rae Pita, mesep e memaal pupu. Tangan vasah puiteh, e xi miloh sung ba biteni mi ngan xil xa ladi nim bit, “!Pita, xi taxa misoh de hale xiak!”

¹⁵Xil labit, “?!Otallang!?” E xi nggulehi dit biteni xa xi milong Pita mak. Ma xil labiteni mini labit, “Xos masxaxa nan tang iaxa di onlonge iaxai.”

¹⁶Melele xa di lasepin usili, Pita nggulehi dit miti puiteh vuma ... tei e xil misaha. E melele xa lapusi xa be xi reitin, lamesep pupu. ¹⁷Pita mike xat xil nggo hen bit litit votei. Di, bit kila mi xil xa Suv iaxa misak ni mistal reling nim te xeih. Biteni mun mi xil bitene, “Muhit usil holesok xil ak mi Temis e ngan tesav xil mun xa laneket.” Di, be reling xil ba be rute sav.

¹⁸E makoe nen, moletin te vaeen xil xa latling xil ti lateketeh xol Pita, lanexo pupu e di labit, “?Pita ba xave?” ¹⁹Melele xa Herot milongong ni, misil moletin te vaeen xil nan ba lalang ni, e xil mun latakameti ti. Di, misis pilei mereketeh xil ak. Di, misemae ni tangan lihas vin mereketeh xil ak. Dutou ni ngan ak, Herot be reling Sudea e ba di vuteili e Sesaria.

Suv Toto Herot Mat

²⁰Melele xa Herot di tamu e Sesaria, moletin xil tahal Taer e Saedon lapol ni neta tei xa misak ni ien minggat xil. Ma bit moletin xil nan lanasa ti mun anien mi xil. Ma moletin te rute xalu ak, lasil vanut moletin tei tangan lava lapus Herot. Diamu, lasis tutouen mi moletin tei

na Herot xa nenesien nan di en, hisen Blastas. E del tutouen nan, Herot mae ni xa laling xat melengien tei tangan moletin xil tahal Taer e Saedon limei tangan lipol ni hitxatien te tomat itela.

²¹E melengien teni, Herot mising ni eising tei xa bos xa bos na suv toto xil, e bemei dotan de hor nan. Di, misa sepinien tei ba mi xil. ²²Moletin xil labit lisak ni valonge vahos, ma lakei ba ni labitene, “!Rae nam taxoni moletin sav ti! !Rae nan nggoni hi tei vari!” ²³Herot milong sepinien nae e mae ni xil labiteni mak, e tasa ti merereen vaha mi Hi. Misak ni, vatei takes, masxaxa tei na Hi Suv bemei e pol ni mesei. Tavehi ti, tomasis xil labe tinen e langga ni vuma ... mat.

²⁴E sepinien eo na Hi xa Herot di tevae tetela, xi mei mahulong mu e mikapis ut xil ngasen.

²⁵E melele xa Banabas e Sol lupol vuol ni polien xil xa sias tahal Antiok latesa xalu lutehe Serusalem ven tangan lalsa tutouen mi hoeo xil, ludilomun lube Antiok, e Sion Mak ba xatel.^e

Ninin Eo Bosei Banabas xal Sol ve Polien Tei

13 ¹E sias tahal Antiok, provet e tisa ngan xil lateti en: Banabas, Simeon (xa be timaluxoluk tei), Lusias (tahal Saerin), Manaen (xa tehe timue hos tei na Suv Toto Herot), e Sol. ²Vatei, melele xa di lamot mi Hi e di labal ni anien, Ninin Eo bemei misepin mi xil bitene, “Muha muling Banabas e Sol ti lalipol ni polien xa inou nabosei xalu tuei ven.” ³Ma xil langgulehi di labal e di lasis. Di, laling he e Banabas e Sol e lasil rat xalu luba.

Banabas e Sol Lube Saepras

⁴Dutou ni xa Ninin Eo misa rat Banabas e Sol ra hal Antiok, xalu luba lube Selusia. Lunggo tuturil e rute ak lube aelan tahal Saepras. ⁵Melele xa lube ut e hal Salamis, lube nim te pispisien xil e di lusetu usil sepinien na Hi mi Siu xil. Sion Mak mun be xatel e di dutou ni xalu.

⁶Di, Banabas e Sol lunggur xoteh aelan tahal Saepras luba lube taon tahal Pamos. E inggak, lubisu mi Siu tei, hisen Eleimas.^f Xi be moletin tei te vongou e di miluvos moletin xil bit xi be provet tei na Hi. ⁷Vehakut, de sangas visal vat tei te kavmen xa di milaxat rute ak, hisen Serkias Polas. Xi be moletin tei xa tehe eimae, e melele xa milonge xa Banabas e Sol ludi inggak, mikes xalu lumei tangan lalsetu ni sepinien na Hi vateong ni. ⁸E Eleimas misep sisis hisealu tangan vasak ni vat na kavmen naneket ti e Iesu. ⁹Ninin Eo bemei polu e Sol (xa hisen tei mun be Pol), ma miketeh pus Eleimas ¹⁰e misepin nggeih ba mini bitene, “!Xouk obe nat Temat! !Di obae mi sexien xil vus xa bos! !Opolu ni hisit luvosen xil

^e 12:25 Pol 11:29-30 ^f 13:6 E sepinien na Siu xil lakesi ni ‘Bar-Iesu’.

ngasen e vehakut di osak pisi di obiles longeongen hos usil Suv Iesu mei be luvosen tang! ¹¹Ve sexien ak, Suv isa pangasien imei e xouk. Metom xalu mei ivar e onapus ti mun miehen ihe nousav vuteili.” Vatakes, Eleimas, meten be momah, dit mitavuel. Ma di kapis tangan vakamet moletin tova vatal xat hen vahe suse mini.

¹²Melele xa vat na kavmen pusi mak, mesep pupu e mei mineket e Suv Iesu ve pispisien nalu.

Pol xal Banabas Lube Taon tahal Pisitia-Antiok

¹³Pol e ngan tesav xil mun laling Pampos, langgo tuturil labe taon tahal Perka xa de provins tahal Pampilia. E rute ak, Sion Mak be reling xil dilomun be Serusalem. ¹⁴Di, langgo Perka laba labe taon tahal Pisitia-Antiok. E Sabat, labe nim te pispisien na Siu xil e ladotan en. ¹⁵Di, moletin tei buli sepinien tei e Rae xil na Mosis e ngan xa Provet xil latetisi. Melele xa buli bus, vat xil te nim te pispisien ak lasil moletin tei ba misis Pol xal Banabas bitene, “Toxoli xalu, xosxa munggur xat neta tova tangan xa mulihiteni vatutou ni moletin xil ak, ma bos xa mei mulhiteni.”

¹⁶Ma Pol mea, misa hen be nesao tangan liti votei e bitene, “Xamim xa mube Siu, e xamim xa mutave Siu ti xa di mumot mi Hi, bos xa muteong ni nou. ¹⁷Hi na Siu xil iaxa tehosei avu nar xil e tesak ni moletin nar xil mei latehe holu tova tang melele xa lateti e Isip, tave ti neta xa latnave hortan ti te rute ak. Di, Hi teleh rerat xil ra rute ak texo xeihen nan. ¹⁸E neta sav xa sexien xil nae misa, xi telaxat kuh xil e uruvuol haram hanutap lu (40). ¹⁹Di, kantri lu e he sav (7) xa mahulong pupu xa lateti e tan xa mahulong tahal Kenan, Hi tehu len xil e tesa tan nae mi avu nar xil tangan mei ihe tan xati nae. ²⁰Melele xa latemei e Isip ba duxoh melele xa tan tahal Kenan mei de he, haram handred hat e hanutap lu e hexalu mun (450) tetavi.

“Di, Hi tepet rat suv xil te lepisien tangan ti lipol mi xil ba duxoh melele xa tepet rat Samuel tehe provet nae. ²¹E melele xa moletin xil latsis Hi tangan vapet rat suv toto tei valaxat xil, ma Hi tehosei Sol, nat Kis xa texo vatimol na Bensamin. E xi telaxat mol-Isrel xil haram hanutap lu (40). ²²Di, dutou ni ngan xa Hi tesu rat Sol, xi pet rat Deved sung mei tehe suv toto nae. Hi tehit usil Deved temak, ‘Deved, nat Tiese, napusi xa xi be hisit moletin tei xa inou namaal pupu ven. Xi mikila vapol ni holesok xil vus vaxoni ngan xa inou di ieok bei.’

²³“Hi tehit xati xa moletin tei istal ixo vatimol na Suv Toto Deved tangan mei vateh meulien e Siu xil. Moletin ak be Iesu Kristo. ²⁴E melele xa Iesu tenapol ti mu, Sion tesetu mi mol-Isrel xil vus tangan lihiles ra tesaen xil nae e limae ni mei literir ni xil e oei. ²⁵Di, sangas ni melele xa Sion tepol vuol ni polien nan, xi tesis pilei moletin xil tehitene, ‘?Xamim

munemi mubit inou nabe visi? ?Mubit inou nabe xi xa Hi tehit xati tehit isa ni imei? E-e, tave nou ti. Xi itoutou imei, e inou natapin ti tangan xa mei nihe slev nan e namur rat sandel nan.’

²⁶“!Toxoli xil te vatimol na Ebrahim, del xamim vus xa di mumot mi Hi e mutave Siu ti, muteong kuhi ni nou! Hi tesa sepinien teteh meulien en mi xir. ²⁷Xi tesa kokot ni mi Siu xil tahal Serusalem tetel vat nae xil texo tisien na provet xil xa di latvuli e Sabat xil ngasen. E xil latele ras sepinien xil ak, e latnale kil ti xa Iesu be Kristo xa miteh meulien e xil. E neta sav xa lale rasi, melele xa latepol ni suse xa Iesu temat texo en, latesak ni sepinien na provet xil ak mei testal tehe reitin. ²⁸Tave ti neta xa latnakamet ti neta vasa xa Iesu vapol ni tangan ha vamat ven, e latesi petine Paelet tangan vamae ni lava lavasi vamat. ²⁹E melele xa latepol ni holesok xil ngasen tehusil naha xa Vanuvei na Hi tehit xati, xil latehur rat tiei nan ra eivave, be latelingi tete vangihat tei. ³⁰!E Hi tetal rat rilomun ni ra maten! ³¹Di, melengien holu, Iesu di testal mi ngan xil xa latehe xil latexo Kaleli mei latehe Serusalem. E taxeak, xil sung di lasep usili mi Siu xil. ³²E xamem mamei tangan masep mese ni mi xamim xa naha xa Hi tehit xati mi avu nar xil tetiamu, ³³xi pol ni bemei be reitin tuei mi xir melele xa tepol ni Iesu temea rilomun ra maten. Ngan ak nggoni ngan taxa Sam xa be lu (2) di tehiteni usil Iesu tehit,

‘Xouk obe natuxuli,
e xosali, inou nabe tamom.’^g

³⁴“Hi tetal rat Iesu ra maten e tamaen ni ti mun tangan tiei nan volel. Ngan ak nggoni ngan taxa Hi tehit usili tehit,
‘Hitxatien eo xa natepol ni mi Deved,
nipol ni mun mi xamim.’^h

³⁵“E Sam sav mun tesep usili tehitene,
‘Hi Suv, onamae ni ti tiei na moletin eo nam navolel ti e vul.’ⁱ

³⁶“E Deved xa xiak, melele xa xi tepol vuol ni holesok xil xa Hi teling xati tangan ti ipol ni, di, mat. Xil latelingi pat e von tehinen tetel avu nan xil, e tiei nan teta tevolel. ³⁷E ngan ak tamak ti mi ngan xa Hi tetal rati ra maten. ³⁸Toxoli xil, sepinien xa matsa ni mi xamim mak: Iesu mikila ileh rerat tesaen xil namim e isak ni Hi iketeh ihos mun ni xamim. ³⁹E ngan xil vus xa laling neketen nae en, vexil imase ra tesaen xil xa Rae xil na Mosis misakras valeh rati ra xil. ⁴⁰Ma mulaxat kuh xamim tangan xa naha xa provet xil latehit mese ni tuei nastal ti mun mi xamim. Latesepin ni latehitene,

^g 13:33 Sam 2:7 ^h 13:34 Aes 55:3 ⁱ 13:35 Sam 16:10

41 '!Muteong, xamim xa munem mele ni naha xa Hi di pol ni!

!Mutemanin en e mumat!

Tave ti neta xosxa moletin sav tei tomak vamei vasep kila mi xamim,
naha xa di napol ni mi xamim xosali be neta tei xa musakras
muke reitin en.' ”j

42 Melele xa Pol e Banabas lusepin bus, lube reling xil ra nim te pispisien. Di, moletin xil lasis xalu tangan laililomun lalisep usil holesok nen ti mun e Sabat xa itutou imei. 43 Dutou ni totanen ak, moletin xil holu langgusil xalu laba, ngan xil xa labe Siu e ngan xil xa latave Siu ti e di langgusil xat Rae na Siu xil e lamot mi Hi nae. Lusepin mi xil e lusel xat xil tangan lixulehi liling nenesien nae e eheien hos na Hi.

44 E Sabat sav mun, sangas moletin xil vus te taon tahal Pisitia-Antiok lamei tangan lalong usil sepinien nalu usil Suv Iesu. 45 E melele xa Siu xil lapus vanut moletin xa be mahulong mak, ma lanem misa pupu ni xalu. Misak ni laseputut ni Pol e lasep sisin holesok xil vus xa di misep usili.

46 Ma Pol xal Banabas lusepin nggeih ba ni xil lubitene, “Hi tehiti xati tangan sepinien nan vamei kokot mi xamim. E vengan xa di musin ni e iemim tavei muvur meulien sal, ma malhe reling xamim. Xosali maliha sung mi ngan xil xa latave Siu ti. 47 Hi Suv tesa selxatien ak ba mi xamim tehiti,

‘Napol ni xamim mube miehien mi ngan xil xa latave Siu ti.

Mak, ma muhur sepinien teteh meulien en iha mi moletin xil vus te ut etan.’ ”k

48 Melele xa ngan xil xa latave Siu ti lalonge mak, lamaal pupu e lapet rat sepinien na Hi. Ngan xil vus xa Hi tehosei xil tangan lihur meulien sal, ngan xil ak laling neketen nae e Suv Iesu.

49 Ma sepinien na Suv miloh mikapis ut ngasen e rute nen ak. 50 E rut Siu xil laba lapus rut vat xil del rut atou ngan xil mun xa labe eilep e polien nae xa di lamos e Siu xil, e lasak ni nenemien nae misa ba ni Pol e Banabas. Misak ni, moletin xil lasil rat xalu lube reling taon nae.

51 Ma Pol e Banabas lumea lurang meas ra kaelealu ba xat taon nae tangan vassel kat xil xa pangasien tei mei xat xil. Di, luba lube taon tahal Aekoniam. 52 E moletin xil tahal Pisitia-Antiok xa mei laneket e Iesu, Ninin Eo bemei polu e xil e sien na Hi di e xil.

Rut Moletin Xil Langgol Rerat Pol Xal Banabas ra Hal Aekoniam

14 ¹Di, e Aekoniam, nggusil sexien matu nalu, Pol xal Banabas lube nim te pispisien na Siu xil e di lupispisi kuhi mi xil. Misak ni

j 13:41 Hab 1:5 k 13:47 Aes 42:6; 49:6

Siu xil holu del ngan xil xa latave Siu ti, mei laneket e Iesu. ²E rut Siu xil xa latake reitin ti e pispisien nalu, lasusu petine ngan tesav xil xa latave Siu ti tangan iexil vakat e lavae mi Kristin hu xil. ³Misak ni, xalu ludi be nousav e rute ak e ulixalu takan ti. Di lusetu kuhi mi moletin xil usil eheien hos na Iesu, e Suv di pisen ni xa sepinien nalu be reitin nggo xeihen xa misa ni mi xalu tangan lupol ni merekel xil e sexien sav xil xa tellep. ⁴Ma moletin xil te taon ak ladi pas xil be vanute lu: vanute tei langgusil Siu xil, e vanute tei mun langgusil eloheoh xalu.

⁵Di, rut moletin xil xa latave Siu ti del Siu xil e vat nae xil, lapol ni lingxatien tei tangan lava ni xalu ha lavov vin xalu. ⁶Melele xa eloheoh xalu lulongeong ni lingxatien ak, xalu lulesae lube Laekonia, ba ludi taon xalu ak, Derbi del Listra, e ut nen xil mun xa di sangas. ⁷E rute xil ak, xalu di lusetu ni longeongen hos usil Iesu.

Moletin Xil tahal Listra Lanemi Labit Pol xal Banabas Lube Hi Lu

⁸E taon tahal Listra, moletin tei da en xa misakras vakakao vengan xa len xalu tesa melele xa latepesi. ⁹Xi dotan tang da, di miteong ni sepinien na Pol. Pol pusi e pus kila xa neketen nan pipin tangan mikila ikakao. Ma miketeh momal ni ¹⁰e mikei ba ni bitene, “!Xouk, umea soh!” Ma moletin ak but be nesao e mikakao. ¹¹Melele xa vanut moletin xil ak lapus holesok xil xa tellep ak xa Pol di pol ni, xil di lakei nggeih nggo sepinien nae tahal Laekonia labit, “!Xalu ak lube hi lu xa lutemei etan e lubiles xalu lumei lunggur tiei nggoni moletin!” ¹²Ma xil lakes Banabas ni ‘hi Sius,’ e Pol ni ‘hi Hermis’ vengan xa Pol be tei e xalu xa di misetu holu mi moletin xil. ¹³Sangas ni taon ak, nim eo tei da xa di lamot mi hi Sius en. E pris tei teni nggur longeongen, ma bemei visal puiteh te vloh te taon ak del xat buluk lu xa laso xol en hungovae de huraealu. Di, xi del vanut moletin xil ak labit lavas buluk xalu ak vahe sanien eo tei nae mi xalu.

¹⁴Melele xa Pol xal Banabas lule kil naha xa xil labit ti lipol ni, xalu lulonge misa pupu. Ludal papas eising nalu e luloh lube hilaep te vanut moletin xil ak e di lukei nggeih lubitene, ¹⁵“!Moletin xil! ?Veneh ma mupol ni sexien xil ak? !Xamel ak mabe moletin tang manggoni xamim! Mamei inggak tangan malsa longeongen hos na Hi mi xamim. Xi bit muviles ra nanao votei xil ak e mumot mini kestang. Xi iaxa meul e pol ni ut nesao e ut etan, pol ni tas del holesok xil vus xa ladi en. ¹⁶Tetiamu, temae ni moletin xil tahal kantri xil ngasen tangan lihusil nenemien nae xil tang e ti limot mi hi sav xil. ¹⁷E tave ti neta xa latakil ti, xi di pisen sexien nan xil mi xil nggo holesok hos xil xa di pol ni. Xi misa us mi xamim nggo ut nesao e mei mikas anien samim xil e naho e pol ni meul bos. Xi bos mak, e di misa pupu ni anien mi xamim e di pol ni mubesi xamim.” ¹⁸Tave ti neta xa xalu luso sepinien xil ak, sangas lusakras lalosikoe xol moletin xil ak tangan linavas buluk xalu ti ak nave sanien eo nae mi xalu.

¹⁹Rut Siu xil langgo taon tahal Pisitia-Antiok e taon tahal Aekoniam mei lastal e Listra. Lasep luvos vanut moletin xil ak tangan lanem vasa ni xalu. Ma xil langgov Pol e lalihi ba laso ni be reling taon nae vengan xa lanemi labit mat. ²⁰E dutou ni, moletin xil xa laneket e Iesu mei lakapis xole. Vatakes, xi mitamea e ladilomun lube taon tahal Listra. Ut milan, xal Banabas lube taon tahal Derbi.

Pol Xal Banabas Ludilomun Lube Antiok

²¹Pol xal Banabas lusetu ni longeongen hos na Hi e Derbi e moletin holu mei laneket e Iesu. Di, ludilomun e suse nalu lumei Listra e Aekoniam. Di, lunggur sal ni lube Pisitia-Antiok. ²²E ut xil ngasen, ba di lusao ni moletin xil xa laneket e Iesu. Lupol ni nenemien nae ngeih mu e lusel xat xil tangan lisoh ixeh e neketen nae. Xalu di lupispisi mi xil lubit, “Ixo suse te longpangansen, ma rikila riha rihe ut xa Hi be Suv Toto en.” ²³E sias xil ngasen xa lusao ni, di luling elda xil tangan lilaxat xil. E diamu ni melele xa luba, di lubal ni anien e di lulis ba ni Suv Iesu tangan ilaxat kuh elda xil xa lateling neketen nae en.

²⁴Usil kakaoen nalu, lunggur xoteh ut xil tahal Pisitia e lube provins tahal Pampilia. ²⁵E rute ak, xalu lusetu ni sepinien na Hi e taon tahal Perka. Di, lube taon tahal Atalia. ²⁶E rute ak, lubut e tuturil tei e ludilomun lube Antiok. Rute ak iaxa moletin xil latsis xol xalu tangan Hi iti mi xalu e polien nalu e taxeak lumei e lupol vuol ni.

²⁷Melele xa mei lustal e Antiok, luleh viton ngan xil te sias te rute ak. Lutumul usil holesok xil xa Hi tepol ni texo polien nalu. Lusep kila mi xil xa Hi tesah suse mi moletin xil xa latave Siu ti tangan mei lineket e Iesu. ²⁸E ludi rute ak nousav nen li del xil.

Vat xil na Kristin xil xa Ladi Serusalem Lasep Tetavoe Usil Ngan Xil xa Latave Siu Ti xa Mei Laneket e Iesu

15 ¹Rut moletin xil langgo Sudea lamei e Antiok, e di lapispisi mi moletin xil xa laneket labit, “Rae xil na Mosis biteni bit Hi misakras vateh meulien e xamim xosxa munave vexaho ti.” ²Melele xa Pol xal Banabas lulonge mak, lungor pupu del xil ve ngan ak. Misak ni xil labosei Pol, Banabas, del rut moletin sav xil mun tangan lihe Serusalem ha lisepin itel eloheoh xil e elda xil ve sexien te vexaho ak.

³Ma ngan xil te sias tahal Antiok lasil xil laba. Melele xa lakakao laba, di lasao ni moletin xil xa laneket e rute xil vus e Ponisia del provins tahal Sameria. E melele xa lapus xil, labiteni mi xil e rin xa moletin hao xa latave Siu ti di labiles meulien nae e mei laneket e Iesu. Longeongen ak misak ni Kristin xil ngasen ak labesi pupu ni xil.

⁴Melele xa laduxoh Serusalem, ngan xil te sias, del eloheoh xil e elda xil mun lunggur pilei xil. Di, Pol xal Banabas lubit vuol ni holesok xil vus

xa Hi tepol ni texo xil tetel ngan xil xa latave Siu ti. ⁵E melele xa di tamu lusepin, rute e ngan xil xa laneket xa di lamos e Parasi xil lasoh e labiteni labit, “Xosxa ngan xil xa latave Siu ti labit mei lamos e xir, bos xa xil mun lihe vexaho e lilong xat Rae xil na Mosis.”

⁶Di, eloheoh xil del elda xil lamei labe vituei e kaonsel tei tangan lamal ni ngongoren ak. ⁷Lasep tetavoe ni be nousav. Di, Pita misoh e biteni mi xil bitene, “Toxoli xil, xamim vus mukila xa tetiamu, Hi tehosei nou ra xamim tangan nisetu ni longeongen hos mi ngan xil xa latave Siu ti tangan lilonge e lineket en.^l ⁸E Hi, xa mikil vuol ni nenemien na moletin xil, tepisen ni xa xi tehosei moletin xil ak xa latave Siu xil ti melele xa tesa Ninin Eo mi xil nggoni ngan taxa tesa ni mi xir. ⁹Naha xa Hi di pol ni mi xil pipin tang mi xir. Nggoni xir, xi mikas moten meulien nae ra tesaen vengon xa laneket e Iesu. ¹⁰?Ma taxeak, veneh ma mubit musak pis Hi melele xa muling Rae nar xil nggoni eipo tei xa meas da xat moletin hu xil na Iesu xa latave Siu ti? Eipo ak, xir del avu nar xil tetiamu rasakras rapoe. ¹¹!Rinapol ni ti namak! Xir xa di raneket e Iesu, ranggur meulien hu nggo eheien hos nan kestang. Ma xil mun mak tang.”

¹²Di, melele xa Banabas xal Pol di lutumul usil merekel e holesok xil xa tellep xa Hi tepol ni texo xalu tetel moletin xil xa latave Siu ti, moletin xil vus xa ladi, ladit votei. ¹³E melele xa lusepin bus, tei e xil, hisen Temis misepin mi xil bitene, “Toxoli xil, muteong ni nou. ¹⁴Saemon Pita misep kila ngamu sexien xa Hi tepisen eheien nan tetiamu mi ngan xil xa latave Siu ti e teleh rerat rute e xil tangan mei lihe nan e ti lipet rat hisen. ¹⁵Sepinien na Saemon Pita nggoni sepinien na Hi xa texo provet xil tetiamu xa tehit,

¹⁶‘Itutou ni ngan ak, inou nitilomun

e nisak ni vatimol na Suv Toto Deved isoh rilomun.

Reitin, neta sav xa vatimol nan temot, inou nipol ni isoh ixeih mu.^m

¹⁷Ma moletin sav xil te ut etan limei visal nou,

ngan xil xa latave Siu ti xa nabosei xil labe navan, xil limei visal nou.

¹⁸Ngan ak be sepinien navan xa natehit mese ni nousav temei.ⁿ”

¹⁹Di, Temis biteni mun bitene, “Nenemien navan xiak. Nanemi nabit bos xa rinapol ni ti naxeih pupu mi ngan xil xa latave Siu ti xa di lasa meulien nae xil mi Hi. ²⁰!E-e! Bos xa risa uvei tova tang ihe visal xil, e risep xol xil tangan linaxa ti anien xil xa tamese ti xa latesa ni teha mi nanao xil. Linapat ti mun natel atou mu tiramue sav. Linaxa ti mun hisi

^l 15:7 Pol 10:1-44 ^m 15:16 Vatimol na Suv Toto Deved di misep usil Iesu xa Hi ital rat rilomun ni ra maten e ipol ni mei ihe Suv Toto na moletin xil ngasen, ngan xil xa labe Siu e mosav xil mun. ⁿ 15:18 Amo 9:11-12 (LXX)

te vongoro xil xa ra di tamu en, mu ngan xil xa latesar xoteh hurae tang. ²¹Vengan xa tetiamu bemei duxoh xosali, e Sabat xil vus, moletin xil di lalong kil Rae xil na Mosis melele xa di labuli e nim te pispisien xil. E di lasetu usil sepinien nan e taon xil ngasen.

**Kristin Kaonsel tahal Serusalem Ladis Uvei
Ba Ni Kristin Xil xa Latave Siu Ti**

²²Di, ngan xil vus te sias tahal Serusalem lamae ni tangan eloheoh xil e elda xil lihosei rut moletin nae xil tangan lisil xil lihe Antiok itel xat Pol xal Banabas. Ma xil labosei rumali lu xa lube vat na moletin xil e sias ak, hisealu Saelas del Sudas (xa hisen tei mun Barsabas). ²³Ma lasa uvei ak mi xatel latengguri latoba. Uvei ak biteni mak:

“Xamem, eloheoh xil del elda xil, mabit mavit bos makoe mi xamim, tua namem xil xa mutave Siu ti xa mudi taon tahal Antiok, e rute sav xil e provins tahal Siria e provins tahal Selisia.

²⁴Malongeong ni xa rut moletin namem xil labat e lasa sepinien tei xa tepol ni xamim lemim malilil e nenemien namim tata kat ti. Xamem matnasa ti sepinien mi xil tangan lavat lavitene mi xamim vamak. ²⁵Misak ni, xamem matetotan vituei e matemei e nenemien tei takes. Di, matehosei moletin lu e masil xalu tangan lalhur nenemien namem ihat visal xamim. Xalu luka vituei del xat Banabas xal Pol xa lube tua hos nar. ²⁶Xalu ak, sangas laloli sen meulien nalu ve polien na Iesu Kristo, Suv nar. ²⁷Ma masil Sudas xal Saelas lubat. Xalu lalsepin ni sepinien xil imal tang mi xamim ixoni ngan taxa madisi xiak. ²⁸Ninin Eo bit bos tangan nasa ti mun rae xil mi xamim, ma xamem mun mamae ni tangan manasa ti mun eipo xa meas mi xamim. E muhusil kes ni rae xil taxa tellep xa bit: ²⁹munaxa ti anien xil xa latesa ni teha mi nanao xil; munaxa ti mun hisi te vongoro xil xa ra di tamu en; munaxa ti mun vongoro xil xa latesar xoteh hurae tang; e munapat ti mun natel atou mu tiramue sav xil. Xosxa muhusil kuh rae xil ak, ma ihos pupu mi xamim.

Ngan ak be hoxalite te sepinien namem. Bos mahis mi xamim vus.”

³⁰Ma Sias tahal Serusalem lasil Sudas, Saelas, Pol, del Banabas latobe Antiok. Melele xa latduxoh rute ak, latleh viton ni Kristin xil vus e latosa uvei ak mi xil. ³¹Melele xa moletin xil labuli, xil labesi xil himetu ve sepinien te selxatien xil xa di en. ³²Sudas xal Saelas lube provet, e lusepin teviei del xil e ludal rat nenemien nae e rusak ni xil lasoh nggeih e neketen nae. ³³Melele xa ludi be nousav vuteili visal xil, Kristin xil labit lisil xalu itel xat tomat na Hi laltilomun lalihe visal ngan xil xa latesa xalu lutemei. ³⁴E Saelas bit ita tamu visal xil.

³⁵E Pol xal Banabas ludi vuteili tamu e Antiok. Xalu del moletin sav xil holu mun, di lapispisi mi moletin xil xa laneket e di lasetu ni sepinien na Suv.

Pol Xal Banabas Lukati Xalu

³⁶Di, vatei, Pol biteni mi Banabas bit, “Raltilomun ha ralsao ni ngan xil xa laneket e taon xil vus xa di rutsetu ni sepinien usil Suv Iesu en, e ralpus ti xa ladi midep.” ³⁷Banabas mae ni e bit bos xa lalhur Sion Mak ihe xatel. ³⁸E Pol minemi tamal ti tangan lalhuri, vengan xa tetiamu, xi tehusil xat xalu e tenapol vuol ni polien nan xil ti. Xi teheling xalu e Pampilia tamu.^o ³⁹Ma ngongoren ak mei nggeih pilei e misak ni lukati xalu. Banabas nggur Sion Mak ba lubut e tuturil tei lube Saepras, ⁴⁰e Pol bosei Saelas tangan ihe xalu. Di, Kristin xil lasis ve xalu tangan Hi Suv ilaxat kuh xalu. ⁴¹Xalu ba di lukapis e lusao ni ngan xil te sias xil xa ladi e provins tahal Siria e provins tahal Silisia. Lusak ni xil mei lasoh nggeih mu e neketen nae.

Timoti Mei Mos e Polien na Pol xal Saelas

16 ¹Di, Pol nggur sal ni be Derbi e Listra. E rute ak, horam maxoe tei xa di mineket e Iesu da en, hisen Timoti. Ninen be Siu tei xa xi mun mineket, e tamen be ngan Kris. ²Kristin sav xil tahal Listra e Aekoniam lanemi labit Timoti be moletin hos tei. ³Pol ien bei vahur Timoti vahe xalu, ma pol ni be vexaho. Xi pol ni mak vengan xa Siu xil vus xa ladi rute xil ak lakila xa Timoti tave vexaho ti mun vengan xa tamen tave Siu ti. ⁴Melele xa di latkakao e taon xil, xatel di latbit kil rae xil xa eloheoh xil del elda xil tahal Serusalem latepol ni mi ngan xil xa latave Siu ti. E di latsel xat xil tangan lilong xat rae xil ak. ⁵Misak ni ngan xil te sias xil vus, neketen nae mei nggeih mu. E melengien xil ngasen, moletin sav xil mun lamei lamos del xil.

Pol Metuve e Pus Ngan Masedonia Tei

⁶E kakaoen na Pol xatel Saelas e Timoti, Ninin Eo tamaen xatel ti tangan latsetu ni sepinien na Hi e provins tahal Esia. Misak ni latnggo sutang e rute xil tahal Frikea e provins tahal Kalesia. ⁷E melele xa latduxoh haxot te provins tahal Misia e provins tahal Bitinia, Ninin Eo na Iesu tamaen xatel ti tangan latohe Bitinia. ⁸Ma xatel latkakao latoba latnggo provins tahal Misia e ba latbe Troas. ⁹E vongien nen, Pol metuve e pus moletin tei tahal Masedonia. Xi misoh e di mikesi bit, “!Amei li e Masedonia e mei ututou ni xamem!” ¹⁰Melele xa Pol pus metuveen ak, minem kila xa Hi ien bei xa ha latsetu ni longongen hos nan mi ngan

^o 15:38 Polien 13:13 di misep usili.

Masedonia xil. Misak ni latbue xat xatel e inou mun, Luk, namos e xatel^p matobe.

E Taon tahal Pilipae, Lidia Mei Mineket

¹¹Xametel matnggo tuturil tei e Troas e matnggur xoteh tas matbe Samotres. Di, e makoe nen, tuturil ak be ut e taon tahal Neapolis. ¹²Di, matkakao matnggo rute ak ba mattestal e taon tahal Pilipae xa be taon tei xa eilep e provins tahal Masedonia. Kavmen tahal Rom tehur taon ak mei tehe taon tei mun nan.^q Xametel matdi melengien vahis mun en.

¹³E Sabat, xametel matbe reling taon e matbe rute tei sangas ni oeisal. Matenemi matobit rute ak iaxa be von sisen na Siu xil. Ma matdotan e di matsepin del atou votei xil xa mei ladi vituei ngamu. ¹⁴Tei e xil xa di miteong ni xametel, hisen Lidia. Xi tahal Taeatira e xi iaxa di pos ni kaliko xil xa bihili e bos pupu. Xi be atou tei xa tave Siu ti e vehakut di mot mi Hi. E Hi misah puiteh e meulien nan tengan wakil kuh naha xa Pol di misepin ni. ¹⁵E melengien nen tak, xi del ngan xil vus xa ladi tim san lamae ni Pol derir ni xil e oei. Di, misis xametel bit, “Xosxa mutbit nabe moletin na Hi reitin, mei ha mutti nim mavan.” Ma matmae ni be xametel matodi.

Moletin Xil tahal Pilipae Laso Pol Xal Saelas Lube Nim te Xeih

¹⁶Vatei, matoba tengan mathe von sisen e matbisu mi atuli tei xa be slev. Atuli ak, ninin tesa tei da en xa misak ni mikila vake mese ni naha xa istal e melengien xil xa ti imei. Atuli ak, moletin xil holu lamei tengan xi ti vahit kil holesok xil xa istal e meulien nae. Misak ni moletin xatel xa atuli ak de pe heatel, di latlihi vatu xil xa holu nggo en. ¹⁷Xi di nggusil Pol e xametel e di miki nggeih bitene, “!Moletin xil ak labe slev xil na Hi xa mili hi sav xil! !Xil di lasep kil suse xa Hi iteh meulien e xamim ixo en!” ¹⁸Melengien holu xi di pol ni mak, misak ni Pol ien mikat ma biles biteni mi ninin tesa ak bitene, “!E his Iesu Kristo, nasemae ni xa uhe reling atuli xai!” Ma vatakes, ninin ak be relingi.

¹⁹Melele xa moletin xatel xa di pol mi xatel latpus kila xa atuli ak misakras valihi ti mun vatu vahe natel, latdal xat Pol xal Saelas e latdel xalu lube von koten xa de hilaep te taon. ²⁰Latdel xalu luba lusoh e pe met moletin xil te lepiesien e von vitueien e latbiteni mi xil latbit, “Moletin xalu ak di lupol ni holesok xil xa misa e taon nar. Lube Siu ²¹e di lupispisi xa xir, mol-Rom xil, rihusil sexien nae xil, e rae nar xil latamae ni ti tengan ravuri e ravousili.” ²²Moletin xil vus di lasuv xat xatel e di lasepin nggeih ba xat Pol xal Saelas e di lasak tengan lati xalu.

^p **16:10** Luk xa tetis uvei ak temos e xatel e hal Troas. ^q **16:12** Rae xil te taon ak momal ni ngan xil tahal Rom tang. E moletin xil holu xa ladi en labe hortan xil tahal Rom.

Di, moletin te lepisien xil ladal papas eising na Pol xal Saelas be reling xalu e lasemae ni moletin te vaeen xil tangan va lavas pangas xalu ni liei. ²³Labas purun xalu bus, laleh xalu ba, laso xalu lube nim te xeih e labiteni mi moletin xa di miketeh xol nim ak tangan ivar xat kuh xalu. ²⁴Melele xa moletin ak milong sepinien nae, xi miso xalu lube namba sikis e bar xat le xalu del xat liei tei xa meas. Ludit mak tang.

²⁵E hilaep te vongien, Pol xal Saelas di luis e di lukikei ni sisien xil ba ni Hi, e ngan tesav xil xa ladi sangas ni xalu di lateong ni xalu. ²⁶E melele xa di tamu lupol ni mak, latemanin e lul tei xa nggeih milil, e misak ni nim te xeih ak mulul pupu. Puitech xil vus lasaha e sen xil vus xa tevar xat xil lameluv reling moletin xil xa lateti e nim te xeih. ²⁷Lul ak misak ni moletin xa di milaxat nim te xeih mitemanin. E melele xa mitamea, pusi xa puitech xil vus milel. Xi minemi bit moletin xil vus xa lateti e nim te xeih latlesae ngamu, ma milihi rat tiei te vaeen nan e bit vatil vin xi mun tang ni.^r ²⁸E Pol mikei nggeih ba ni bitene, “!Onahasuk ti! Xamem vus madi tak.”

²⁹Ma moletin ak mikei tangan lapo laet tova vamei. Di, miloh ba, miteingeiril pe met Pol xal Saelas, e len mulul pupu. ³⁰Melele xa miling kuh moletin sav xil e nim te xeih ak, midel Pol xalu lustal e misis xalu bitene, “?Suv xalu, nipol ni itep tangan Hi iteh meulien e nou?”

³¹Xalu lubit rilomun ni mini lubit, “Uneket e Suv Iesu ma xi iteh meulien e xouk, xouk itel ngan xil vus xa ladi tim sam.” ³²Di, xalu lusetu ni sepinien usil Suv Iesu mini e mi mosav xil mun xa ladi tim san. ³³E melele nen tak, e vongien, moletin xa di milaxat nim te xeih ak mileh xalu ba mikas moten von liei xa latehas xalu ni. Di, xi del nan xil vus mei laneket e Iesu, ma Pol derir ni xil e oei. ³⁴Di, mileh Pol xal Saelas latbe nesao e nim man, ba misa anien mi xalu. Xi del nan xil vus lamaal pupu vengan xa xil mei laneket e Hi.

³⁵Melele xa ut milan, moletin xil te lepisien lasil polis nae xil del sepinien ak, “Ha mumae ni moletin xalu xai ha vexalu imase.”

³⁶Ma moletin xa di milaxat nim te xeih biteni mi Pol bit, “Moletin xil te lepisien lamae ni xamil muliha ha vemil imase. Ma mulkila mulistal. Muliha itel xat tomat na Hi.”

³⁷E Pol biteni mi polis xatel ak bitene, “Neta sav xa lattakamet ti naha xa xamel mapol ni misa, latmae ni xamel ba labas purun xamel pe met moletin xil. Di, laso xamel mabe nim te xeih. E xamel mabe hortan te kantri tahal Rom.^s ?E taxeak labit lasil xuxus ni xamel maloha? !E-e, namak ti! Xil tang limei litel xamel e liling kuh xamel sung.”

^r 16:27 Sexien na mol-Rom xil biteni bit xosxa moletin te vaeen tei mae ni moletin tei xa di laketeh xole ba ven mase, xi sung ihur longpangasien na moletin ak. ^s 16:37 E melele nen ak, rae na mol-Rom xil biteni bit neta sav xosxa eilep xil labas purun movotei xil, e mi hortan xil te kantri tahal Rom xil, lasakras. Hortan xil ak lihe pe met moletin te lepisien itiamu, ti, xi mikila isa pangasien teni mi xil.

³⁸Ma polis xatel latdilomun be latobit sepinien xil ak mi moletin te lepisien xatel, e melele xa latlonge xa Pol xal Saelas lube hortan te kantri tahal Rom, uliatel mikan. ³⁹Ma xatel ba latobit esaen natel mi Pol xal Saelas. Di, latdel xalu lustal e nim te xeih e latsis xalu tangan lalhe reling taon nae. ⁴⁰Melele xa Pol xal Saelas lumea reling nim te xeih, luba lube nim ma Lidia. E rute ak, xalu lubitue del Kristin sav xil e lusel xat xil vatei mun. Di, lumea lube reling taon ak.^t

E Hal Tesolonaeka, Vat Xil na Siu Xil Lapol ni Moletin Xil Labae del Pol Xatel

17 ¹Pol xal Saelas lukakao ba, lunggur sal ni taon tahal Ampipolis del Apolonia e mei lustal e Tesolonaeka. E rute ak, nim te pispisien tei na Siu xil da en. ²Pol be nim te pispisien ak nggoni ngan taxa di pol vehakut ni. E Sabat tol, xi di misep kil sepinien xil xa de Vanuvei na Hi mi moletin xil. ³Xi pisen ni memese mi xil xa Kristo xa Hi tehit xati tehit imei, xi ilong pangas xi, e ha imat. Ti, imeul rilomun ra maten. Pol biteni mak, “Tesu xa nasep usili mi xamim iaxa be Kristo reitin xa Hi tehit xati.” ⁴Rute xil laneket en, ma lamos del Pol xal Saelas. Atou xil holu xa labe vat na atou xil lamos del xalu, xil del moletin xil holu mun tahal Kris xa lamot mi Hi.

⁵E melele xa rut Siu xil lapusi mak, lanem misa ni xalu. Ma laleh viton vatxeih tatei xil xa labe te suse tang tangan lamei labe vanute tei e lapol ni rumen xa eilep. E lasak ni xil lapol ni vaeen tei xa eilep e taon ak. Di, lalang ni Pol xal Saelas tangan laleh xalu lalomei pe met moletin xil. Labit ludi e nim ma Tiesen, ma ba langgulen puiteh te nim man. ⁶E melele xa latakamet xalu ti, xil langgur Tiesen del rut Kristin xil mun e ladel kakao ni xil mei lasoh pe met vat xil te taon ak. Di, lakei nggeih labit, “!Moletin xil ak lasak ni vaeen tova tang e rute xil vus! E taxeak, xil lamei e taon nar. ⁷E Tiesen xai di misoson xalu ludi nim man. Xil vus di langgur xoteh rae xil na suv toto nar tahal Rom vengan di labitene labitene suv toto tei mun da xa hisen Iesu.” ⁸Melele xa vanut moletin xil del vat xil lalong sepinien xil ak, iexil mikat pupu ven. ⁹Misak ni vat xil lapol ni Tiesen del ngan tesav xil lasa vatu tei xa eilep mi xil. Di, labitene mi xil labit, “Vatu xil ak be namim, e xosxa tua namim xalu lalipol ni neta tei mun xa isa, ma vatu ak ikesa e reling xamim.” Di, lamae ni xil laba.

Moletin Xil tahal Beria Mei Laneket e Iesu

¹⁰Melele xa vongien bemei, Kristin xil te rute ak lasil Pol xal Saelas lube hal Beria. E melele xa ba lustal e rute ak, luka sal lube nim te

^t **16:40** Rakila xa Pol miling Luk dat e rute ak vengan e sepinien xil xa itutou, Luk tamos ti mun e xil. Melele xa Pol isao rilomun ni Kristin xil e hal Pilipae e 20:5, Luk ihusili rilomun.

pispisien. ¹¹Lukameti xa moletin xil e rute ak iexil bei tangan lalong ti sepinien nalu mili ngan xil tahal Tesolonaeka. E melengien xil vus, laketeh be Vanuvei na Hi tangan lalepisi xa naha xa Pol biteni be reitin mu tave reitin ti. ¹²Ma xil holu laneket e Iesu del eilep tatei xil tahal Kris del rut atou xil mun xa latellep tahal Kris. ¹³E melele xa Siu xil xa ladi Tesolonaeka lalongeong ni xa Pol di misetu ni sepinien na Hi e Beria mun, xil lamei mun e rute ak. Mei labiles nenemien na moletin xil tahal Beria tangan iexil vat pangas xalu. ¹⁴Vatakes, Kristin xil lasil Pol ba be bien tangan vahur tuturil tei. E Saelas xal Timoti ludit e Beria. ¹⁵E ngan xil xa ladel Pol laba, ba labus tang e taon tahal Atens e lalingi e rute ak. Di, ladihumun labe Beria del xat sepinien nan xa ha lihiteni mi Saelas xal Timoti tangan laltemanon mei ihe xatel.

Longeongen Hos Ba ni Moletin Xil tahal Atens

¹⁶Melele xa Pol di midatil rumali e Atens, xi milonge misa pupu vengon xa pusi xa nanao na hi sav xil labe holu tova tang e rute xil vus e taon ak. ¹⁷Ma xi be nim te pispisien na Siu xil e di misep kil sepinien na Hi mi Siu xil del ngan xil xa latave Siu ti e laneket e Hi nae. E melengien xil ngasen mun, be von bovarangen e taon ak e di misepin del xat movotei xil xa lamei laba. ¹⁸Rut moletin xil xa lamei e di langor dela labe tisa na vanut moletin lu, tei lakesi ni Epikiurias^u, e tei xalu mun lakesi ni Stoik^v. Xil lasis moletin xil usil pispisien na Pol labit, “!Ei! ?Unu xai bit ti vahit naha?”

Rut moletin sav xil labit rilomun ni mi xil labit, “Lehit ngan ak di misep usil hi sav tatei xil.” Xil di lasepin mak vengon xa Pol di misetu usil ‘Iesu’ e ‘Meul Rilomunen’. ¹⁹Ma lasis Pol tangan vamei e von totanen tei te taon ak xa lakesi ni ‘Ariopakas’. Labiteni mini labit, “Mabit makil kuh ti pispisien hu eah nam iaxa di opispisi ni mi moletin xil. ²⁰Rut holesok xil xa xouk di obiteni be neta hu mi xamem e mabit makil ti koute teni.” ²¹Xil labiteni mak vengon xa moletin xil vus tahal Atens e ngan xil xa ladi en xa latave hortan ti en, vehakut iexil bei xa ti latumul e ti lateong ni holesok hu xil xa di mistal.

²²Ma Pol be xil, e ba misoh pe met Kaonsel te taon ak e biteni mi xil bitene, “Napusi xa xamim, mol-Atens xil, e sexien xil vus namim, di númerere ni hi namim xil. ²³Melele xa di nakakao e taon namim, di napus kila xa von moten xil namim labe holu. E nakamet hor tei sung xa

^u 17:18 Vanut moletin xil ak langgusil pispisien na moletin tei, hisen Epikiurias (342-270 BC). Xi biteni bit hi xil lanem mele ni moletin xil te ut etan. Misak ni bos mak mu tangan moletin xil lipol ni holesok xil xa isak ni limaal tang. ^v 17:18 Vanut moletin xil ak langgusil pispisien na moletin tei, hisen Zeno (332-260 BC). Xi biteni bit hi tovuol. Misak ni bos mak mu tangan moletin xil lameul e tomat itel holesok xil te ut etan e lilaxat kuh sexien e nenemien nae xil tase.

latetis en labit, 'Hor na Hi xa Matakil ti.' E Hi xai xa di mumot mini xa mutakil ti, xi vari iaxa di nasep usili mi xamim taxeak. ²⁴Hi ak tepol ni ut etan e holesok xil vus xa di en, xi iaxa be Suv te ut nesao e ut etan. Xi tara ti e von moten xil xa moletin xil tang di lapol ni. ²⁵Xir rasakras ritutou ni ni neta tova, vengan xa xi vari tang iaxa be vatit meulien e di pol ni moletin xil e di misa holesok xil vus mi xil. ²⁶Ngggo moletin tei takes, xi pol ni hisit moletin sav xil e miling xil latasil ladi ut ngasen e ut etan. Moletin xil ngasen, xi miling xat rute xil xa xil liti en e di buli xat melengien xil nae xa liti en ihe nousav itep. ²⁷Xi pol ni xil tangan ti lilang vesi, lilang vesi vuma ... xos ti e xil likameti, vengan xa Hi tara ti sotin ra xir. ²⁸Ngggoni ngan taxa moletin tei biteni bitene,
 'Ngggo xeihen nan kestang, xir di rameul, di rakakao e di rapol ni neta ngan.'

Ngggoni ngan taxa rut moletin te tisen xil namim latetisi latehit,
 'Xir mun rabe horamue nan xil.'

²⁹Reitin, Hi pol ni xir xa rabe horamue xil xati nan rameul radi. Ma vengan xa ngak ak, rinanemi ti rinahit xi nggoni nanao tei xa tameul ti, xa moletin tang pol ni nggo gol mu silva mu hat nggo metisouen nan. ³⁰Tetiamu, e melele xa moletin xil latnakil ti mu Hi, xi tenasa pangasien ti ve hisit tesaen xil vus nae. E taxeak, xi di misemae ni moletin xil vus e ut ngasen tangan lihiles ra tesaen xil nae. ³¹Xil lihiles meulien nae vengan xa xi teling xat melengien te lepisien tei ngamu. Tehosei moletin tei xa ilepis moletin xil vus e sexien tei xa momal. !Moletin xa Hi tehosei iaxa tepol ni temeul rilomun ra maten tangan xir vus rikila!"

³²Melele xa moletin xil lalong Pol misep usil moletin tei xa meul rilomun ra maten, rute xil lapol pepamen ni e rute xil labiteni labit, "Temem bei malong xoux usep usil netak vatei mun mi xamem." ³³Di, Pol be reling xil e von totanen ak. ³⁴Rut moletin xil lamos en e mei laneket e Iesu. Tei e xil tehe moletin tei te kaonsel te rute ak, hisen Daionaisas. Atou tei mun mineket en, hisen Damaris, del rut moletin sav xil mun.

Pol Be Korin e Moletin Holu Mei Laneket

18 ¹Dutou ni melengien xil xa Pol tete Atens, xi ba sung be Korin. ²E inggak, Pol ba pus Siu tei, hisen Akuila xa be ngan Pontas. Xi temei rohon tang e Korin tetel atou nan xa hisen Prisila. Xalu lutexo Itali lutemei e Korin melele xa Suv Toto Klodias tesa rae tei tehit Siu xil vus lihe reling Rom e liha mun e von ne. Pol ba misao ni xalu. ³E vengan xa xalu di lupol ni nim tavolin xil nggoni ngan taxa xi mun tesukul ven, xi de visal xalu e nim nalu e latepol vituei. ⁴E Sabat xil vus, Pol be nim te pispisien e di misepin del Siu xil e del ngan xil xa latave Siu ti tangan liling neketen nae vate e Iesu.

⁵E melele xa Saelas xal Timoti lunggo Masedonia lumei, Pol miling polien nan te nim tavolin e misa xi ve polien te setuen kestang. Xi di misep kila mi Siu xil e nim te pispisien nae xa Iesu be ngan xa Hi tehit xati tehit imei iteh meulien e moletin xil. ⁶E xil lasin sepinien nan e di lasep sisili. Ma xi mirang meas ra eising nan ba xat xil e biteni mi xil bitene, “!Pangasien xa imei xat xamim ihe namim tang. Inou, navan tovuol en! !Taxeak, niha ti nisetu sung mi ngan xil xa latave Siu ti!” ⁷Di, Pol miling Siu xil, ba de nim ma moletin tei xa tave Siu ti e di mot mi Hi, hisen Titias Sastas. Nim man dat sangas ni nim te pispisien na Siu xil. ⁸Vat te nim te pispisien ak, hisen Krispas. Xi, del ngan xil vus xa ladi tim san, lateling neketen nae e Suv Iesu. E moletin sav holu mun xa ladi e Korin, melele xa lataeong ni sepinien na Pol, xil mun laneket, ma lamae ni Pol derir ni xil e oei.

⁹E vongien tei, Suv misepin mi Pol nggo metuveen tei bitene, “!Tit usetu tang e ulum nakan ti! !Onatat votei ti! ¹⁰Vengan xa inou, nadat visaluk e di nadutou ni xouk. Ninasak ni ti neta naxui xouk vengan xa moletin xil holu xa lade taon ak labe navan.” ¹¹Misak ni Pol tete Korin haram tei e rute, di tepispisi mi moletin xil usil sepinien na Hi.

¹²Melele xa Pol teta tamu e Korin, kavmen tahal Rom teling xoles vat te provins tahal Akeia. Vat hu xa nggur von nen, hisen Kalio. Melele xa Siu xil lapusi mak, xil vus mei laba ladal xat Pol, e langguri be kot pe met Kalio. ¹³Xil labiteni mini labitene, “!Moletin ak di misak pisi vapol ni moletin namem xil ti lamot mi Hi e sexien tei xa nggur xoteh rae namem xil!”

¹⁴Pol tasepin ti mu, e Kalio misepin mi xil bitene, “Xamim, Siu xil, xosxa xamim mubit moletin ak pol ni neta tei xa misa ba xat rae xil na mol-Rom mu ve neta sav tei xa eilep, ma momal tang tangan inou niteong ni xamim. ¹⁵E vengan xa di mungor usil rut sepinien xil, usil his moletin xil, e usil rae xil namim tang, ma xamim tang mumal ni. Inou ieok ti tavei tangan nilepis sexien xil ak.” ¹⁶Ma misil rerat xil ra kot nan. ¹⁷Di, vanut moletin xil xa ladi, langgur xat Sostenis xa be vat te nim te pispisien na Siu xil e labasi e von kot vari. Kalio pusi, e bit nakil ti.

Pol Dilomun Be Antiok

¹⁸Pol di mi Kristin xil e taon tahal Korin melengien holu mu. Di, bit vatilomun vahe Siria. Misak ni misep ling xil e ba be Senkaria tangan latohur tuturil en, e Prisila xal Akuila lube xatel latoba. Melele xa latduxoh Senkaria, Pol kot hilin be vatumas vengan xa xi pol vuol ni hitxatien tei xa tepol ni tetel Hi.^w Di, latnggur tuturil tei latoba latobe provins tahal Siria. ¹⁹Lamei laduxoh

^w 18:18 E sexien na Siu xil, melele xa moletin tei pol vuol ni hitxatien tei xa pol ni tetel Hi, di mikot hilin mei be vatumas.

Episis, e latobe nim te pispisien e Pol di mitumul del Siu xil en. Di, Pol bit iling Prisila xal Akuila inggak. ²⁰Siu xil lasisi tangan vata vatel xil melengien vahis mun e xi tamaen ni ti. ²¹E melele xa miling xil, xi biteni bit, “Xosxa Hi imae ni, ma nitilomun nimei visal xamim.” Di, miling Episis nggo tuturil ba.

²²Tuturil ba be Sesarea e miling Pol da en. Di, mikakao be Serusalem e ba misao ni ngan xil te sias inggak. Pol da vuteili tang en, di, ba be Antiok.^x ²³Pol de inggak melengien vahis, di, miling Antiok ba tangan vasao ni vanut Kristin xil e provins tahal Kalesia e provins tahal Prikia. E rute xil vus, di dutou ni ngan xil ak tangan neketen nae e Iesu ixeih mu.

Apolos Mei Be Moletin Te Pispisien e Sias tahal Episis

²⁴E melele nen ak, Siu tei tahal Aleksandria temei e Episis, hisen Apolos. Xi be moletin tei xa di misepin kuhi mak e mikil kuh sepinien xil xa di e Vanuvei na Hi. ²⁵Xi di pispisi mi moletin xil del eimaen. E pispisien nan xil momal usil longeongen hos usil Suv Iesu, e mikil kes ni teriren tang xa Sion di tepol ni ni oei. ²⁶E melele xa Apolos di misepin del xeihen e nim te pispisien na Siu xil, Prisila xal Akuila lulonge. Misak ni luba lungguri latbe tim, e lusep kil longeongen hos mini tangan vakil kuhi. ²⁷Di, Apolos pol ni nenemien nan tangan ihe Akeia, ma Kristin xil xa ladi Episis ladutou ni e ladis uvei tei ba ni Kristin sav xil xa ladi Akeia tangan xa lihur pilei melele xa ha istal. E melele xa ba mistal visal xil, xi dutou ni ngan xil xa mei laneket nggo eheien hos na Hi. ²⁸Melele xa Siu xil te rute ak mei di lasep tetavoe mi Kristin xil pe met moletin xil, Apolos pisen kila nggo Vanuvei na Hi xa Iesu be Kristo xa Hi tehosei.

Moletin Xil tahal Episis Mei Lapolu ni Ninin Eo

19 ¹Melele xa Apolos di tamu e Korin, Pol mikakao nggo vathu xil te provins tahal Kalesia e mei mistal e Episis. E inggak, xi mikamet rut Kristin xil. ²Ma misis xil bitene, “?Melele xa mei muneket e Hi, Ninin Eo temei e xamim?”

E xil labit rilomun ni mini labit, “E-e. Xamem matakil ti mu xa Ninin Eo be naha.”

³Ma Pol misis xil mun bitene, “?Ma xamim munggur hisit teriren eah?”

E xil labitene mini labit, “Manggur hisit teriren xa nggoni ngan taxa Sion di tepol ni.”

⁴Ma Pol biteni mi xil bit, “Teriren xa Sion tepol ni tehe na moletin xil tangan lihiles ra tesaen nae xil. E xi tehiteni mi Siu xil tangan lineket e ngan xa imei itutou ni, ngan ak be Iesu.”

⁵Melele xa lalong sepinien ak, lamae ni Pol xatel latobaptaes ni xil e oei e his Suv Iesu. ⁶Di, Pol miling hen e xil, e Ninin Eo mei polu e xil,

^x 18:22 Antiok be 480 kilomita ra hal Serusalem.

ma di lasepin ni sepinien sav xil e di lake mese ni sepinien eo xil na Hi. 7Moletin xil ak labe lu e le (12).

⁸Aveti tol (3) iaxa Pol dit tehe nim te pispisien na Siu xil e di tesep tetavoe tetel moletin xil e tesep kila mi xil suse xa Hi mei ihe suv toto e meulien nae. Xi tesepin mi xil, e ulin tenakan ti. ⁹E rut ngan xil, vatie nggeih ma lataneket ti e sepinien na Pol. E pe met moletin xil, moletin xil ak di laso sepinien xil xa misa ba ni Kristin xil xa langgusil xat ‘Suse na Suv Iesu’. Misak ni Pol miling xil e midel ngan xil xa laneket langgusili. E melengien xil vus, be von vitueien na moletin tei, hisen Tiranas, e di misep tetavoe del moletin xil usil suse xa Hi mei ihe suv toto e meulien nae. ¹⁰Huram lu (2), Pol di tepol ni temak, ma moletin xil vus xa ladi e provins tahal Esia latelong sepinien usil Suv Iesu, Siu xil e ngan tesav xil mun xa latave Siu ti.

Horam Maxoe Xil na Skeva Lasak Tengan Lapol ni Merekel Tova e His Iesu

¹¹E melele nen ak, Hi di tepol ni hisit merekela sav xil tehe holu latestal latexo Pol. ¹²Mak iaxa, moletin xil di laleh kaliko te vetin nan tetel eising te polien nan xil tang, ba di latesa ni mi ngan xil xa latemesei. Melele xa xil laduxoli, meseien nae xil tevus reling xil e temat xil mun latlesae reling xil. ¹³E melele nen ak, vanut moletin xil xa labe Siu di latekapis tengen lavol rerat temat xil ra moletin xil. Xil mun labit lipol ni itel his Suv Iesu. Ma melele xa di lapol, xil kekes di biteni mi temat xil mak, “!Nasemae ni xouk e his Iesu xa Pol di misetu usili tengen uhe reling moletin ak!”

¹⁴E rute ak, Vatixar tei na pris xil teta, hisen Skeva, e horamue nan xil labe lu e he sav (7). Xil latehe vanut moletin tei xa di latepol ni temak. ¹⁵Ma vatei, melele xa di lasak pisi tengen lapol ni vamak, ninin tesa tei biteni mi xil bitene, “Iesu nakila, e Pol mun nakila. ?E xamim, mube visi?”

¹⁶Di, moletin xa temat di en but xat xatel e bas purun xatel misa. Dal papas eising nae reling xil e mikal kukul xil. Horam maxoe xil ak langgul ni re e lastal laloh hon tang reling tim san. ¹⁷Melele xa Siu xil del ngan xil xa latave Siu ti lalongeong ni, xil uli xil mikan pupu. E moletin xil vus tahal Episis lapet rat his Iesu e lamerere ni. ¹⁸Moletin xil hao mei laneket, e pe met moletin xil, labit rerat tesaen xil nae. ¹⁹Xil hao xa di latepol ni eimas, laleh viton vanuvei nae xil xa sepinien te eimas di en, e mei ladin ni pe met moletin xil. E melele xa labit lakil kuh ti vatu nen, lakameti xa vatu nen duxoh milian be hanutap lu e hexalu mun (50,000,000). ²⁰Mak, ma Hi pisen xeihen nan e longeongen usil Iesu Kristo mei mikapis e ut ngasen, e moletin hao mu laneket en.

Vaen Tei Mistal e Episis

²¹Dutou ni ngan xa holesok xil ak testal, Pol pol ni nenemien nan tengen ikakao ha ixo provins tahal Masedonia e tahal Akeia, ti, ihe Serusalem.

Xi minemi bit, “Melele xa nihe Serusalem ivus, niha sung e Rom.” ²²Ma xi misil moletin lu xa di ludutou ni tangan laltiamu ni lalhe Masedonia, hisealu Timoti e Ustras. E xi da luvolvu tamu e provins tahal Asia.

²³E melele xa Pol da tamu e Asia, iaxa vaeen tei xa eilep mistal e hal Episis ve Kristin xil xa di langgusil xat ‘Suse na Suv Iesu’. ²⁴E rute ak, moletin tei da en xa di pol ni nanao xil ni silva xa nggur nini nim te moten na hi tei xa lakesi ni hi Artemis. Moletin ak, hisen Demitrias. Xi, del moletin nan xil mun, di langgur vatu xa eilep nggo en. ²⁵Ma mikes viton moletin nan xil vus del rute sav xil mun xa polien nae pipin tang. Di, xi biteni mi xil bitene, “Tiramue xil, mukila xa xir rapus hosien nar nggo e polien ak. ²⁶Xamim di mupusi e di mulongeong ni naha xa moletin ak di pol ni. Pol ak di biteni xa hi xil xa moletin xil tang di lapol ni, xil latave reitin ti. Xi pol ni moletin xil hao e Episis, e provins tahal Asia mun, mei lake reitin e nenemien ak e lastokovein moten nae ba mi Hi Artemis. ²⁷!Ngan ak misa pupu mi xir! Sepinien nan ipurun meulien te polien nar. E tave ti ngan ak kestang, sexien ak isak ni mun xa moletin xil linamerere ni ti mun nim te moten na Hi Artemis, hi nar xa be eilep pupu. Hi nar, moletin xil vus di lamerere ni, e provins tahal Asia del ut xil ngasen e ut etan. !E sepinien na moletin ak ipol ni his Hi Artemis mei ihe neta sav tang! !Ngan ak misa tova tang!”

²⁸Melele xa vanut moletin xil ak lalong sepinien xil ak, iexil mikat pupu. Ma latamea di lakekei ni nggeih labit, “!Artemis be hi na mol-Episis! !Rapat rat hisen!” ²⁹Rumen te ekaten mikapis e taon ak, e moletin xil ngasen mei lamos e vanut moletin xil ak. Di, xil ladal xat moletin lu te provins tahal Masedonia xa di lunggusil Pol lumei, hisealu Keas e Aristakas. Ladal kakao ni xalu mei ba laling xalu ludi e von vitueien nae xa eilep. ³⁰Pol ien bei vahe pe met moletin xil ak ha vasepin mi xil, e Kristin xil te rute ak latamae ni ti vaha. ³¹Rut vat xil mun te provins ak, xa labe timue nan lasa sepinien ba da xole tangan nasak pisi ti nave von vitueien ak. ³²E rute ak, moletin xil di lapol ni rumen xa mahulong. Rut ngan xil di lameun ni neta tei. E ngan tesav xil di lameun ni neta sav mun. E moletin holu latakil ti veneh ma lamei vituei inggak. ³³Di, rut Siu xil ladivin vat tei nae mei misoh pe met moletin xil tangan mei isep motin rin na Siu xil, hisen Aleksanda. E melele xa moletin xil lapusi, lanemi labit xos xi iaxa be vat te vaeen ak. Di, Aleksanda misa hen be nesao tangan lati votei. ³⁴E melele xa lapus kila xa xi be Siu tei^y, xil vus lakekei ni nggeih labit, “!Artemis be hi na mol-Episis! !Rapat rat hisen!” Xil langgulehi lameun mak ba vuma ... duxoh haoa lu (2).

³⁵Ba vuma, klak te taon ak mei misak ni moletin xil ladi votei. Di, biteni mi xil bitene, “!Moletin xil tahal Episis! Moletin xil vus lakila xa

^y 19:34 Moletin xil lanemi labit Kristin xil e Siu xil latasav ti, labe hisit moletin tei takes.

taon nar iaxa di miketeh xol nim te moten na hi Artemis. E xir di raketeh xol hat eo teni xa temot texo ut nesao teme i etan. ³⁶Moletin tovuol vakila vahit netak be luvosen. Ma xamem muta merou tang, e munapol ni ti sexien xil xa mitallang. ³⁷Xamim mudel moletin xalu ak lumei inggak. E xalu lutenakan ni ti neta e nim te moten na hi nar, mu lutenaso ti sepinien xil xa misa vaha ni. ³⁸Xosxa Demitrias del moletin te polien nan xil iexil bei tangan laso sepinien tova xa misa vaha ni moletin tei, xil likila lipol ni sung mi moletin xati te lepisien e melengien xati teni. Ti, litotan, e moletin ak ilepis ngongoren nae sung. ³⁹E xosxa iemim bei neta ti mun, ma mutatil melengien xati te totanen nar xa ti imei, e moletin xil te kaonsel te taon ak iaxa imal ni sung. ⁴⁰Naha xa rapol ni xosali ak tamal ti! E vat xil te taon nar likila lileh xir ngasen rihe von koten. E xosxa xil lipol ni imak, ma xir rasakras ravit mese ni mi xil ravit rapol ni rumen xa eilep xiak veneh.” ⁴¹Melele xa misepin bus, xi misil rerat moletin xil ra von vitueien ak.

Pol Misao ni Kristin Xil e Provins Xalu tahal Masedonia e Akeia

20 ¹Dutou ni xa rumen te ekaten ak be tan, Pol mikes viton Kristin xil tahal Episis e misel xat xil. Di, misep ling xil e ba be provins tahal Masedonia. ²Di, e rute xil vus xa di tekapis en, xi di misao ni Kristin xil e di misa sepinien te selxatien ba vatutou ni xil. Di, miling xil ba be provins tahal Akeia. ³Di, tekapis taon xil e provins ak tehe aveti tol (3). E melele xa di bue xat xi tangan ihe reling rute ak ha ihe provins tahal Siria, maxa ni e milonge xa rut Siu xil tahal Siria di lapol ni lingxatien tei tangan lihas vini e suse nan. Misak ni xi biles nenemien nan tangan itilomun ihusil suse sav ha ixo Masedonia. ⁴Pol mikakao del moletin xil ak: Sopata xa be nat Piras tahal Beria; Aristakas xal Sekandas tahal Tesolonaeka; Ngeas tahal Derbi; Titikas e Tropimas xa lube tahal Esia; e Timoti mun xa be ngan Listra tei. ⁵Melele xa laduxoh Pilipae, rut moletin xil ak langgo tuturil tei, ladiamu labe taon tahal Troas tangan litatil Pol en. ⁶E Pol de Pilipae duxoh melele xa Anien te Beret xa Is Tovuol En bus. Inou Luk tehe xamel del rut Kristin xil mun. Di, manggo tuturil e Pilipae e maloh melengien lim, di, ba maduxoh Troas. E inggak, mabituei del ngan xil xa latetiamu, e madi duxoh wik tei.

⁷E melele xa di mabue xat xamem tangan maling rute ak, mamei vituei e Sarere vongien tangan mavur anien eo na Suv. Di, Pol misetu mi moletin xil e dit misepin ba vuma ... duxoh hilaep te vongien. Pol pol ni mak vengan xa mikila xa makoe tang ihe reling xil. ⁸E nim xa madotan en, madi e von toen xa de nesao xa be tol nen, e laet holu di lapili en. ⁹E melele nen ak, horam maxoe tei di dotan de windo, hisen Iutikas. E melele xa Pol di tamu misepin, horam maxoe ak miteong ni ba vuma ... meten minoh xa minoh, ma pat. Latemanin e mot nggo windo nesao

mei mirum e tan. E melele xa ba lapusi, e xi mat ngamu. ¹⁰E Pol be tan ba por xati e di misa hen xole. Di, biteni mi xil bitene. “!Munanexo ti, xi tamat ti, meul tang da!” ¹¹Di, Pol del moletin sav xil ladilomun labe von toen xa de nesao, e langganien. Di, Pol misepin rilomun mi xil ba vuma ... ut milan. Bus, Pol miling xil ba. ¹²E horam maxoe ak, ladela labe tim san, e lamaal himetu vengan xa xi meul tang da.

Pol Be Malaetas e Misep Ling Elda Xil tahal Episis

¹³Ma xamem mabit mava. E Pol diamu ni xamem mikakao nggusil suse xa tamure tang e bit itatil xamem e Asos.^z E xamem mabe bien tangan muxo tuturil muhusil suse xa teviei muhe Asos, e muhur Pol ihe xamem e rute ak. ¹⁴E melele xa maduxoh Asos, mapusi xa Pol di datil xamem ngamu en. Ma mangguri bemei e tuturil e maloh mabe Mitilen. ¹⁵Di, mamea inggak maloh maba, be ut milan, e maduxoh Kios. Di, maloh vongien, e makoe nen, be maduxoh Samos. E visuvong nen, matle sal ba maduxoh Malaetas sung, ¹⁶vengan xa Pol tepol ni nenemien nan tehit matavi e Episis vengan xa ien ti tavei vahas melengien vahe holu e provins tahal Asia. Mipol ni mak vengan xa bit vasak pisi vatuxoh Serusalem mu, vati vahe melengien te Pentekos sung.^a

¹⁷Melele xa Pol da tamu e Malaetas, xi misa sepinien nan ba mi elda xil te sias tahal Episis bit limei lipusi. ¹⁸E melele xa lastal, xi dotan del xil e misepin mi xil bitene, “Xami mukil sexien xil navan melele xa natemei nateti mi xamim e provins tahal Asia, e melengien kokot teni tetuxoh melengien xa nateling xamim nateha. ¹⁹E melele nen ak, di natepol ni polien na Suv tetel nenemien xa be tan e simetok teleh ve xamim. Natepol ni temak, tave ti neta xa melengien holu natekameti te xeih ve lingxatien xil xa rut Siu xil latepol ni teta xat nou. ²⁰Mukila xa natesa sen holesok xil xa ti vatutou ni meulien namim texo setuen e pispisien navan xil xa natepol ni pe met moletin xil e e tim kekes sami xil. Natnasoson ti neta vari mi xamim. ²¹Natesa sepinien te selxatien te xeih mi xamim vus; mi xamim xa mube Siu, e mi xamim xa mutave Siu ti tangan muhiles ra tesaen xil namim e mumei visal Hi. E natesel xat xamim mun tangan muling neketen namim ixeh e Suv Iesu.

²²“E taxeak, Ninin Eo di del nou tangan name Serusalem. E natakil ti naha tova xa ixui nou en. ²³E rute xil vus xa di natesao en, Ninin Eo tepisen ni minou xa nave nousav ti, nihe nim te xeih e ti nilong pangas nou. ²⁴Tave ti neta xa mak, nanem mele ni meulien navan tang. Ieok bei taxa nipol vuol ni polien xa Suv Iesu tesa ni minou tangan ti nihithit

^z 20:13 Taon tahal Asos be 32 kilomita nggo ut ra hal Troas, e 80 kilomita nggo tas.

^a 20:16 Pentekos be melengien hanutap lu e hexalu mun (50) dutou ni Anien te Tavien. Melengien ak iaxa Ninin Eo mei polu e moletin xil xa laneket kokot (Polien 2:1-4).

longeongen hos usil eheien hos na Hi. Ieok bei tang tangan xa ti nihusil lohen xa Suv teling nou en ituxoh hoxalite teni.

²⁵“Melele xa nateti tamu visal xamim, natekapis ut namim xil ngasen e di natesetu mi xamim vus usil suse xa Hi imei ihe suv toto e meulien na moletin xil. E taxeak, nakila xa xamim vus musakras mupus rilomun ni nou. ²⁶Mak, ma e xosali ak, ieok bei nabit mese ni mi xamim xa xosxa tei e xamim ikesae e taling ti mu neketen nan e Iesu, inou navan tovuol en. ²⁷Vengan xa inou natnasoson ti neta mi xamim. E-e, natesep vuol ni holesok xil xa Hi ien bei vapol ni e meulien na moletin xil. ²⁸Mak, ma muxuxou kuhi ve xamim e ve moletin xil na Hi xa Ninin Eo miling xil ladi e hemim. Ma mulaxat kuh xil vengan xa ngan xil ak labe Sias na Hi xa texal rati ni re natnali xati. ²⁹Nakila xa itutou ni ngan xa niha, ngan xil limei listal e lisak purun xamim ixoni kuli reran xil lapol ni mi sulut sipsip xil. ³⁰E ngan xil mun listal lixo vanut xamim mun tang, mei lihiles reitinen na Hi e lisep luvos Kristin sav xil tangan ha lihusil pispisien xil nae. ³¹!Mak, ma muxuxou kuhi ve xamim! E munem usil haram tol (3) xa nateti mi xamim, e di natesel xat xamim e melengien e vongien tetel simetok xa di teleh.

³²“Ma xosali, naling xamim pe he Hi. Sepinien usil eheien hos nan isak ni neketen namim ixeih. E nggo sepinien xil nan, Hi di bit xati xa isa tuxolxatien mi xamim e mi ngan xil vus xa tepol ni xil labe moletin eo nan. ³³Melele xa nateti mi xamim, natnasis ti moletin tangan vasa vatu mu eising minou. ³⁴Xami mukil kuhi mak xa inou di natepol tetel heok xalu tangan di matekamet holesok xil xa inou tetel moletin navan xil di iemem tehei. ³⁵Texo sexien xil navan xa natepol ni e pe metemim, natepisen ni xa melele xa rapol nggeih, ma rakila ti ritutou ni ngan xil xa lamerou. Ixoni sepinien xa Suv Iesu vari tang tesepin ni tehiti, ‘Sien xa iti mi ngan xa di misa tutouen mi mosav ili sien xa iti mi ngan xa di nggur tutouen nggo mosav tang.’ ”

³⁶Melele xa Pol misepin bus, mitingeiril be tan del xil e misis. ³⁷Xil vus lamuis e lasa he ngga xole. Di, lapesum e vin e labiteni mini labit, “Oba li.” ³⁸Lalonge misa himetu vengan xa Pol tehiteni mi xil xa xil linapus ti mun. Ma langgusili laba, lalingi be tuturil.

Pol Be Serusalem

21 ¹Melele xa masep ling xil bus, mabe tuturil ak maba. Manggur xoteh tas, e mei maduxoh aelan tahal Kos. Di, makoe nen, mei maduxoh aelan tahal Rods. Bus, manggo inggak, mei mabe taon tahal Patara. ²E inggak mapus tuturil tei xa di labue xati tangan vahe Vonesia, ma mabut en maba. ³Ma maloh mei matavi e aelan tahal Saepras e rin xa be saot, di, ba maduxoh taon tahal Taer xa de provins tahal Siria. E inggak, tuturil miso rat holesok xil xa teti e vangite. ⁴E rute ak, makamet

rut Kristin xil, ma madi visal xil wik tei. E melele xa madi tamu visal xil, xeihen te Ninin Eo bemei e xil, ma lasep xol Pol tangan nava ti e Serusalem. ⁵E melele xa melengien pipin tangan maling xil mava, Kristin xil vus te taon ak, tiramue xil, atou nae xil e horamue nae xil mun, be xamem maling taon ak tangan va laling xamem e bien. Di, mabe tan inggak, matingeiril e masis. ⁶Di, lasep ling xamem. Bus, xamem mabe tuturil, e xil ladilomun labe tim sae.

⁷E suse xa manggo en, tuturil miling Taer be Patolemas. E inggak, masao ni Kristin xil del memaalen e madi visal xil duxoh makoe. ⁸E makoe nen, maling Patolemas e maloh maba maduxoh Sesaria. E inggak, madi e tim sa Evanselis Pilip. Xi be tei e dikon kokot xil xa labe lu e he sav (7).^b ⁹Natnahin xil labe hat (4) e latatali ti mu. Xil labe provet xil e dit lake mese ni sepinien xil xa Hi di misa ni mi xil.

¹⁰Madi inggak melengien vahis, e provet tei, hisen Akabas,^c nggo Sudea mei mistal. ¹¹Xi bemei visal xamem, nggur rat atuatu na Pol e bar xat len e hen xalu ni. Di, mike mese ni mi xamem bitene, “Ninin Eo iaxa misepin ni mak bitene, ‘Moletin xa atuatu nan xiak, Siu xil livar xati imak melele xa ha ituxoh Serusalem. Ti, lisa rati ihe he ngan xil xa latave Siu ti.’”

¹²Melele xa malonge mak, xamem del moletin sav tatei xil mun xa ladi inggak madak kes Pol tangan nava ti mu e Serusalem. ¹³Ma xi bit rilomun ni mi xamem bitene, “?Veneh ma di mumuis? Maxa ni di musak ni nou mun, tinok muis. Inou, nabue xat nou tuei tangan livar xat nou mu lihas nou mun nimat e Serusalem ve neketen navan e Suv Iesu.”

¹⁴Melele xa mapusi xa masakras maviles nenemien nan, ma malingi nga tang, e mabiteni mini mabitene, “Suv ipol ni mi xoux ixoni ngan xa xi ien bei.”

¹⁵Melengien vahis mitavi, di, mabue xat xamem tangan muling Sesaria e muhe Serusalem. ¹⁶Rut Kristin xil tahal Sesaria lamei labituei del xamem e ladel xamem maba mabe tim sa moletin xa mupat itela, hisen Neson tahal Saepras. Xi be tei e moletin xil xa lateneket kokot e Iesu.

Pol Ba Pus Kristin Xil e Serusalem

¹⁷Melele xa ba mastal e Serusalem, Kristin xil langgur pilei xamem del memaalen. ¹⁸E makoe nen, Pol be xamem maba tangan ha mapus Temis e elda sav xil mun te sias. ¹⁹Di, Pol bit bos makoe mi xil e misep usili mi xil holesok xil ngasen xa Hi di tepol ni mi ngan xil xa latave Siu ti texo polien xil nan.

²⁰Melele xa Temis del elda sav xil lalong sepinien xil na Pol, xil vus lames Hi ven. Di, labiteni mini labitene, “Tua Pol. ?Opusi? Siu xil hao xa

^b 21:8 Pol 6:1-7 ^c 21:10 Pol 11:28

hao latemei lateneket ngamu e Suv Iesu. E xil vus nenemien nae nggeih tova tang tangan lihusil xat Rae xil na Mosis. ²¹Xil di latelongeong ni xa di opisipisi mi Siu xil xa ladi tan xil na moletin xil xa latave Siu ti tangan ti linahusil ti mun Rae xil na Mosis. Latelongeong ni mun xa di otehiteni mi xil tangan linapol ni horamue nae xil ti linave vexaho, e linahusil xat ti mun sexien matu xil na Siu xil. ²²Navehi ti, xil lilongeong ni xa xouk otestal ngamu inggak. ?Mak, ma ripol ni itep? ²³Xamem iemem bei xa upol ni imak: moletin hat inggak latepol ni hitxatien tei tetel Hi. ²⁴Ha uhe xamim muhe Nim Eo na Hi e muhusil xat sexien xil te serep moletin en. Ti, uxa! vongoro xil namim xa ha musa ni mi pris xil.^d Melele xa mupol vuol ni, ma mukila mukot hilimim mei muhe vatumas. Imak, ma moletin xil vus lipus kila xa longeongen tesa xa di lalongeong ni usuluk, tave reitin ti. Xil lipus kila sung xa xouk di olong xat Rae xil na Mosis e di tamu omerere ni xil. ²⁵E usil ngan xil xa latave Siu ti xa lamei labe Kristin, xamem matesa uvei tei tuei tehat mi xil. E uvei ak, matesis xil tangan linaxa ti anien xa latesa ni teha mi nanao xil, e linaxa ti mun anien xa ra di xati, mu linaxa ti vongoro xa latesar xoteh hurraen tang. E matesis xil mun tangan linapol ni ti sexien tesa xil ti natel atou mu tiramue na mosav.”

²⁶Pol mae ni, ma makoe nen, mileh tiramue xil ak laba tangan lava lapol kokot ni sexien xil te serep moletin en. Di, Pol ba be vloh te Nim Eo na Hi e misep mese ni mi pris xil xa lapol kokot ni sexien te serep moletin en ngamu. Di, miling xat melengien mun vari xa xil litomun mei lisa sanien eo nae kekes en.

Ladal Xat Pol e Nim Eo na Hi

²⁷E melele xa melengien lu e he sav (7) sangas mei vatavi tangan Pol vatel moletin xatel mun ha latopol vuol ni sexien xil te serep moletin xil en, rut Siu ngan xil xa latexo provins tahal Esia lamei. Melele xa xil lamei e vloh te Nim Eo, xil lapus kil Pol, ma lasi petine vanut moletin xil tangan liha lital xati. ²⁸Melele xa ladal xati, lakei nggeih ba ni moletin xil labitene, “!Tua namem xil! !Mumei! Mututou ni xamem. Moletin ak vari iaxa di mikapis e rute xil vus e di misa pispisien xil xa misa ba xat xir tahal Isrel, ba xat Rae xil xa Mosis tesa ni mi xir, e ba xat Nim Eo nar. E taxeak, xi di mileh moletin xil xa latave Siu ti lamei e Nim Eo ak vari, e di misak ni rute ak tave ut eo ti mun pe met Hi.” ²⁹Lasepin ni mak vengan xa melele xa latepus Pol e taon, xi tehe xal moletin tei tahal Episis xa tave Siu ti xa hisen Tropimas. E xil latenemi latehit Pol iaxa tehuri lutemei e vloh te Nim Eo ak.

^d 21:24 Melele xa Siu xil lapol ni sexien xil te serep moletin en, xil lisa sanien eo te memesien iha mi Hi xa mak: mae lu del sipsip tei ve moletin xil kekes. Di, lakila lakot hilixil mei lave vatumas tangan lapien ni xa meulien nae memese pe met Hi.

³⁰Ngan ak misak ni rumen te ekaten miloh mikapis bivil taon ak, e moletin xil laloh lamei vituei. Ladal xat Pol, e ladel kakao ni mistal ra vloh te Nim Eo ak. E vatakes, lakoe xol puiteh xil teni. ³¹Melele xa moletin xil ak di lasak tangan lavas vin Pol, vatixar tei na moletin xil te vaeen milongcong ni xa vaeen tei xa mahulong mistal e Serusalem. ³²Ma vatakes, vatixar ak mileh viton vat sav xil del moletin te vaeen xil nae,^e e latemanon mei labe visal vanut moletin xil ak. E melele xa xil lapus ngan xil te vaeen, lastokovein Pol e latavasi ti mun.

³³Vatixar na moletin xil te vaeen mikakao be visal Pol, dal xati, e misemae ni tangan moletin nan xil livar xati ni sen lu. Di, misis pilei vanut moletin xil bitene, “?Moletin ak be visi? ?Xi pol ni naha?” ³⁴Rut moletin xil lakekei ni neta ngan, e rute ngan xil mun lakekei ni neta sav. Vanut moletin xil latangal holu, misak ni vatixar ak misakras valong kuh vatit rumen ak xa testal tetep. Ma misemae ni tangan moletin nan xil lihur Pol ha lilingi ite nim ma moletin te vaeen xil. ³⁵E melele xa ladel Pol lamei sangas ni nim mae e labit lipeou lihusil von kakaoen lihe nim, moletin xil te vaeen lapo rat Pol dat nesao vengan xa vanut moletin xil ak, nenemien nae ngegeh pupu tangan lital rat Pol ra he xil, ha lihasi. ³⁶Siu xil langgulehi langgusili e lamuis kei be nesao labitene, “!Ravasi! !Ravasi vamat!”

Pol Misep Kil Rin Nan Pe Met Moletin Xil

³⁷Melele xa moletin te vaeen xil lamei sangas ni puiteh te nim mae, Pol misepin mi vatixar nae bitene, “?Nakila namit neta tei minuk?”

Ma vatixar ak biteni mini bitene, “?Ei, xouk okila osepin ni sepinien tahal Kris? ³⁸Inou di nanemi nabit xouk obe silixin tahal Isip xa testal tave nousav ti. Moletin ak teleh viton vanut moletin xil latehe taosen hat (4000) e latehe uruvuol aveti vahis xa mitavi tuei. Moletin tevae xuxusen nan xil latesak pisi tangan lapangei polien na kavmen tahal Rom.”

³⁹Pol bit rilomun ni mini bit, “E-e, tave nou ti. Inou nabe Siu tei xa nabe hortan tahal Tarsis, taon tei xa bos mak mu xa de provins tahal Silisia. Nasisuk tangan umae ni nou li nisepin vuteili mi vanut moletin xil ak.”

⁴⁰Vatixar ak mae ni, ma Pol misa hen be nesao tangan liti votei e misepin mi xil ni sepinien xati nae xa be Arameak, e xi biteni mak mi xil bitene,

22 ¹“!Toxoli xil e tata navan xil tahal Isrel, muteong ni nou! Nisak pisi nisep motin nou pe metemim.” ²Melele xa lalonge taxa di misepin mi xil nggo sepinien Arameak, ladi votei kuhi sung e lateong kuhi ni.

^e 21:32 E melengien ak, moletin te vaeen xil ak lateli handred lu (200).

Di, Pol misepin mi xil bitene, ³“Inou nabe Siu tei xa matestal e Tarsis e provins tahal Silisia. E natematu sung e Serusalem. Inggak, natesukul pe he Kameliel xa tepispisi kuhi minou usil Rae xil na avu nar xil. Natehusil xat Rae xil ak e eheien navan te xeih e Hi nggoni xamim vus xa mudi inggak xosali. ⁴Inou mun natepangei ngan xil xa latehusil xat Iesu ba vuma ... natesak ni xil holu lalel. Tiramue xil e atou xil mun, natetal xat xil vus e nateso xil lathe nim te xeih. ⁵Vahit musis pisi mi Vatixar te pris xil e vat xil te Kaonsel nar, ma xil lakila lavit rati xa sepinien navan be reitin. Xil iaxa latetis uvei xil tengan nalehi vaha mi tua nar xil xa labe Siu xa ladi Damaskas. Ma natehur uvei xil ak e nateha tengan nital xat Kristin xil te rute ak e nilah xil litolomun limei Serusalem, mei lilong pangas xil sung en.”

Pol Misep Usil Naha xa Testal Mini e Damaskas

⁶Pol biteni mun mi xil bitene, “Melele xa di natekakao natemei sangas ni Damaskas, e piniae vari, miehen tei xa minehin pupu texo ut nesao e mei telelup xol nou. ⁷Misak ni natemot natehe tan e rae tei temei minou tehitene, ‘!Sol, Sol! ?Veneh ma di opangei nou del moletin navan xil mak?’

⁸“Ma inou natesis pilei natehit, ‘?Suv, xoux obe visi?’

“E xi tehiteni minou tehitene, ‘Inou Iesu tahal Nasaret xa di opangei.’

⁹Tiramue xil xa latehe xamem latepus miehen ak, e latnalong ti rae xa tesepin minou.

¹⁰“Ma natesisi natehit, ‘?Suv, inou nipol ni naha?’

“Ma Suv tehiteni minou tehitene, ‘!Tamea e uhe Damaskas! E inggak, moletin tei ihit mese ni mi xoux holesok xil vus xa Hi teling xati tengan ha ti upol ni.’ ¹¹Melele xa rae tesepin tevus, nate manin e metok tevar ve miehen xa telelup xol nou. Tesak ni ngan xil xa latehe xamem latetal xat heok e lateteli nou tang matehe Damaskas.

¹²“E taon nen ak, moletin tei mei tesao ni nou, hisen Ananaeas. Xi tehe Siu tei xa eheien nan nggeih e Hi. Xi tehusil vuol ni rae nar xil, e Siu xil vus xa ladi e taon ak di latemerere ni. ¹³Xi temei tesoh sangas visal nou e tehiteni minou tehitene, ‘!Toxoli Sol, keteh rilomun!’ E melele nen ak vari, nateketeh rilomun e natepusi. ¹⁴Di, xi tehiteni minou tehitene, ‘Hi na avu nar tehosei xoux tengan ukil nenemien nan, upus Moletin Eo te Polien nan, e ulong rae xati nan. ¹⁵Xi pol ni mak vengan tehosei xoux tengan ha ti uhit mese ni mi moletin xil vus to ut etan naha xa otepusi e otelonge. ¹⁶!Ma taxeak, onararu ti! !Mea soh! Utak kes Iesu tengan ipol ni mei umese ra tesaen xil nam. Uling nenesien nam iti en e umae ni nou niterir ni xoux.’

Hi Bosei Pol Tengan Ha Isetu mi Moletin Xil xa Latave Siu Ti

¹⁷“Dutou ni neta xa testal minou e Damaskas, natetilomun natemei e Serusalem. Melele xa natetak, ba di natesis e vloh te Nim Eo e natepus

metuveen tei. ¹⁸E metuveen ak, Suv Iesu testal e tesepin minou tehitene, ‘Temanon uhe reling Serusalem vengon xa moletin xil inggak lasakras lataeong ni sepinien nam usil nou.’

¹⁹“Ma natehit rilomun ni mini natehit, ‘Suv, xil lakil kuh nou mak. Lakila xa inou iaxa di natehe nim te pispisien xil e natetal xat ngan xil xa laneket e xouk en, e ba di natehas pangas xil. ²⁰Inou natete rute ak melele xa latehov vin Stivin xa tesa sepinien nam mi moletin xil. E inou natemae ve maten nan e natelaxat eising na ngan xil xa latehov vini.’

²¹“E Suv tehiteni minou tehitene, ‘!Ha! Nisilak tangan uhe ut xil xa sotin ve moletin xil xa latave Siu ti.’”

²²Moletin xil di lataeong kuh ni sepinien xil na Pol. E melele xa misep kokot ni usil ngan xil xa latave Siu ti, lake xati nggeih be nesao e labit, ‘!Ravasi! !Ravur xoteh meulien nan! !Tavos ti tangan xa xi vameul!’ ²³Xil lamuis kei, laso vulmeas be nesao, e lasil rerat eising nae te masoh e di labuil ni ba xati. ²⁴Vatixar na moletin xil te vaeen tahal Rom misemae ni moletin nan xil tangan lihur Pol ihe nim nae, e ha limeas pangasi tangan ihit kil ti veneh ma Siu xil ak di lamaxan ni. ²⁵E melele xa labar xati tangan lameas pangasi, Pol misepin mi vat tei na vanut moletin tei te vaeen xa di misoh sangas visali bitene, “?Rae na mol-Rom xil di mae ni tangan umeas hortan xati tei te kantri tahal Rom xosxa latallepisi ti mu?”

²⁶Melele xa vat ak milonge mak, ma xi ba pus vatixar nan e misisi bitene, “?Di opol ni naha xiak? !Moletin xai be hortan vari tang te kantri tahal Rom!”^f

²⁷Ma vatixar ak be visal Pol e misis pilei bitene, “!Hit pisi minou! ?Reitin mak xa xouk obe hortan xati te kantri tahal Rom?”

E Pol bit rilomun ni mini bit, “!o.”

²⁸Ma vatixar bit, “Inou natemei natehe hortan tei te kantri tahal Rom texo suse te xalen ni vatu tei xa mahulong.”

E Pol biteni mini bitene, “E inou, latepes xat nou en.”

²⁹Melele xa lalonge mak, vatakes, ngan xil xa lateti tangan lisis ravui labe relingi. E vatixar ak, ulin mikan pupu vengon xa bar xat Pol ngamu xa be hortan xati te kantri tahal Rom.

Pol Misoh Pe Met Kaonsel na Mol-Siu Xil

³⁰Vatixar na moletin xil te vaeen bit wakil kuh ti veneh ma Siu di lamaxan Pol ven. Misak ni, ut milan, misemae tangan lalal rerat sen xil ra he Pol. Di, misis vat xil na pris xil tangan litotan vituei itel moletin xil te Kaonsel. Di, del Pol ba misoh pe met xil.

^f **22:26** E melele nen ak, rae na mol-Rom xil biteni bit neta sav xosxa eilep xil labas purun movotei xil, e mi hortan xil te kantri tahal Rom xil, lasakras. Hortan xil ak lihe pe met moletin te lepisien itiamu, ti, isa pangasien teni mi xil.

23 ¹Di, Pol miketeh momal ba ni vat xil te Kaonsel ak, e misepin mi xil bitene, “Toxoli xil tahal Isrel, melele xa nanem usil polien xil e meulien navan mei duxoh xosali ak e suse xil ngasen xa natehusili, natave unoun ti pe met Hi.” ²Melele xa lalonge mak, Ananaeas xa be Vatixar na pris xil misemae ni ngan xil xa lasoh ladi visal Pol tangan lamuxol pon.

³Melele xa lamuxol pon, Pol bit rilomun ni mi Vatixar ak bit, “!Hi mun imuxol pom, xouk xa meulien nam be luvosen tang! Xouk onggoni seri nim tei xa lapen kuhi ni mei mieh, e muis di tamu en. !Odotan inggak tangan ti olepis nou vahusil Rae xil nar, e xouk vari tang onggur xoteh Rae xil ak melele xa otesemae tangan lamuxol pok!”

⁴Ma moletin xil xa lasoh ladi visal Pol labiteni mini labit, “Xouk, di osep sisil Vatixar na Hi vari tang iaxai.”

⁵Ma Pol bit rilomun ni mi xil bit, “Toxoli xil tahal Isrel, natnakil ti li xa xi be Vatixar na pris xil. Vahit nakila, ma ninapol ni ti namak vengan xa Vanuvei na Hi di biteni bit, ‘Munaso ti sepinien xil xa misa naha xat eilep tei xa di milaxat moletin namim xil.’⁸

⁶Melele xa Pol mipus kila xa rute e xil xa ladi e Kaonsel labe Satusi xil, e rute ngan xil mun labe Parasi xil, xi mikei nggeih bit, “Toxoli xil tahal Isrel, inou nabe Parasi tei xa nastal nggo vatimol na Parasi xil. !Namei nasoh inggak pe metemim vengan xa nake reitin xa moletin mikila imeul rilomun ra maten!”

⁷Melele xa misepin mak, Parasi xil ak del Satusi xil langor tova tang. Misak ni lalepas xil e vanute lu. ⁸Lapol ni mak vengan xa Satusi xil latake reitin ti xa moletin mikila imeul rilomun ra maten. E latake reitin ti mun xa masxaxa xil ladi, mu nini moletin xil mun da. E Parasi xil lake reitin e neta xatel vus ak. ⁹Ngongoren ak mei be himetu, e rut tisa xil te Rae xil na Mosis xa lamos e Parasi xil lamea lasoh e lasepin nggeih labit, “Xamem matakamet ti neta vasa vata xat moletin ak. !Xos be reitin mak xa masxaxa mu ninin tova tesepin mini!” ¹⁰Selen ak mei be himetu e sangas vaeen vastal en. Misak ni vatixar na moletin xil te vaeen uli mikan xa linatal papas Pol. Ma misemae ni moletin nan xil tangan lihe tan e lital rat Pol reling xil. Ma ba ladela rilomun mei labe nim mae.

¹¹E vongien nen tak, Suv Iesu mei misoh visal Pol e biteni mini bitene, “!Ulum nakan ti! Xouk otesep usil kuh nou inggak e Serusalem. Ma ha usepin ni imak mun tang e Rom.”

Rut Siu Xil Labein Xati Tengan Lihhas Vin Pol

¹²E makoe nen, rut Siu ngan xil lamei vituei e labein xati tangan linaxa ti mu anien mu linamu ti mu oei ituxoh melele xa lihas Pol imat. ¹³Ngan

8 23:5 Eks 22:28

xil vus xa latemae e lingxatien ak lateli hanutap lu (40). ¹⁴Di, labe visal vat xil na pris xil e elda xil mun e labiteni mi xil labitene, “Xamem mabein xati nggeih xa manaxa ti neta ha vuma ... muhas Pol imat. Xosxa muhur xotehi, ma Hi isa pangasien mi xamem. ¹⁵Mak, ma xamim itel ngan xil te Kaonsel musa sepinien iha mi vatixar na moletin te vaeen tangan itel Pol imei mun mei mulepisi. Muluvosi taxa iemim bei tangan muteong kuhi ni vatei mun. E xamem, muxus tili tangan melele xa litela imei, natuxoh inggak ti mu, e muhasi imat.”

¹⁶E matilou xati na Pol milongeong ni lingxatien ak, ma miloh be nim ma moletin te vaeen xil xa pap nan da en, e ba bit mese ni lingxatien ak mini. ¹⁷Ma Pol mikes moletin tei te vaeen bemei e biteni mini bitene, “Utel horam maxoe ak ha mulpus vatixar namim. Xi nggur sepinien tei tangan ihit rati mini.”

¹⁸Ma moletin te vaeen ak dela ba lupus vatixar nan e biteni mini bitene, “Pol xa de nim te xeih mikes nou naba e biteni minou tangan nitel horam maxoe ak imei visaluk vengan xa xi nggur xat sepinien tei tangan ihit rati minuk.”

¹⁹Ma vatixar ak dela ba ludi asealu e misisi bit, “?Naha vari obit oviteni minou?”

²⁰Ma xi biteni mi vatixar ak bitene, “Rut Siu xil labein xati ngamu da xa visuvong, mei lisisuk tangan utel Pol ihe visal Kaonsel nae. Xil liluvosuk xa iexil bei tangan lilong kuhi ni vatei mun. ²¹E onahusil ti li naha xa xil lihiteni vengan xa moletin xil nae ti lixus tili. Moletin xil ak lali hanutap lu (40), e labein xati nggeih tangan linaxa ti mu anien mu linamu ti mu oei ha vuma ... lihas Pol imat. E taxeak, di labue xat xil tuei e litatiluk sutang tangan umae ni.”

²²Ma vatixar ak biteni mini bitene, “Onahiteni ti mi mosav xa omei obit sepinien ak minou.” Di, misil horam maxoe ak dilomun ba.

Lasa Pol Be He Vat te Kavmen tahal Sudea

²³Ma vatixar mikes vat lu te vanut moletin te vaeen lumei e biteni mi xalu bitene, “Mulivue xat moletin xil te vaeen lihe handred lu (200) tangan muhe Sesaria e naen klok vongien xosali. Xamim muka vituei itel moletin xil xa liloh ni hos lihe hanutap tol e hexalu mun (70), e itel moletin te sosoen xil mun lihe handred lu (200). ²⁴Musa ti hos mi Pol mun tangan iloh en, e mutel kuhi ha mulingi pe he Filiks xa be vat te kavmen tahal Sudea xa de Sesaria.” ²⁵Di, vatixar ak midis uvei tei tangan lisa ni mi Filiks xa biteni mak:

²⁶“Vat Tehos te Kavmen Filiks,

Inou, Klodias Lisias, nabit bos makoe minuk.

²⁷Moletin xa masa ni bat iaxai, Siu xil latetal xati e latehit lavasi vamat. E melele xa nakameti xa xi be hortan xati te kantri tahal

Rom, naleh moletin navan xil ba manggur rati ra he xil. ²⁸Natehit nakil ti veneh ma latemaxan ni ven, ma natetela tehe visal Kaonsel nae. ²⁹E melele xa di nateong ni sepinien nae, natekameti xa di lasep sisili vengon xa latehit tehur xoteh rae xil te neketen nae tang. Xi tenapol ni ti neta vasa tangan vasak ni lavasi vamat mu lalingi e nim te xeih ven. ³⁰E melele xa natelongeong ni lingxatien tei tangan lavasi vamat, vatakes, nasa ni bemei mi xouk. E ngan xil xa di lasep sisili, nabiteni mi xil tangan lihat lihit kil naha xa xi tepol ni mi xil pe metom. Xi nen tak. Namesuk.”

³¹Moletin xil te vaeen lalong xat naha xa vatixar tesemae ni mi vat lu nae. Ma e vongien nen tak, xil laba. Laba vuma ... laduxoh taon tahal Antipatris. ³²Ut milan, moletin te vaeen xil xa latekakao, xil ladilomun laba labe vonine. E laling ngan xil xa laloh ni hos tangan litel Pol iha. ³³Melele xa laduxoh Sesaria, laba labe visal vat te kavmen e lasa uvei na vatixar nae mini. Di, laling Pol de hen. ³⁴Melele xa vat te kavmen Filiks buli uvei ak bus, misis Pol tangan vahit kila xa xi nggo provins xave. Melele xa mikameti xa Pol be tahal Silisia, ³⁵xi biteni mini bitene, “Momal. Inou nilepis ngongoren namim e von koten navan melele xa ngan xil xa di lasep sisiluk limei lituxoh inggak.” Di, misemae ni tangan ha liketeh xol Pol e nim xa mahulong xa Suv Toto Herot tepol ni.^h

Pol Misoh Pe Met Filiks

24 ¹Melengien lim (5) mei mitavi, Ananaeas xa be Vatixar na pris xil, del rut elda xil labe Sesaria. Xil lamei del loa tei nae xa hisen Tetalas. Ba lasoh pe met Filiks e von koten nan e laso sepinien xil xa nggeih usil Pol mini. ²Di, xi misemae ni tangan litel Pol imei nim. Melele xa bemei, Tetalas misep sisil Pol pe met Filiks biteni mak:

“Vat te Kavmen Filiks, vengon xa di olaxat kuh xamem del metisouen, xamem madi e tomat vehakut. Xouk di oserep holesok xil hao ve moletin xil te kantri ak mei bos pupu. ³E ut xil vus, xamem mamaal ve relaxatien nam, e mabit mamesuk ven. ⁴Mabit munavas pupu ni ti melengien nam, e madak kesuk tang tangan umae li e uteong vuteili ni rin namem e ngongoren ak xa mabit maviteni minuk taxeak. ⁵Makameti xa moletin ak be vatxeih tei xa di pol ni vaeen xil xa mahulong del Siu xil e rute xil vus e ut etan. Xi be vat na vanut moletin xil xa di langgusil pispisien na moletin tei tahal Nasaret. ⁶Xi tesak tangan vapol ni Nim Eo na Siu xil mei vahe muis pe met Hi, ma matetal xati ven. ⁸Xosxa usis pilei moletin ak, ma

^h 23:35 Suv Toto Herot ak be ‘Herot xa Mahulong’ xa temat dutou ni melele xa Iesu tepot. Xi vari iaxa tesemae ni tangan lipol ni nim mahulong ak. E melengien xil na Pol, moletin te vaeen xil tang lateti en.

ulong kila ixo xi mun tang xa holesok xil xa di mabit usili be reitin.”⁹E Siu xil vus xa lateti lamae e sepinien nan e labit holesok xil vus be reitin.

Pol Misep Kil Rin Nan Pe Met Filiks

¹⁰Di, Vat Filiks pisen ni nggo hen tangan Pol imei iht kil rin nan e ngogoren ak, ma Pol biteni mini bitene, “Namei pe metom Vat Filiks tangan nisepe kil rin navan del sien, vengon xa nakila xa huram xil holu, xouk di otelepis moletin xil te kantri ak. ¹¹Xosxa usis moletin xil ak, ma ulong kil kuhi xa melengien lu e le (12) tang tetavi xa inou natehe Serusalem tangan namot mi Hi en. ¹²Melele xa Siu xil latekamet nou, inou natnangor ti vatel moletin tova e Nim Eo, mu natnapol ni ti selen mi moletin xil e nim te pispisien tova mu e rute sav xil mun e taon ak. ¹³Siu xil xai lasakras lapisen kil sexien tesa tova xa lavit inou iaxa natepol ni. ¹⁴E taxeak, nihit rat ngan ak minuk Filiks xa inou di namot mi Hi na avu namem xil usil sexien tei xa Siu xil ak labit tamal ti. E inou mun nake reitin e holesok xil vus xa latetisi e Rae xil na Mosis tetel uvei xil na provet xil. ¹⁵Nenesien navan del nenesien nae pipin tang xa bit Hi isak ni moletin xil ngasen, ngan labos e ngan lasa, likila limeul rilomun ra maten tangan Hi ilepis xil vus. ¹⁶Mak, ma vehakut di nasak tangan nipol ni holesok xil e sexien tei xa isak ni nou ninave unoun ti pe met Hi e pe met moletin sav xil.

¹⁷“Huram xil holu natnata kat ti e Serusalem. Di, natetilomun nateha tangan naleh ti vatu vaha vatutou ni rut moletin xil tahal Isrel e nasa sanien eo xil vaha mi Hi. ¹⁸E melele xa di natepol ni holesok xil ak, xil latekamet nou e vloh te Nim Eo na Hi e melele vari xa di natepol vuol ni sexien xil te serep moletin en. E melele nen ak, natnata ti vatel vanut moletin tova, e natnapol ni ti selen tova. Natetat temak tang. ¹⁹E rut Siu xil xa latexo provins tahal Esia lateti. Bos vahit xil mun lati inggak xosali tangan lisepe kil sexien tesa tova pe metom xa labit inou natepol ni. ²⁰Mu umae ni ngan xil xa ladi inggak lavit kil neta tova xa misa xa latekameti da xat nou melele xa natesoh pe met Kaonsel nae. ²¹Mu xos ve neta xa natekei ni melele xa natesoh pe met xil e natehit, ‘Namei nasoh pe metemim taxeak vengon xa nake reitin xa moletin ikila imeul rilomun ra maten.’”

²²Di, Filiks, xa mikil kuh neketen na Kristin xil, misep xol koten nan del sepinien ak bit, “Melele xa Lisias xa be vatixar na moletin xil te vaeen mei ituxoh inggak, inou nimal ni ngogoren namim sung.” ²³Di, Filiks misemae ni moletin te vaeen xa di miketeh xol Pol tangan ti iketeh kuhi xole e imae ni tangan ikakao vuteili e nim te xeih e imae ni timue nan xil limei lipusi e lisa tutouen mini.

Pol Misetu mi Filiks del Atou Nan

²⁴Melengien vahis mei mitavi, Filiks del atou nan xa hisen Drusila lube visal rute xa Pol da en. Atou nan be ate-Siu tei. Di, Filiks misilasil ve Pol

bemei e luteong ni misetu usil neketen nan e Iesu Kristo. ²⁵E sepinien kor na Pol, xi misetu mi xalu bit, “Hi ien bei xa moletin xil lilaxat kuh sexien nae xil e lipol ni naha xa momal tevi, vengan xa melele xa rimat, xi ilepis xir vus.”

Melele xa Pol biteni mak, Filiks, ulin mikan. Ma biteni mini bit, “Utilomun mun uha. E melele xa nakamet mesal, nikes rilomun ni xouk.” ²⁶E melele nen tak, xi di minemi bit Pol isa ti watu mini. Ma ve ngan ak, Filiks mikesi vehakut e di misepin dela.

²⁷Huram lu mei mitavi, moletin tei mei minggoles von Filiks e mei be vat hu te kavmen tahal Sudea, hisen Porkas Festas. E vengan xa Siu xil, iexil nggat Filiks e polien nan, xi mistokovein Pol da nga nim te xeih nan tangan vapol ni nenemien nae mei vahos vuteili.

Festas Milepis Pol

25 ¹Festas temei e taon tahal Sesaria tangan vahur kokot ni polien te vat te kavmen e provins tahal Sudea. Di, melengien tol mitavi, nggo Sesaria e be Serusalem. ²E rute ak, vat xil na pris xil del vat xil na Siu xil lamei lapusi. Laseputut ni Pol mini, e lasisi ³tangan vapol ni lalonge vahos e vamae ni Pol vamei e nim te xeih e hal Serusalem. Xil lasisi mak vengan xa lateling xati ngamu xa lihasi e suse. ⁴E Festas biteni mi xil bitene, “Pol da nga nim te xeih e Sesaria. E navehi ti, inou nitilomun nihe rute ak. ⁵Xosxa itep, ma vat namim xil mei lihe xamem muvituei muhe Sesaria. Xosxa moletin ak pol ni neta tova xa misa, ma xil likila lihit rati inggaxor.”

⁶Festas bas melengien xos tol e he sav (8) mu hexalu (10) del xat xil. Di, dilomun be Sesaria. E visuvong nen, xi dotan e von koten nan, e misemae ni xa lavur Pol vamei nim. ⁷Melele xa Pol bemei, Siu xil xa latexo Serusalem latemei, mei lakapis xole e di labit rat sexien tesa hao xa tellep xa labit Pol tepol ni. E lasakras lapien ni vamae xa naha xa labiteni be reitin. ⁸E Pol misep motin xi bit, “Inou natapol ni ti neta vasa vaha ni Rae na Siu xil, mu vaha ni Nim Eo nae, mu vaha ni suv toto tahal Rom.”

⁹E Festas ien bei xa Siu xil lamaan ve polien nan, ma misis Pol bit, “?Xouk omae ni xa ove Serusalem tangan ha nilepisuk en?”

¹⁰Ma Pol bit rilomun ni mini bitene, “E-e, natamae ni ti. Taxeak, nasoh ngamu nade von koten na kavmen tahal Rom. Ma e rute ak vari iaxa momal tangan ulepis nou en. Xouk okila ngamu xa inou natapol ni ti neta vasa mi Siu xil. ¹¹Xosxa nanggur xoteh rae tei mu napol ni neta tei xa misa tangan ha nimat ven, ma minasak pisi ti ninalesae relingi. E xosxa sepinien nae usil nou be luvosen tang, ma moletin tovuol mikila vamae ni nou name he xil. Imak, ma nasasuk Festas tangan umae ni nou nihe Rom tangan suv toto vari iaxa ilepis rin navan e ngongoren ak e von koten nan.”

¹²Ma Festas misepin del moletin xil te kaonsel nan e lasep kil rae xil mini. Di, xi bit rilomun ni mi Pol bit, “Xouk osis nou tangan ha upus suv toto tahal Rom, ma nisa nuk ha upusi.”

Festas Misep Usil Pol mi Suv Toto Akripa

¹³Rut melengien xil mei mitavi, Suv Toto Akripa del hineli, Bernis, lumei e hal Sesaria tangan lalsa sepinien te hurpilien nalu mi Festas ve polien hu nan. ¹⁴Melele xa ludi visali melengien vahis, Festas misep usil Pol mi suv toto. Biteni bit, “Melele xa Filiks tehe vat te kavmen, teling moletin tei e nim te xeih, e da tamu xiak. ¹⁵E melele xa natehe Serusalem, vat xil na pris xil del elda xil na Siu xil latehit rat tesaen xil xa tepol ni, e latsis nou tangan nimae ni ha vamat. ¹⁶E natehiteni mi xil xa ngan ak tave sexien na mol-Rom xil ti tangan mamae ni moletin tei vaha valong pangas xi vatiamu. E-e, itiamu, mulepisi e von koten tangan moletin ak ilong sepinien tesa xil xa liso ni iha ni, e xi isep motin xi pe mete. ¹⁷Ma melele xa latemei inggak, natnararu ti. E-e. Ut milan nen tang, natetotan e von koten e natesemae ni tangan litel moletin ak imei nim. ¹⁸E melele xa ngan xil xa iexil minggat moletin ak mei latesoh tangan latesepin, xil latnaso ti sepinien xa vasa pupu vaha xati vaxoni ngan xa inou di natenemi. ¹⁹Xil latengor mini usil neketen nae e usil moletin tei xa hisen Iesu. Xil labit mat vuol, e Pol mike reitin xa xi meul tang da. ²⁰E melele nen ak, inou natnakil ti vari tangan nikamet reitinen te sepinien nae itep. Ma nasis Pol tangan vamae ni vahe Serusalem tangan lilepis ngongoren nae en. ²¹E Pol ien ti tavei, e tesis nou tangan itat e heok inggak ituxoh melele xa nikila nisa ni ihe Rom tangan ha Suv Toto sung ilepis kuh rin nan e ngongoren ak.”

²²Ma Akripa biteni mi Festas bitene, “Inou mun, ieok bei niteong ni ti moletin ak.”

Ma Festas bit, “Bos tang, uteong ni ti sung visuvong.”

²³E visuvong nen, lapien sexien te sien xa momal ve eilep tei mi Suv Toto Akripa xal hineli Bernis. Ma vat xil te taon ak del vat xil na vanut moletin xil te vaeen ladel xalu lamei del merereen, e ladotan e von vitueien tei xa mahulong. Di, Festas misemae tangan litel Pol imei nim. ²⁴Di, Festas biteni mi xil bitene, “Suv Toto Akripa e xamim vus xa mudi visal xamem taxeak. Moletin ak iaxa Siu xil vus, e hal Serusalem e inggak, di lasep sisili minou. Xil di ladak kes nou nggeih tova tang tangan mavur xoteh meulien nan. ²⁵E inou natnakamet ti neta tova xa misa xa xi tepol ni tangan ha vamat ven. Ma melele xa xi tesis nou tangan nisa ni ihe Rom tangan Suv Toto ilepisi sung, inou natemae ni. ²⁶E nenemien tovuol tamu xa nitis usili tangan nisa ni vatela vaha mi ngan xil tahal Rom. Mak iaxa, nangguri mei misoh pe metom, Suv Toto Akripa, e pe metemim vus tangan melele xa rilepis rin nan e ngongoren

ak ivus, nikila sung nitis neta tova. ²⁷Tamal pupu ti tangan rasa vatxeih tei vaha mi xil xosxa rinavit kil ti veneh ma xa rasa ni ven.”

Pol Misep Kil Rin Nan Pe Met Suv Toto Akripa

26 ¹Di, Akripa biteni mi Pol bitene, “Namae ni xouk tangan usep motin rin nam e ngongoren ak minou.”

Ma Pol misa hen be nesao tangan litit votei. Di, misepin pe met moletin xil bitene, ²“Suv Toto Akripa, namaal pupu ve mesal xa lasa ni minou tangan nisep motin rin navan e ngongoren ak minuk ve naha xa Siu xil di lasep sisil nou ven. ³Bos tangan ulonge, vengan xa okil kuh sexien xil vus na Siu xil tui del ngongoren nae xil. Ma nasisuk tangan uteong ni nou li ihe vuteili tang.

⁴“Siu xil vus lakil meulien navan, melele xa natehe horam maxoe mei duxoh xosali ak, e naha xa natepol ni e ut xati navan e e Serusalem mun. ⁵Xosxa usis xil, xil tang likila lihiteni minuk xa, tetiamu, natemos tetel vanut Siu tei xa lakes xil ni Parasi e nanggusil kuh sexien nae xil. Vanut Siu xil ak di lalong xat rae namem xil mili vanut Siu sav xil. ⁶Ma taxeak, di nasoh e von koten ak vengan xa di naling nenesien navan e hitxatien xa Hi tepol ni tetel xat avu namem xil tetiamu. ⁷Moletin namem xil vus xa lastal langgo vatimol namem xil xa labe lu e le (12), xil ngasen di laling nenesien nae e hitxatien ak tangan mei istal ihe reitin melele xa di lamot mi Hi e melengien e vongien xil. Mak iaxa, Suv Toto, ve nenesien navan e hitxatien ak, Siu xil ak di lasep sisil nou.”

⁸Di, Pol biles pus Siu xil xa ladi e von koten ak e biteni mi xil bit, “?Siu xil, veneh ma xamim xa mubit Hi mikila isak ni moletin imeul rilomun ra maten, mukameti ngeih tangan muke reitin xa Hi pol ni Iesu temeul rilomun ra maten? ⁹Tetiamu, inou mun natenemi tangan nisak purun ngan xil xa laneket e his Iesu tahal Nasaret. ¹⁰Ngan ak iaxa natepol ni e hal Serusalem. Vat xil na pris xil latmae ni nou tangan nital xat moletin eo xil xa laneket e Iesu e niso xil lihe nim te xeih. E melele xa latemei tangan lavas xil lalel, inou mun namaen ni tang. ¹¹Melengien xil holu, natehe nim te pispisien na Siu xil, e melele xa natekamet rute ngan xil en, di natehas pangas xil tangan lisepin isa e his Iesu e lipol ni hitxatien tangan linahusili ti mun. Ieok teat pupu ni xil mak, misak ni di natehe taon sav xil mun tangan ti nihol rerat xil en.”

Pol Misep Usil Naha xa Testal Mini e Suse xa Be Damaskas

¹²Pol misepin mi moletin xil mun bit, “Usil nenemien nen tak, vat xil na pris xil latesil nou natehe Damaskas tetel xeihen nae tangan nipol vuol ni rae xil nae. ¹³E Suv Toto, melele xa natehusil suse nateha, e piniae vari, miehen tei testal xa temihinehin teli eai texo ut nesao teme, mei teleluv xol nou tetel moletin xil xa latetel xat nou mateha. ¹⁴Misak

ni xamem vus matekiri matehe tan. E inou, natelong rae tei xa tesepin minou texo sepinien na Siu xil tehitene, ‘!Sol, Sol! ?Veneh ma di opurun nou? Di osa pangasien mi xouk mun tang melele xa di obae del nou. Onggoni buluk tei xa suv nan di measi melele xa di pol ni vatin.’¹⁵ Ma nabit, ‘?Suv, xouk visi?’ E xi bit rilomun ni minou bit, ‘Inou Iesu, ngan xa di osak purun ni.’¹⁶ !Tamea! Nastal minuk xosali vengon xa nabosei xouk tuei tangan mei ove moletin te polien navan. Ha uhit mese ni naha xa otepusi usil nou xosali e naha xa nipisen ni minuk e melengien xil xa ti imei.¹⁷ Inou niketeh xolok ra Siu xil. E niketeh xolok mun ra ngan xil xa latave Siu ti xa di nasil xouk tangan uhe visal xil.¹⁸ Xouk, uleh rerat xil ra maluxoluken xa da xat xil, mei lipus kil miehen navan. Reitin, ixo xouk nileh rerat xil ra xeihen na Temat, mei liti e xeihen na Hi. Mak, ma melele xa liling neketen nae e nou, nileh rerat tesaen nae ra xil, e mei lihur von ne xil itel moletin eo xil xa Hi tehosei xil.’

Pol Misep Usil Polien Nan

¹⁹ “Ma Suv Toto, natehusil xat kuh metuveen xa natepusi texo ut nesao.²⁰ Misak ni, e hal Damaskas, natesetu mi moletin xil vus tangan lihiles ra tesaen nae xil e lipol ni holesok xil xa ipisen ni xa xil latsa meulien nae mi Hi. Di, natesetu ni mun temak e Serusalem, e ut xil ngasen e provins tahal Sudea. Di, natesetu ni mun mi ngan xil xa latave Siu ti.²¹ Ve sexien ak vari iaxa Siu xil latetal xat nou e vloh te Nim Eo melele xa namei tangan namot mi Hi, e latesak tangan lavas nou namat.²² E Hi di dutou ni nou duxoh xosali ak, ma nasoh inggak e di nasep usil longeongen hos usil Iesu Kristo mi xamim vus, mi eilep xil e mi movotei xil mun. Naha xa inou di nabiteni mi xamim nggoni ngan taxa provet xil tetiamu del Mosis lateke mese ni latehit mei istal.²³ Latehiteni xa Kristo xa Hi tehosei ha ilong pangas xi e ha imat. Ti, xi vari iaxa imeul rilomun ra maten itiamu ni moletin sav xil tangan ipisen miehen te meulien mi Siu xil e mi ngan xil xa latave Siu ti.”

²⁴ Melele xa Pol di tamu misep motin rin nan e ngongoren ak, Festas miki nggeih e misep pepamen ba mini bitene, “!Pol, otallang tova tang! !Kilakilen nam xai di misak ni xouk otallang pupu!”

²⁵ E Pol bit rilomun ni mini bit, “Suv Festas, inou natatallang ti. Sepinien te reitinen e metisoen iaxa di nabiteni xiak.²⁶ Suv Toto xai mikil holesok xil ak ngamu, e nakila namiteni vama tang mini. Xi mikil kuhi vengon xa holesok xil ak tastal ti vaxo suse te xusen.”

²⁷ Pol miketeh momal ba ni Akripa e biteni mini bitene, “?Suv Toto, xouk oke reitin e sepinien na provet xil? Nakila xa xouk okila.”

²⁸ E Akripa bit rilomun ni mini bit, “?Pol, onemi obit okila opol ni nou namei name Kristin komanon?”

²⁹ E Pol biteni mini bitene, “Neta sav xa ove Kristin komanon mu veter luvoluv mu, nasis mi Hi tangan xouk, itel xamim vus xa di muteong ni

nou xosali, ti mumei muneket muxoni nou ... e sen xil ak ihe tovuol e hemim.”

³⁰Melele xa Pol misepin bus, Suv Toto Akripa, vat te kavmen Festas, Bernis, del xil vus xa latotan tetel xatel, latamea laba. ³¹E melele xa di laba, di labiteni mi xil mun tang labit, “Moletin ak tapol ni ti neta vasa tangan ha vamat ven mu vahe nim te xeih ven.” ³²E Akripa biteni mi Festas bit, “Vahit moletin ak nasisuk ti tangan usa ni vahe visal Suv Toto tahal Rom, ma bos tangan ha ven vamase.”

Pol Nggo Tuturil Tei Be Rom

27 ¹Di, Vat Festas miling melengien tangan Pol del rute sav xil mun xa ladi nim te xeih lave taon tahal Rom e provins tahal Itali, e inou Luk be xamem. Ma miling xamem e he vat tei na vanut moletin te vaeen xil xa hisen Sulias. Moletin nan xil labe handred tei (100) e lakes xil ni ‘Vanut Moletin te Vaeen na Suv Toto tahal Rom’. ²Manggo tuturil tei e hal Atramitiam xa di labue xati tangan vahe pasis xil e provins tahal Esia. Di, matoba del xat moletin tei tahal Masedonia xa tete hal Tesolonaeka, hisen Aristakas. ³E melengien sav, matduxoh pasis tahal Saedon. E Sulias en misae e Pol, ma mae ni tangan ha vapus ti timue nan xil tangan lisa ti neta mini xa xi ien bei. ⁴Melele xa mabe reling Saedon, votiang miseten nggeih, misak ni maba makapis manggo rin sav e aelan tahal Saepras xa tas merou vuteili en. ⁵Di, manggur xoteh tas sangas ni provins tahal Silisia del Pampilia, e ba masotie e taon tahal Mira xa de provins tahal Lisia. ⁶E rute ak, mabut mabe ut e Sulias mikamet tuturil tei mun na mol-Aleksandria xil xa di bue xat xi tangan vahe Itali, ma misis vatihos tangan vamae ni xamem mava en.

⁷Di, tuturil xa matnggo en, dat miloh merou tang melengien vahis vengon xa votiang nggeih pupu. Melengien hao mei mitavi, di, maduxoh rute tei sangas visal taon tahal Nitas. E tuturil misakras valoh vamael vengon votiang nggeih tamu, misak ni biles ba nggusil aelan tahal Krit, e rin xa tas be tan vuteili en. Di, tuturil miloh ba nggo sangas ni meteh xil sangas visal taon tahal Salmone. ⁸Di, manggo sangas ni ut te aelan tahal Krit, e tas nggeih tova tang. Ma maloh maba vuma ... maduxoh rute tei xa bos xa lakesi ni ‘Pasis xa Bos’. Pasis ak tave sotin ti ra taon tahal Lasia.

⁹E rute ak, mapusi xa matehas melengien hao ngamu e suse e misak ni madi ngamu e melengien xil te an tesa (melengien xa Siu xil di labal ni anien ve ‘Melengien te Kas Moten Meulien En ni Ra’ mitavi ngamuⁱ). Melele xa vat te moletin te vaeen di minem usili, Pol misa nenemien nan

ⁱ 27:9 Melengien Eo ak be na Siu xil xa di lapol ni e hoxalite te aveti Septemba. E melengien kokot xil te Septemba ba duxoh hoxalite te aveti Febuari be melengien xil te an tesa xa tavos ti tangan tuturil xil laloh en.

mini bit, ¹⁰“Tiramue xil, e ketehen navan, napusi xa suse nar ixeih pupu. Tuturil ak imahoe lel, holesok xil xa di vangite ikesae, e moletin ngan xil mun lilel.” ¹¹E Sulias xa be vat na moletin te vaeen xil, xi miteong kes ni sepinien na vatihos del moletin xa tuturil nan, xi minem mele ni sepinien na Pol. ¹²Xalu lubiteni mini lubit pasis xa madi en tavos ti e melengien xil te an tesa. Sangas moletin xil vus iexil bei xa lasak pisi lakapis e aelan ak e va lave pasis xa bos xa de hal Finiks e aelan ak tahal Krit tangan lavur sen melengien xil te an tesa en. Pasis ak nggur mesal e rin lu, tei nggo saotwes, e tei mun nggo notwes.

Votiang Tei xa Nggeih Bas Pol Xatel

¹³Melele xa votiang hos tei xa nggo saot mistal mi xamem, moletin xil te tuturil lanemi labit bos tangan mava vaxoni lingxatien nae. Misak ni lalih rat angga e manggo sangas tang ut maba. ¹⁴Tavehi ti, votiang tei xa nggeih pupu, xa lakesi ni ‘Toio’,^j nggo ut bemei, mei divin tuturil be mesal. ¹⁵Vengan xa votiang bas pupu ni tuturil e masakras maviles matilomun mavusil suse namem mava, ma mamae ni tang votiang divin xamem maba. ¹⁶Manggus vuteili melele xa be manggo rin xa be saot e tutut aelan tahal Kaoda. E rute ak, del xeihen, maling kuh bot te tuturil ak. ¹⁷Di, boskru xil te tuturil lapo rati bemei nesao. Di, laso ao xil be tas mei langgo pe tuturil, di malet xat xil tangan tas naxu len ni ti. Xil ulixil mikan xa tuturil naxon e mae e kantri tahal Libia, misak ni laseti sel be tan. ¹⁸Vatiang ak nggeih dat mak tang duxoh melengien sav xil mun e tas di bas tuturil xa madi en misa tang, ma laso rut holesok xil xa di vangit tuturil be tas. ¹⁹Melengien sav mun, laso rut holesok xil te tuturil xa meas be tas. ²⁰Melengien hao matapus ti eai mu hitu xil tangan mapus kil suse namem vaxo en. Vatiang miseten dat mak e xamem vus manemi mabit be te maten tuei iaxa madi xiak.

²¹Di, melele xa Pol pusi xa moletin xil lataxanien ti melengien holu, mitamea misoh pe met xil e biteni mi xil bitene, “Tiramue xil, xosxa vahit muteong ni nou e munave reling Krit ti, ma musakras mukameti vaxeih vamak e holesok xil mun misakras vakesae vahe tas vamak. ²²Tave ti neta xa mak, ulimim nakan ti mun. Moletin ti nakesae. Tuturil kestang iaxa ikesae. ²³E vongien, masxaxa tei na Hi xa nabe moletin nan e xa di namot mini mei testal minou e tehiteni minou tehitene, ²⁴‘Pol, ulum nakan ti. Hi miling xati tuei tangan xouk ha usoh pe met Suv Toto tahal Rom. E xi mae ni xa moletin xil vus mun xa ladi e tuturil ak del xouk, linalael ti.’ ²⁵!Ma tiramue xil, ulimim nakan ti! Nanasi e Hi xa holesok xil istal ixoni ngan taxa masxaxa ak tehiteni minou. ²⁶E tuturil ak iha ixon ite aelan tova.”

^j 27:14 Toio be votiang xa nggo notis e nggeih pupu.

²⁷Melele xa mateloh e votiang ak wik lu e tas tahal Mediterenia, e hilaep te vongien, rut moletin xil xa di lapol e tuturil di lanemi labit sangas mave ut. ²⁸Misak ni laso ao be tas tangan lakameti xa tas ak be huinep midep, e lakameti xa be huinep duxoh mita xa be hanutap tei e lu e le sav mun (37 m). Ma laloh vuteili mun e laso rilomun ni e lakameti xa be huinep duxoh mita xa be hanutap tei e lu e he sav mun (27 m). ²⁹Ulixil mikan xa tuturil ak naxon nate hat ti, misak ni laso tiei ni ngga hat (4) xa di pe vil tuturil e moletin xil ngasen di lasis mi hi nae xil tangan ut valan katen. ³⁰Di, moletin xil xa lapol e tuturil lanemi labit lilesae relingi, misak ni lasae ni bot be tas. Xil di laluvos labit liha tangan liling xat angga xil iti vat tuturil mun. ³¹E melele xa Pol pusi mak, ba biteni mi vat na moletin te vaeen xil del moletin nan xil bit, “Xosxa moletin xil te tuturil ak lilesae rani, ma xamim vus musakras mumeul.” ³²Ma moletin xil te vaeen lada xoteh ao xa dal xat bot e lalingi misal ba. ³³Sangas ut valan, Pol nggeih xat xil tangan lavanien ti, ma biteni mi xil bit, “Wik lu tuei xiak di munexo pupu, ma mutaxa ti neta. ³⁴Mak, ma bos xa muanien ti mu li tangan vemim ixeh e mukila mumeul. Munanexo ti vengan xa nakila xa neta ti naxui xamim.” ³⁵Melele xa Pol misepin bus, xi mileh beret vutei e memes Hi ven pe met xil. Di, bul pasi e ngga ni. ³⁶Melele xa lapusi mak, ulikanen be reling xil, e xil mun langga anien vutei. ³⁷Xil vus xa ladi e tuturil ak laduxoh handred lu e hanutap tol e tei e le sav mun (276). ³⁸Melele xa xil vus langganien bus, laso bak pulaoa xil vus xa teti vangite be tas tangan vasak ni tuturil vameit.

Tuturil xa Pol Xatel Latdi en Minggon De Mae

³⁹Melele xa ut da miluv kuhu, moletin xil te tuturil lale ras rute xa ladi en. E lale kil tutut pasis tei xa be suhon, ma lanemi labit xosxa itep, ma lipol ni tuturil ha isal xat suhon tang. ⁴⁰Mak, ma lada xoteh angga xil lamerir labe tan, e lada xoteh ao xil xa dal xat stia. Di, lalihi rut sel xil xa di vat tuturil be nesao tangan votiang ikila itivin tuturil ak ihe ut. Di, maloh ve ut. ⁴¹E tuturil ba minggon e mae tang, ma misakras mun valisalis ti. Vatin iaxa nggon, ma tahe xil xa nggeih mei di nggol len ni nggo toun.

⁴²Moletin xil te vaeen lapol ni lingxatien tei labit lihas vin vatxeih xil ngasen xa ladi pe he tangan linaxul ti linave ut, maxa ni ha linalesae. ⁴³E vat nae tamaen ni ti vengan bit vateh meulien e Pol. Ma misemae ni moletin xil vus xa lakil xulen tangan lavut lave tas e laxul lave ut. ⁴⁴E moletin xil xa latakil ti xulen, bit liha sung itutou itel xat mavulut pilang xil te tuturil e lisal itela lihe ut. Ma nggo sexien ak vari, xamem vus ba maduxoh ut mameul.

Pol Dutou ni Moletin Xil tahal Malta

28 ¹Melele xa xamem vus ba maduxoh ut, malong kila sung xa aelan ak, lakesi ni ‘Malta’. ²Moletin xil te rute ak labos mi xamem e

langgur pilei xamem. Lapol ni upang tei xa eilep di madali vengan xa us mus e masoh minggat xamem. ³Pol mun di mileh viton av tangan vaso ni vahe upang. E melele xa di miso ni be upang, tetal tesa tei mistal nggo vanut av xil ak mei minggar xat hen e murur tang da. ⁴Melele xa moletin xil te rute ak lapus tetal xa murur de he Pol, xil di labiteni mi xil mun tang labit, “Moletin ak, xos bas vin moletin tova. Mak iaxa tave ti neta xa tamat ti e tas, hi nar xa rakesi ni ‘Hi te Lepisien’ tamaen ni ti tangan ha vameul.” ⁵E Pol misin rat tetal ak be upang, e neta ti taxula. ⁶Moletin xil di ladatili tangan hen vatep mu vamot tang vamat. E melele xa ladi nousav e latapus ti neta vaxula, xil labiles nenemien nae e labit, “!Moletin ak, xos be hi tova!” ⁷Rute xa matehe ut en, tave sotin ti ra tan na suv te aelan ak xa hisen Pablias. Xi minggur pilei xamem e milaxat kuh xamem melengien tol. ⁸E melele nen ak, tame Pablias mesei. Ven nggan e miloh en pupu, misak ni pat dat mak. Ma Pol be nim man, miling hen da en e misis xole, ma xi mei milonge bos. ⁹Melele xa moletin xil te aelan ak lalongeong ni, mosav xil mun xa lamesei ladi aelan ak lamei, e Hi pol ni xil vus lalonge bos rilomun. ¹⁰Xil lasa sanien hao mi xamem. E xil laso viton holesok xil hao mun tangan itutou ni suse namem melele eah xa muhe reling xil.

Pol Be Reling Malta Be Rom

¹¹Aveti tol (3) mitavi xa mateti e Malta. Di, makamet tuturil tei na mol-Aleksandria xa texus ve an tesa tete aelan ak. Ma manggo en, maba. Tuturil ak lakesi ni ‘Dioskuri’^k. ¹²Maloh ba maduxoh taon tei e kantri tahal Sisili, xa lakesi ni Serakus. Mabas melengien tol e rute ak. ¹³Di, maloh ba maduxoh taon tei tahal Itali xa lakesi ni Rikiam. Ut milan nen, votiang tei mistal nggo saot e mei divin komanon ni xamem. Misak ni melengien lu tang, ba maduxoh taon tahal Puteoli. ¹⁴E rute ak, makamet moletin vutei xil xa labe Kristin ngamu, ma lakes xamem be madi visal xil wik tei. Di, makakao tangan mave Rom. ¹⁵Melele xa Kristin xil tahal Rom lalongeong ni xamem, xil lakatil xamem. Rute xil ladatil xamem e taon xa lakesi ni ‘Von Posen na Apias’^l, e rute xil ladi nga e taon xa lakesi ni ‘Im te Paten Tol’.^m E melele xa Pol pus xil, xi memaal pupu e memes Hi ve xil.

Pol Ba Mistal e Rom

¹⁶Melele xa maduxoh Rom, lamae ni Pol tangan ha itanga tasen e nim tei itel xat moletin te vaeen tei xa di miketeh xole.

^k 28:11 E sepinien na mol-Krik, ‘Dioskuri’, koute teni be ‘Nat Hi Sius xalu.’ Hi Sius be hi tei na mol-Krik xil xa eilep mili hi sav nae xil. Natnali xalu ak lube meah e hise xalu be Kasta e Polakis. Lakesi ni tuturil ak mak vengan xa lateseh nanao nalu tete vat tuturil ak. ^l 28:15 ‘Von Posen na Apias’ be taon tei xa be 69 kilomita ra hal Rom. ^m 28:15 ‘Im te Paten Tol’ be taon tei xa be 53 kilomita ra hal Rom.

¹⁷Melele xa melengien tol mitavi, Pol mikes viton vat xil na Siu xil lamei e totanen tei. Melele xa mei ladi vituei, Pol biteni mi xil bitene, “Toxoli xil tahal Isrel, namei inggak nggoni vatxeih tei vengan xa mol-Serusalem xil latetal xat nou e lateling nou natete e he mol-Rom xil. Neta sav xa latepol ni nou temak, inou natnapol ni ti neta vasa mi moletin nar xil, mu natnapol ni ti neta vasa mun ni sexien hos xil xa avu nar xil latepispisi ni mi xir.

¹⁸Melele xa mol-Rom xil latelepis rin navan e ngongoren ak tevus, xil latehit lamae ni nou ha veok vamase vengan xa latnakamet ti neta vasa xa inou natepol ni tangan ha namat ven. ¹⁹E melele xa vat xil na Siu xil latesin nenemien nae, napusi xa suse navan minggonaxon. Misak ni natesisi tangan Suv Toto tahal Rom kestang ilepis nou, tave ti neta xa inou, nenemien tesa navan tovuol vata xat tua navan xil tahal Isrel. ²⁰Mak iaxa nakes viton xamim mei nipus xamim tangan nisep kil holesok xil xa testal minou mi xamim. Ieok bei mule kila xa sen xil ak di xat nou vengan xa nake reitin e ngan xa Hi tehiti xati mi mol-Isrel xil tangan isa ni imei iteh meulien e xir.”

²¹Ma xil labiteni mini labit, “Mataxur ti uvei vaxo Sudea xa vahit usiluk. Mu tumem tovuol xa vaxo en vamei vatel longeongen mu sepinien tova usiluk xa vasa. ²²E xamem mabit mateong ni ti mu nenemien nam xil vengan xa makila xa e ut xil ngasen, moletin xil di lasepin misa ba ni vanut Kristin xil xa xouk obe tei e xil.”

²³Ma xil laling xat melengien tei del Pol tangan isepin mi xil. E melengien nen ak, xil holu lamei e rute xa Pol da en. E makoe nen be duxoh vongien, Pol misep kil suse xa Hi mei ihe suv toto na moletin xil. E nggo Rae xil na Mosis e tisen xil na provet xil xa ladi e Vanuvei na Hi, xi di misak tova tang tangan Siu xil ak mei lake reitin e Iesu. ²⁴Rute e xil lake reitin e sepinien nan, e rute e xil, latake reitin ti en. ²⁵Ma xil di langor mi xil mun tang. E melele xa labit ti lava, Pol miso sepinien ak mi xil bitene, “Naha xa Ninin Eo tehiteni mi avu namim xil texo provet Aesea temal ²⁶xa biteni bit,

‘Ha uhiteni mi moletin xil ak uhit,

‘Muteong vuma ... munalong kil ti neta.

Muketeh vuma ... munapus kil ti neta.”

²⁷Sexien ak istal mi xil vengan xa, e nenemien nae, di lalong ras nou,
di laki xol vurange,
e di label xat mete.

Vahit linapol ni ti namak,

mete mikila vapus nou,

vurange mikila valong nou,

e nenemien nae mikila wakil kuh naha xa di napol ni.

Mak, ma xil lakila laviles meulien nae,

ma inou, nikila niteh meulien e xil.’ ”ⁿ

ⁿ 28:27 Aes 6:9-10

²⁸E hoxalite te sepinien na Pol, xi biteni bit, “Mak, ma ieok bei mukila xa taxeak, longengen hos na Hi usil suse tete meulien en ba ngamu mi ngan xil xa latave Siu ti. !Xil lilong xati e lineket en!”

³⁰Huram lu (2), Pol de nim tei xa di minggale e aveti xil vus ni vatu nan. Inggak, di minggur pilei moletin xil ngasen xa mei di lasao ni. ³¹Xi di misetu mi xil usil suse xa Hi mei ihe Suv Toto na moletin xil, e di pispisi mi xil usil Suv Iesu Kristo. Moletin ti tasep xole, e xi besi xi tang tangan vasepin mi moletin eah munamun.